

Giocondamente/giocosamente, farei cantilenare a scuola elementare di dialetto:

« A, Bi, Ci, Ki [chi], Di, É, È – èFfe, Gi [gi; Ġ], Ġi [ghi; Ġ], I, Īi [gli], Iè (tè) –  
èLle, èMme, èNne, Ñè [gnè], – Ò, Ö\*, Ó, Pi, èRre, èSse, – Śö\*\*, So [(i)s(ide)],  
Ti, U, Ü\*, Vi, Wè (wè) – ... Zèta (‘ndó l’g’è)». (= dove c’è, dov’è usata)

\* ...quella “oooh, ma va’ là!” che obiettiamo al pescatore che sul fiume ha – dice – pescato una balena coll’amo da tinca; e quella “uuuh!” che sopportiamo, noi, con una manata al cavallo, àsino, bue... da far partire, càrico;

\*\* “nostrana, ruspante, espirata” come alitando su uno spècchio per nettarlo.

E non è tutto qui, il nostro “alfabeto pòvero”, eh! Senti ad esèmpio uno “sg(i)”, locale anàlogo a “sc(i)” in “sciato/sciolto” [già questo non ordinàrio, in bergamasca; dove “sc” suona fiscalmente s + c : s-c-è-t, s-c-(i)ò-p, s+c+(i)a-f-ù, mès-c-(i)àda]; un suono tra “o” ed “a” (spece in finale di parola); più raro, un suono particolare affine ad “v/f”; una “d” speciale...). Lo so... lo so anch’io che non è pròprio da “silla-bàrio elementare italiano”; sarebbe “oròbiko” locale, nelle mie intenzioni.]

Per questo testo, tuttavia, alfabeterò dettagliatamente, con le corrispondenze italiane:

A, a	A	àbito, canasta, sofà
B, b	Bi	baco, giubbone, blu, bruno... (absent...) [finale di parola, leggi “ <b>p</b> ”]
C, c	C(i)	cibo, àcero, ricci [regge al sèguito solo altra “c(i)”]
K, κ	C(hi)	caro, coro, cura, chi, che, vacca, cloro, cromo, Cnido
D, d	Di	dare, ridda, druso, càdmio [finale di parola, leggi “ <b>t</b> ”]
E, e	É	ero, vedere, bidé [in brg.msk <u>“e” finale non tònica</u> = statisticamente al 90% “é”, chiusa]
E, e	È	è, the, cioè, scèmpio, viventi [ <u>“e” finale tònica</u> = c. s. “è”, aperta]
F, f	èFfe	fine, buffo, flusso, frase, oftàlmico
G, ġ	G(i)	Gigi, rogge [regge solo altra “g(i)”] [finale di parola, leggi “c(i)”]
Ġ, ġ	G(hi)	gala, ghiro, reggo, glòria, grado, magma (= ghm)... [finale di parola, leggi “c(hi)”]
I, i	I	ìbridi, mirini, così
Ī, ì	I	gioco, graffiati, èmpie, schiuma [“semivocale”; mai tònica] [latino “jam, justus...”, inglese “yes”, tedesco “ja”, ...]
L, l	èLle	luna, àlluce, albo, alce, alcuni, aldo, elfo, algia, olga, alma, ulna, alpi, falsi, àlveo, alzo

Gl(i)		vòglia, màglie, àglie [non è semplice somma di "g" + "l"...] [attenzione a "glicine, glissare" = <i>gh</i> licine, <i>gh</i> lissare, ...]
ñ, Ñ	Gn(i)	segni, cognome [non "Wagner = <i>ghn</i> ", sèmplice somma di "gh + n"]
M, m	èMme	meno, àmido, gomma, ambone, amnesia, lampone [niente "nasali"]
N, n	èNne	noi, ànimo, penna, anche, onde, tonfi, sfinge, fango, anse, onta, invio, anzi, ance, mancino, anche, màncano [tuttavia, ad es. "nc" non è mera somma di n+c: c'è in "n" un certo gioco... "nasale", come pure in "ng" (àngeli, congedo, àngoli, cinghiale)...]
O, o	Ó	motorino, senno, veloce, biró (forzatura di "biro" a tronca) ["o" finale non tònica... in bergamasca è al 99% "chiusa"]
O, o	Ò	retòrica, perciò, no, sennò ["o" finale aperta è sempre tònica]
Ö		("eu, oeu" francesi)
P, p	Pi	pane, topa, plùmbeo, prémio ( <i>rari ps...</i> , <i>pn...</i> , <i>pt...</i> , <i>dal greco</i> )
K, κ	Qu	quale, quinta, questo, qui, quorum (sempre con "mezza u")
R, r	èRre	rari, terreno, erba, marci, arco, orda, Darfo, porge, cargo, armi àrnie, arpie, arso, arto, corvo, orzi, caparra [nessuna caratterizzazione, nè francese, nè ibérica, ...]
S, s	èSse	sassi, sbagli, scope, sfogo, sisma, traslato, snodo, sputo, squame stàdio svevi [ma in alcune parole, sopra, è già piuttosto...]
Œ, œ	iSi	iside, casotto, esosità, sbarra sgarro sdegno sviluppo [finale : "esse"]
T, t	Ti	tito, tettònica, atleta, travi, atmosfera, tsunami
U, u	U	uva, pròfughi, virtù
Ū, ū	U	questo, àcqua, guida, guai, quote [semivocale : sempre dopo "q, g"; mai tònica; <i>a volte più vicina, nella pronuncia, a "mezza ü"</i> ]
Ü, ü		("u" pulita francese e greca, dove per l'italiana s'impiega "ou") [vocale spesso tònica in finale] [ <i>a volte ü "sfuggita": küindès, güèra</i> ]
V, v	Vi	voli, avvento, avrò [finale leggi "f"; iniziale, spesso ignorata]

Un cenno agli accenti tònici : â, ê, î, û, ô aperti, larghi; ě, ǒ acuti/stretti. "Ă ĭ ǒ ě" (stretta la "ó" e la "é") quali cortesie per voci di verbo "avere". Un " ˘ " premesso a parola indicherà "sdrucchiola/bis", posposto dirà "tronca". "Ê, ês = è, èssere" ["es" = "avesse/ro"] .

## I SO PRIME FACENDE D'I APÔSTOI

– PREAMBOL –

--- \* ---

Cao a té, kar ól mé Teofel! Só kóntët ke ta stét bé in salüte e de mó-râl, té poa i to de ka. Poa mé e töc i mé m'ringrassia 'l Siñûr ke m'istâ bé, de so servidûr fürtünâc.

Ta m'ët sirkâd, a nom dela famea de fedéi ke ta küret lë de brao pa-stûr, ergöt de skric [dè skriid só] per köntâ sö kel ke l'ä dic e fac ól Gesû, in töc i so vias fo per la Palestina; perکہ (ta diget) per la mé lónga e fedël kómpañia a i apóstói pensî ke mèrite fidüca de saigen asë e ke l'sée a mé dóer, per la grassia ke g'õ de koñôs la osta parlada po la so de lur, dato ke óramai l'è skuase impósiból de ïga in ka amô i apóstói skam-pâc finankö, per fai köntâ sö lur a us, ke i ê 'n gir per ól mónđ.

Ta dige ke só unurâd asë! E la osta dómanda la sa sunta dré a tate d'ó-tre, akâ lure kare asë e impórtante, a gárantim a mé ke l'è 'l cël a üflil, e mia öna méa ambissiû, kel ke ma só sa bel e metid dré a fa béóntéra, pie de rierensa, e senza daga impâs a 'l so laórâ d'i apóstói e de kei óter.

Kón kesto perô ta prége d'ïga amô 'mpöde pasiensa; intât, a pöde semô mandât lë ergöt d'óter de skriid só, in próa: ü laûr piö ligër per mé (ke mete alurden in buna part tace laûr semô skriic só finadës e ke sa re-górde piö de fresk), ma mé krede k'i va interesa alistês... A pato, ne, ke per intât sa spetigev ñemô mia i laûr del Gesû kóla so mader prima (ke g'l'ä dré amô 'l Góanî, ke mé sapie) e kói so k'i ga'ndaa dré finâ kuand ke l'è stac pórtâd sö 'n cël.

Pense prope ke va tókerâ kóntentâs de kel “dopo” ké... köntâd sö pri-ma! E dókâ, é' 'ndré insêm a mé, adês, atênt e pasiênt.

--- \* ---

## 1. I SALÜDA 'L GESU` – AMO` IN DUDES

--- \* ---

Prima de 'nda sö 'ndel cél, ól Gesû... l'g'ia dac fo i so iströssiû a kei ke l's'ia sirkâd fo lü per fan i so apôstói. Isê, dopo ke l'éra mórt, ól Gesû l'ga s'ê presentâd amô, e 'n tate manére l'g'ã fac bé ed ke l'éra amô prope lü, töt intrêg, abékê mia ligâd, óramai, ñe a i méter ñe a i kilí, ke l'pasâa dét treêrs a mür e pórtte sprangade, ak a maiâ e biv amô, ne; e l'ga parlâa de 'l so reñ del Dio...

Ü bel dé, intât k'i éra là a tâóla, a l'g'ã fac sö 'sta rekómandassiû ké:

– Óter, a, isluntanis mia de Gerüsalem, ma stì pötòst ké a spetà kel regâl ke 'l Tata nost sö 'n cél a l'v'ã prómetîd, e poa mé va n'ò a sa köntâd sö ergöt tate ölte. Ól Góân (sa regórdî?) lü l'ma batesâa adoma dét in-del'akua: óter invéce sirî batesâc kómpân de mé poa dét 'ndel'ispéret-sânt, regâl del Tata sö 'n cél a kei ke l'sa sirka fo lü –.

Iura, kei k'i éra là 'nsem kón lü i g'ã dómandâd: – Ne, té, Siñûr: él po kesto ké ól mómênt göst ke ta g'ët de tra 'nsem amô ól reñ de l'Isdraél? –

E 'l Gesû l'g'ã respóndîd isê: – A i ê mia laûr per vóter, kel de saî kuand ke gösto l'socéderâ: adóma 'l Tata sura l'pöl saîl, e l'deciderâ lü! Ma óter, va eñerâ adôs öna gran fórsa, la fórsa de l'ispéretsânt ke me g'ö sirkâd a 'l Pader per vóter e l'ê dré a riâ só: e iura sê deenterî i mé testimone a Gerüsalem e po 'n töta la Gödéa e la Samaréa, po ak infina 'n töt ól mónd, va mankerâ mia 'l tép! –. [Però, per tace añ amô, ergü l'ispeterâ “ól reñ amô del David”, e mia “'l so reñ del Siñûr segönd ól Gesû”].]

E, dopo disnâd e ke l'ia fac kuater pas kón lur, ól Gesû l'ã skómensâd a leâs sö de 'l söl, a 'l vólt, intât k'i Apôstói i staa lë a ardaga. Po, g'ê riâd ü néól, e lü i ã piö ést! Lur i éra dré amô a ardâ 'nsö fiso 'ndoke l'éra desparîd, ke l'salta fo du tipi estîc sö töt de biank, i ga a 'nkóntra e i ga dis isê: – Óé, óter omeñ de Galeléa: ulî po sta lë a ardâ 'n aria fin'a dómâ? A

l'si bé ó no ke s'i mia 'nsoñâc e 'l vost Gesû, ke l'v'ã lasâd ké per indâ sö 'n cél, ü bel dé l'turnerâ só amô ké, isě kómpañ ke l'ĩ semô ést a turnâ ké!

E alura, i apóstói a i ã lasâd là ól “mut d'i ülie”, po i ê turnâc indrě là a Gerüsâlêm. Kel mut læ l'ê bel visî a la sitâ: òna traca mia de piö de duméla pas, ke s'pöl gösto 'nda e eñ po a 'l sabbat, senza skandalisâ nisù`. E riâc só in sitâ i ê po 'ndac sö a 'l pia de sura dela ka 'ndók'i staa... a digã isě a la so mader ke l'éra partid ön'ótra ólta e staólta delbû, senza ñe lasâ ké i estíc de regordâs... kómpañ ke 'nvéce i bende là 'nde tómba öda. Ke ergü` i éra po sa 'n fastöde sönkêl “istì ké a spetâ” (tekâd dré a kel k'i sa regórdâa: “apéna turnâd indrě, dopo ke sóro sparid dela cirrólassiü per i mé bei tri dé, eñerö a töv sö a töc vóter”); e po “rierî fo 'n kó a 'l mónđ a fa ed kel ke m's'ê bu de fa 'nsema, mé e óter kól Pader in cél”.

E isě, 'l dé dopo l'ê ñemô mia stac “de festa”, ke amô per ü bel tok i ã sigetâd a fa festa a 'l sabbat kón töc i ebrë; ma la festa 'n “düminika”, ól dé de regórdâs bé de lü turnâd indrě d'i mórc, a l'ê ü laür d'ü bel tok piö tarde, per tös fo de töc, in ğir per ól mónđ.

Kesce ké i ê i so nom d'i apóstói, ekól: ól Simû 'l Piéro “kel (de) Préda” e l'Andréa so fradêl; ól Góanî kól Gakóm kei del Sebed, i fradei “adês a 'l truna!”; ól Félëp ke l'parlâa akâ grék; ól Tórnâs, ól sömêl malfidët; ól Bórtól(ómë) Natañêl del fig; ól Lévi Maté ğabelër; kel óter Gakómî, so küsî de 'l Siñûr; kel óter Simunî, ke l'ğa teñia a i kananë selôc, i patriote; e 'l so frèdêl de Gakómî, 'l Güda Tadë (ól Tetû; mia ó' Skariôt: kel l'éra sa mórt per so könt, fo là 'ndel kap). A i éra töc sae e dekörde, a ure fisa-de i sa tróâa per prégã 'nsema kói fómne, kóla Maria, la so mama del Gesû, e kói so parëc k'i s'éra decidíc a daĝa kredet, po, e invéce de tral a ka in païs i l'ia kómpañâd infina a 'l so ğóedë sant, e pó ergü` a là sóta la so krus.

E ü bel dé, kei ke ğa kredia a 'l Gesû resösität i éra là töc insêm, k'i faa

'n töt piö ó mén ü sentvinte persune. A g'ê leâd sö 'l Piéro 'ndelmês, e l'g'ã dic isê: – Sigür`, amîs: bisonâa prope ke l'söcedês töt kel ke ól sant isperet Siñûr l'ïa prédic indê Bibia. Per so meso del re David difati, salm 41, a l'm'ïa samô isâd de 'l Gûda, ke l'avrês güidâd kei ke i avrês metîd in kadéne 'l Gesû. Ü de nóter dudes ñak, kól so mandâd de misiunare! Kói sólc capâc de 'l so bel afare a l's'ê krómpâd ü kap: e là i ã po a tróâd là scopâd; de manéra ke la sét i ã camâd kel kap là in dialêt “l'akêldama”, kap del sang. Ma 'ndei Salm a g'ê skriîd dét amô a ergöt d'óter: “e la so ka de lü là la reste bandunada, ke piö ña nisü` d'óter l'indage a staga!”. Difati, ól kap i a dóvra de sótrâ adóma i fórestër. Però g'ê skriîd dét akâ isê amô 'ndei Salm: “ke ergü` d'óter (*ergüdóter*) a l'fage 'l so ófése de lü là”. Adês dókâ, merâ ke ün ótr'om a l'se kómpañe a nótr'ondes, per testimónâ amô in dudes la resöresiû del Gesû, ke dudes a n'n'ã ülfîd. A l'g'ã de ês ü de kei k'i ê eñic kón nóter per töt ól tép ke 'l Gesû l'ã streersâd in-sö` e 'nsó la nasiû kón nóter dudes dré... de 'l dé ke 'l Góân a i ã batesâd, fina a 'l dé ke l'm'ê stac pórtâd iviâ per indâ sö 'n cél! – .

Alura, g'ê stac fac du nom: ü, ól Gósep Barsaba k'i ga disia akâ ól Göstî... e du 'l Matia. Po töc insêm i ã prérgâd isê: – Siñûr: té ke ta koñoset a fônd ól kör de töc... fàm ved a nóter ké adês kóêl d'i du ke ta sirket fo té, per fa l'ófése de apóstól, a 'l so post ke kel poer disgrasiâd de 'l Gûda l'ã lasâd vöd per indâ là a kel del so guadêñ! –. Po... i ã trac fo la sórt: e per meso de la sórt a g'ê eñîd fo nominâd ól Matia; e isê g'ê tókâd a lü de deentâ kel d'i dudes [...d'i trédes; ke l'rierâ po 'l Paól a fa kuartórdes. L'ê a ira ke per lur la sórt a l'éra mia “a kaso”, ne, ma “lasaga fa lü a 'l Siñûr”; però, la sórt... la sarês prope mia ü gran “meso spiritüâl”: difati, l'ê piö ña kapitâd de dóvrala, e g'ê eñîd piötöst in üso i “vótassiû 'n kósensia”.]

--- \* ---

## 2. FIAME DE SPERET – DISKORS' DEL PIERO

--- \* ---

E kuand ke g'ê riâd ôl dé dela festa Pentekosta, i fedéi a i éra là tōc in-sêm indêl istês post a prégâ e fas fōrsa. Manimâ, intât ke per i strade la pasâa fo la sêt ke 'ndâa lâ a 'l Dom... g'ê eñîd sō òn'aria, kómpañ d'ü ent fōrt ke l'sófiês só de 'l vólt... e l'ã 'mpienîd sō tōt ôl ambiênt indókê i nosc i éra là sentâc só. Po, i ã ést a kómparî kómpañ d'ōna fiama de fōg... ke la s'ê spartida sō in tate lengüe... k'i s'ê po metide só òna per òna sura tōc i presênc, i gâ s'ê pugade so sō 'l kó, òna per ü, e i ê a skómparide! E isê, i s'ê tróac tōc kuance pie de sant isperet, po i s'ê metîc dré a parlâ in tate parlade k'i éra mia i so de lur, dré a kel ke l'isperet sant a i a ispirâa.

G'éra gösto là in kei dé là, a la kapitâl, tace brae ebrê eñîc insâ de tōt ôl mōnd a prégâ per i so feste de lur. Kuando k'i s'ê rinkórsîc del vent sura kela ka là, i s'ê trac insêm là aturen in gran nōmer. E, kuand ke kei là de dét i ê po eñîc de fo... i ê ñak restâc!, a sentîn oñe ü a parlâ ü 'ndel so dialêt de via... ke lur là i éra skuase tōc galilê. A i ê restâc dókâ sturdîc e amirâc, k'i sa disia isê: – Ma, kei e kele lê ke parla, éi mia tōc galilê ó de ké 'n gîr? Kóm'êla po, alura, ke oñü` de nóter a m'kapês tōc ke ké g'ê sōcedîd ergōt de gros, e ke lur lê i ê dré a dim a nóter ké de kambia éta... abék'i parla tōc indêl so dialêt e nóter invéce m'sê ké de tate bande del mōnd, de Róma e de Kréta e d'i ârabi e d'i gîsiâ e d'i persiâ po de piö deluntâ amô? E de tōte i noste bande ke m'vé, a m'sent e m'kapês tōc tōt kel k'i kōnta sō: i so grand'óvre del Grand Siñûr, piö ergōt ke ma tóka tōc ké, ü per ü! – ...Kelkelê, i restâa sbalurdîc, i sia po mia kósê pensân, e i sa dómândâa 'ntra de lur kós'i ùlia di kósê, kei laûr lê.

Perô g'éra là tace a de kei k'i tüia 'n gîr i “predikadûr”... e i disia isê ke i éra adóma tōc cok, tōt lê. Buna. A ü bel mómênt i dudes i s'ê tróac tōc insêm, e 'l Piéro de mes a lur a l's'ê fac sentî piö fōrt de tōc: isê ke man-

mâ l'ê restada adóma la so us de lü, là 'n piasa. E l'disia sô isê:

– Óter ké delà Gödéa, e töc vóter ke si ké 'ndela sitâ, skultim bé a mé, adês: sirkëm de καρι bé kel ke ma söcêd, a töc nóter! A g'ê mia ké dei сок, kómê i dis ergü: a m'sê mia сок, l'ê mia spéret de bicër, a i növ de matina, dèm dókâ, de sae! Ma l'ê pötöst dré ke l'deenta ira... kel ke l'ïa samô dic ól prófët Góél: “Skólti kel ke söcéderâ 'ndei öltem dé... a l'dis ól Dio Siñûr: a spanderö fo mé 'l mé spéret sura oñe scet de om: deenterî töc prófêc, óter po i ost iscêc e scete, e ga manderö dei visiû a i vosc sueñ, po dei 'nsôñ a i osc veci. Sê, spanderö fo mé 'n persuna ól mé spéret sura i mé servidûr e i mé servente, in kei dé là, e i sarâ töc prófêc! A fóro nas fati ecesiunai sô indel cél... e señ mirakulûs só sô la tera”: kómpanñ de 'l vent e 'l fög fo del nórmâl ké 'nkö, presempe... “e l'sarâ ól so dé del Siñûr, dé grand e gluriûs! In kel dé là, oñü` ke camerâ 'l Siñûr a l'sarâ salvâd”. Êkóla, g'ê skriid só prope isê. E alura, ó sét de l'Isdraël... iskultim bé a mé, adês kósê va dige. G'ê eñîd ké ün om: ól Gesû de Nâsaret, ke 'l Dio Siñûr a l'va n'ã bé fac ved la so grandesa kól faga fa oñe gener de mirákoi e señ pródigûs in mes a óter: e kesto, l'si bé, ké 'n sitâ 'st'an, mia kisâ 'ndôê ó sént'añ fa! 'St'an, prope, segönd la decisiû del Dio Sant e 'l so disêñ finadê prensépe, a l'vê stac metîd indei ma a óter ké de Gerüsâlêm, e óter l'ï metîd in krus... e nóter a m'l'ã lagâd incódâ só söndóna krus, per ma d'i pagâ! Ma söbet, a 'l ters dé, prope kel om ké, ól Gesû de Nâsaret, ól nost Dio Sant a i ã resösität, i ã desliberâd fo per semper d'i so dulûr e de la mórt; perkê 'n cél e 'nde Bibia l'éra fisâd ke la mórt a i a teñês mia 'n kadéne: ke, prope de lü l'ïa dic ól re David... salm sédes, ó no, “mé ede semper ól Siñûr deante a mé: l'ê semper in banda a mé, isê ke mé g'ãbe mai ña pura, e 'l mé kör a 'l sée pie de göbel e piéne de alegria i mé parole! La mé persuna 'ntréga la se banduna 'ndela to spéransa: té, Siñûr ta ma laserët mia là 'ndel país d'i mórc, ta perme-



terët ña mai ke mé, 'l to servidûr fedël... fenése in pólver dét indê fosa! Té ta ma fét ved ól sentër ke pórtã a la éta e ta ma 'mpienéset sö de alegresa kóla to santa presensa semper". Amís... ma sa permite de div car, ke ki ke l'parlâa isë, ól re David, ól nost patriârċ... a l'ê mórt a lü, l'ê stac sótrâd, po la so tómba m'la unura amô 'nkô töc nóter, ke 'l Dio Sant a i äbe 'nde so gloria: ma l'ê bé pólver a lü! Però, l'éra a prófët, lü, e i a l'sia ke 'l Dio Sant a l'g'ia 'mprómetîd, sö la so parola de Dio... mia adóma ke ü so scet a l'ga sarês indâc dré a reñâ, kómakê l'ã fac ól Salumû: ma poa ke ü d'i neüc d'i so neüc... a l'sarês deentâd ól liberadûr dela so sét. Ól re David dókâ, l'ã preëst samô de iura kel ke l'g'ia de söcêd: e isë l'ia gösto parlâd a de la so resöresiû del mesia kuand ke l'ã dic isë "lü l'ê mia stac bandunâd indêl país d'i mórc, e 'l so korp a l'ê mia restâd dét indela tómba a desfâs sö". Isë, êkóla, 'l nost Dio Grand l'ã prope trac indrê de la mórt kel Gesû Krist ke va dige mé! E m's'ê ké nóter a testimoñâl! L'ê stac sóleâd sö a ma dréca del Siñûr (salm, amô) po l'ã ótenîd de 'l Dio so pader de mandâ só ké ól so sant ispéret imprómetîd, e i ä spandîd fo poa sura töc nóter ké: ke l'ê bé kel ke óter ké edî e sentî adês! Difati ól re David l'ê mia 'ndac sö lü de persuna sö 'ndel cél: ma l'ã dic adóma "ól Dio ól Padrû de töt a l'g'ã dic isë a 'l mé padrû, ke mé servése: vé sà, té, sêntes só ké a la mé dréca, e mé ta meterö i to aersare a fat de sgabêl a i to pé!". E dókâ... ke töta la so sét de l'Isdraël a i a l'sapie bé de sigûr: kel Gesû ké, ke l'ê stac incódâd sö söndöna krus... a l'ê lü 'l mesia, inviâd del Dio Sant... viv per semper sö là in banda a 'l nost Dio, e bu de daga éta a ki ke ga a dré, kómpañ ke edî ke l'ma da ól so spéret e la so fórsa a nóter ke 'nkô! E l'ê grassie a lü... ke nóter a m'pöl kred viv sö in cel poa i nosc prófêc e patriârċ dré a lü, êkóla... mia deentâc adóma sender! Ke, ü l'ê resösîtâd: e nóter a m'l'ã est: e dókâ m'ga sa ke 'l Siñûr a la fi l'salva e l'fa kampâ kei ke l'sirka fo, Lü! –.

Kei κ'i skóltâa i éra tókâc tōc indêl fōnd del so kōr. E alura i ȝa dōmandâa a 'l Piéro e a i óter kós'i ȝ'ia po de fa... kómpañ κε κιακ añ indrê i ȝa l'dōmandâa a 'l poer Góân, kuando κε lü l'batesâa dét indel Górdâ.

E 'l Piéro, lü, l'ȝ'ã respóndid isê: – Merâ kambia leanda, kónvertis e fas batesâ a so nom del Gesû Krist, per fas perdunâ i pekâc e ês prónc a risei 'l regâl del Dio Sant, ól so sant ispéret. Perké, êkóla: l'imprómèsa del Dio Sant a l'ê per vóter e per i osc iscêc ké e poa per tōc kei deluntâ: tōc kei κε 'l Dio nost Siñûr a l'camerâ –.

Po, 'l Piéro l'ȝ'ã dic sō amô tace laûr d'óter per kónvîncai e fȝa kóraȝo, e l'ȝa disia isê: – Aceti la salvesa, per vĭȝa mia 'n sórt la brōta fi de tata sêť perdida via de la so strada del Siñûr! –.

E isê, ü bel muntû de lur là i ã acetâd i so proposte del Piéro, e i s'ê a fac batesâ: kel dé là, ü pér de miêr de persûne, a presapōk, i ê eñide de la banda d'i fedéi. Akâ se ña tōc i s'ê po fermâc là 'n sitâ, dopo: ma tace i ê po turnâc indrê a i so país, semô kól nom del Gesû 'ndel so kōr, a κιακ manére misiunare a lur...

--- \* ---

### 3. INDEL` SO NOM DEL GESU`, TAT PER METES DRE

--- \* ---

E kei κε staa 'n sitâ i éra póntüai a skóltâ i apóstói, a ülis bé e ütâs, a fa dei pasc insêm, a skadense, e a préȝâ 'nsema. I sa skōdia de dos la pura ü kól'óter, tat κε 'l Siñûr Dio Grand a l'faa de mirâkói e señ, per so meso d'i apóstói. A i éra òn'ànima sula e i sa faa part ü kó' l'óter tōt kel κ'i ȝ'ia de 'l so: i endia fo kel κε ȝa ansâa, po i spartia sō 'ntra de tōc lur i sólc, kóndün öȝ a i so bisōñ de oñü. Tōc i dé ü κιακ rególarmênt, e po a 'l sabat tōc kei κ'i püdia, i sa tróâa akâ là a 'l Dom. Indei so ka i maiâa tōc insema omeñ done e servidûr, senza strefâ e senza malenkónée. I lo-dâa 'l Siñûr, i sa stimâa tōc a stes liêl... fo κε ardâc mal d'ü κιακ κاپυριû

e kuak sapientû. E oñe dé 'l Siñûr a n'na suntâa là ü kuak de kei dela sitâ bé impresiunâc, ke isë i a pörtâa a salvamët.

Ü bel dopólmesdë, 'l Piéro e 'l Góân i 'ndâa là a 'l Dom, per i órasiû d'i tre ure, l'ura dela so mórt del Gesû. Là in banda a 'l purtû camâd “la pórtâ bela” g'éra là ün om infirem de pos ke l'éra nasîd: skuase töc i dé ergü` i a pörtâa là e i a metia là... sentâd só, a sirkaga la karitâ a kei ke 'ndaa de dét a 'l Dom. E isë, a l'g'ã slóngâd là la ma akâ a 'l Piéro e a 'l Góân, k'i éra dré a 'nda de dét. Lur du... i ga arda indei ög, e 'l Piéro l'ga dis isë:

– Árdem bé a nóter, té! –. Lü là i ä ardâc indei ög, e l'sa spetâa de lur de capâ ergöt. Alura, ól Piéro l'g'ã dic isë amô: – Áda: g'ö dré ña ór, ña arsênt... ma kel ke g'ö ké ta l'dó: indêl so nom del Gesû de Nâsaret, té læa sö e po kamîna! –. Po i ä capâd sald per i bras per vütâl a tras impê: e... de bot i pé e i kaége de l'infirem i s'ê rinfórsâc: e a 'l gul a l'éra dréc sö i so gambe, e l's'ê metîd dré a kaminâ! Ke isë l'ê po 'ndac de dét poa lü kón lur a 'l Dom, la prima ólta 'n véta, e l'sa esaltâa e l'lodâa 'l Dio Grand ...e töc i ä po ést bé a kaminâ e kantâ. Kei k'i a koñosia, ke l'éra lü 'l poe-rêt infirem ke l'sirkâa la karitâ de fo sö i basei là a la pórtâ bela... i restâa töc asë!, a ed kel ke g'éra kapitâd prope a lü. E sikóme ke l'sa destekâa ña piö fo de 'l Piéro e de 'l Góân, töc, isbalurdîc, i ga sa faa aturen, là indêl pórtæg del Salumû. Alura 'l Piéro l'g'ã parlâd isë a la sét, ekól:

– Óter, sét de l'Isdraël: sa fi po mervea ke lü ké l'ê a guarîd? Kósè ma ardî a fa a nóter du... kómpân se m'sarês istâc nóter a fal kaminâ per no-sta fórsa ó per ól nost timûr de Dio? Së, ól nost Dio de l'Abrâm e de l'Isâk e del Gakòb, ól Dio d'i nosc antenâc... l'ã fac ved la so gloria del so scet e servidûr, ól Gesû! Kel Gesû, prope, ke prope óter a g'l'î pórtâd là ligâd sö a 'l Pélât, e l'î refüdâd kuand ke 'l rómâ l'vùlia liberâl! Isë ï refüdâd l'inócênt e göst e ï pretendîd de fa desliberâ fo ü delinkuênt asasî! E isë... ï fac kópâ ki ke l'pörtâa e l'faa 'mparâ adóma ke la strada dela éta! Ma

perô, êkôla, ól padrû dela éta i ã recamâd insâ d'i mórc, e nóter a m's'ê ké a testimoñâl! E dókâ, l'ê la fórsa de kel nom lê: del so nom del Gesû, ke la g'ã metîd in korp a kel om ké, e l'koñosî bé töc in ke stato ke l'éra, la g'ã dac la fórsa de tras impë, e kaminâ! A l'ê la nosta fidüca 'n kel Gesû læ, ke i ã fac guarî isë bé kómâ püdi ed a töc! Buna. Mé l'só bé, amis, ke óter e i osc kapi a l'ê stac per ñórantismo ke g'í fac a 'l Gesû kei bröc laûr là. Ma l'só poa ke prope isë 'l Dio Sant l'ã fac deentâ fati kel ke l'ïa samô dic tate ólte kóla so us d'i Prófëc: a l'ïa bé dic, difati, ke 'l so 'nviâd a l'g'ïa de patî. Alura dókâ: kapîla poa óter, adês: e kambî manéra de fa, po turnîga 'nkóntra a 'l Siñûr, perkê lü l'va perduna! Alura së, ke 'l Siñûr a l'va darâ pas e oñe bé e l'va manderâ só amô ól Gesû, ól so inviâd mesia ke l'ïa preparâd Lü de sémper per ól vost bé! Per intât, ól Gesû Krist a l'g'ã de restâ sô sô 'n cél... finakê l'veñe 'l so tép, ke töt a l'sarâ renôâd, kómpañ ke l'ã dic ól Dio Grand, per meso d'i so sanc Prófëc, tat tép in-drë. Difati, poa 'l Mósê l'mã dic isë, ó no: “ól Siñûr vost Dio l'va manderâ só amô ü prófët kómpañ de mé ke l'sarâ amô ü de óter, e óter l'iskólterî 'n töt, e oñü` ke i a skólterâ mia l'sarâ bötâd fo dela so sét del Siñûr, e l'sarâ ün om mórt”. E kei óter Prófëc k'i ã parlâd dopo 'l Samüël i ã predisîd töc ü dré l'óter kei dé ké, i nosc. Kel ke 'l Dio Sant a l'g'ïa 'mprómetîd a i Prófëc, a l'éra per nóter ké adês, per vóter: e adês a m's'ê noter i kómpâr del pato ke 'l Dio Grand l'ã fac kóí nosc veci, kuand ke l'g'ã dic isë a 'l so Abrâm “mé benedésere töte i famêe del mónð per meso de ü dela to famea”. E isë, l'ã fac nas ü 'ntra de nóter, e i ã mandâd ké prima a nóter, ól so servidûr e 'nviâd, ól so scet: per pórtâm ké oñe benedis-siû, per isturnâm via de la nosta éta sbañada –.

--- \* ---

## 4. E PER OL SO NOM DEL GESU`, DOKA`

--- \* ---

Ól Piéro e 'l Góân i éra dré amô a parlagá a la sét, ke g'è riâd là i préc, k'í kapi d'i guardie del Dom e i sadüsë. A kei là ga 'ndaa prope mia só ke i du apóstói i ga fes prédika, e i ga 'nseñês a la sét e i ga disês isë ke 'l Gesû l'éra resösität... e dókâ, ke i mórc i pöl a turnâ 'ndré (roba de mac, po de eretek!). E isë i ã arestâc po metíc in presû per la noc, ke l'éra samô tarde per fa procês.

Perô, intramês a kei k'í ãa skóltâd i du apóstói ga n'éra samô dét a tace k'i g'ia poa kredíd: e isë, i fedéi i riâa sö uramai a ü sikméla persune!

Ól dé dopo, i so kapi d'i güdë, i eci e i duturû dela kapitâl i s'ê reüníc.

G'éra là in partikólâr ól Vani kapo d'i préc, ól Kâéfa, ól Góân, ól Lisan-der, poa töc kei dela so famea del Vani. I s'ê fac pórtâ là denâc i du apóstói e i g'ã dómandâd “kemanéra, po, kón ke ütórísasiû de ki, ã fac guarí kel om là ier, óter, e?”. Alura ól Piéro, töt ispirâd, a l'g'ã dic isë:

– Va salüde, óter kapi dela sét, óter veci del gran Kónsèi e poa óter töc braa sét de l'Isdraël. Ma é dómandâd könt, dókâ, de 'l bé ke m'g'ã fac a ü 'nfirem, ier: a s'völ saí kómâ l'ê ke l'ê guaríd kel poer om ké. Buna. Se kel om ké l'va sa presenta ké denâc a óter in tata salüte, l'ê per la so fórsa del nom del Gesû Krist de Nâsaret! Së, kel là ke ãv incódâd sö sö la krus mia tat tép fa prope óter... e ke 'l Dio Grand Siñûr a i ã söbet pórtâd in drë d'i mórc! Kel Gesû ké, l'ê kel ke la Bibia la dis isë prope de lü “la préda ke óter kapmaster ã bötâd iviâ, l'ê deentada kó de kantû, e via ke- la g'è mia mür ke sta 'mpé!”. Isë, sul ke per so meso de lü nóter a m'sa salverâ: perkê prope 'n nisalög` d'óter in töt ól mónđ intrëg, a g'è dac a i omeñ òn'ótra manéra de salvâs, kómpañ ke 'l Dio Grand Siñûr a l'fa kón nóter per so meso de lü! –.

Kei là del Kónsêi a i e ñak restâc, a ed la so siköméra e la kónvinsiû del Piéro e del Góân, a saí po ke i éra adóma du poer peskadûr, senza ña 'mpó de sköla. A s'sa koñosia prope, daltrónde, ke i éra du amîs del Gesû. Però, i edia là a l'infirem guaríd, ke l'ga staa tekâd a i du apóstói töt amirâd e senza pura: ün om infirem de kuarantâñ e pasa. Isë, i sia po ña kóntestaga kósê. A i ã mandâc de fo, dókâ, intât κ'i decidia 'ntra de lur kósê i g'ïa de fa, e i deskütia isë: – Kós'a ma n'farai de 'sta sêt ké... e?! Ke töt ké 'n sitâ i sa bé ke 'stó mirakól ké tat evidênt a i ã fac lur, e ña nóter a m'pöl mia di de nô. Ma, mè a ke 'sta storia ké, perô, la cirkule mia trop in mes a la sêt: sedenô m's'ê amô töt in perikól kómpañ de prima de ïl töld fo! Buna: m'ga próebéserâ a kói katie de parlâ amô 'n gir a nom de kel so Gesû là! –. A i ã camâc de dét òn'ótra ólta, e i g'ã próebîd in töte i manére, a so résc, de predikâ fo 'ndel so nom del Gesû.

Ma 'l Piéro e 'l Góân i g'ã respóndîd isë: – Ardî po óter despervóter... se la sarâ piö gösta, deante a 'l Siñûr, de dav iskölt a óter... pötöst ke a lû! Per nost kónt de nóter, a m'pöl prope mia lasâ sta de kóntâ sö kel ke m'ã ést e sentîd kón kei ög ké e kón kele órege ké! –. Kei là del Kónsêi, alura i g'ã fac pura amô 'mpó, po dopo i ã lasâc indâ: fatolê, eko, i ga tróaa prope mia ergöt per kastigai... dato po ke töta la sêt la lodâa 'l Siñûr... e mia lur du ó 'l Gesû, per kel ke g'éra söcedîd a l'infirem.

Apéna restâc liber, ól Piéro e 'l Góân a i ê tumâc là in mes a i so amîs e i g'ã kóntâd sö töt kel ke i g'ïa dic i kapi e i veci.

A sent kei laûr là, i fedéi i s'ê tróac töt de kórde a lodâ 'l Siñûr isë:

– Ó Kreadûr del cél, dela tera, del mar e de töt kel ke g'ê a 'l mónđ! Kól to sant ispéret ta g'ët fac di isë a 'l re David, nost antenâd, ól to servidûr: “I nasiû i sa tra 'nsem, i sa da de fa: ma a fa, po? I so sêt i komplota tö-

te: ma l'è per ól pernegòt! Negòt i pöderâ fa ña töc insema i re po i kapi dela tera κ'í sa aska a faga la güera a 'l Siñûr e a 'l so re ke l'ã sirkâd fo e ónsîd sö lü kól so öle sant!". E l'è prope ira, êkól, ke 'ndela kapitâl i s'è metîc insêm ól Eròd e 'l Pónsio Pélâd, i representânc de l'Isdraël e kei del rest del món, kóntra 'l to sant servidûr ke té t'ët ónsîd sö e 'nviâd ké té... töc kóntra 'l Gesû! E isè i ã gösto kömpîd töt kel ke té t'ïet preëst e fisâd prima, indê to pótensa e sapiensa! Adês dókâ, Siñûr, àrdega po té a kel κ'í dis κ'í ma farâ de mal, e dàga invéce a i to servidûr fedéi la grasia de pórtâ fo la to parola kón sigüresa e kón pro! –.

E, dopo finîd de prégâ isè töc insêm, a g'è eñîd sö kómpân d'ü tere-môt là 'ndókê i éra: i n'n'è eñîc de fo töc pie de sant ispéret e i ã kómen-sâd a pórtâ fo la so parola del Siñûr, oñü` frank e senza pura.

I fedéi, êkóla, in kel tép là (abé ke ü куак i eñia de tate tendense, amîs d'i Farisè, d'i Sadüsè, d'i Skriâ... e per töc a i éra piö tace i so sigürese e i so üsi κ'í g'ïa de lasâ 'ndrè, kónê kei de pórtâ dré 'ndela nóa kómpañia) a i éra prope “ü kör sul e ön'ânima sula”. Dré a l'ezempe a d'ü куак kónvertîc d'i Esè óservânc (ma mia de kei fra 'n kónvênt, ne; de kei... i nosc i ma köntâa sö tate rëgóle e cerémôñe, e n'n'éra là amô tace 'ndel desêrt, prónc a sent “la us del mesağër del cél”): a i ãa mia sentîd ól Góân bate-sadûr, lur. Ma, s'ére dré a di: d'i nosc, dókâ, iura) nisü` l'sa reservâa piö adóma per lü kel ke l'g'ïa de so, ma töt a l'veñia dóvrâd per töc. Kón fór-sa e kóstansa i apóstói i testimoñâa la resöresiû del Gesû: e 'l Siñûr a l'ga mandâa sul ke benedissiû. E nisü` de lur i restâa senza 'l nesesare: difati, 'ntra kei κ'í g'ïa de so e ka e kap, g'éra a de kei κ'í a endia fo, po i ga pór-tâa là i sólc a i apóstói: isè, êkól, ga eñia dac a oñü` asè de faga frónt a i so bisôñ per kampâ e sta bé kói óter fedéi e kói tase. Ke, per ól mómênt

i piö tance i sa 'nkredia delbû ke l'éra küestiû de mis, tat per la kapitâl de ês metida suersóta, kuat per ól reñ d'i ebrë de deentâ 'l so reñ del Siñûr.

Presempe ól Gósep, ü dela trebü` del Lévi nasíd a Sipr, e ke i apôstói i ga faa de suemôm ól Bârneba (ke l'völ po di “kel om ké l'ta fa kóraço”; buna: lü...) l'ã endíd fo 'l kap ke l'g'ïa e i sólc a g'ï ã pórtâc là töc sö l'óngã a i apôstói.

--- \* ---

## 5. SÔMEA` SENSÂ ÊS – I PASERA` PO PER SO KÖNT

--- \* ---

Invéce ün om, ü Anen, ke la so fómna l'éra la Saféra, l'ã sě endíd fo, dekorde kón lé, ü terë k'i g'ïa: ma l'ã teñíd öna part d'i sólc per lur du, marito e móër amô dekorde, e a i apôstói l'g'ã pórtâd là 'l rest. Alura, 'l Piéro l'g'ã dic isë: – Aa, té... Anen! Kóm'éla, ke 'l diaól kapo a l'g'ã riâd a krómpâd, e!? 'Nkemanéra t'l'ët mia dic car ke t'ët teñíd in banda öna part d'i sólc de kel terë là? L'éra po roba toa, prima de endel, e i éra to i sólc dopo endíd. E alura dókâ, a ke pro ülí aparî generûs a 'l sento per sent, ma 'nsem perô fidâs mia, fa finta de negóta, po fas mantêñ, a? Perké l'ê miga adóma i omeñ e i amîs ke t'ët töld in gir, ma 'l Siñûr in persuna... a kred de fala franka e ülí teñ ól pé 'n do skarpe... e fas mantêñ kói óter! –.

Kóm'a l'ã sentíd keke parole lě, ól Anen l'ê a bórlâd só 'n tera mórt. Isë ke töc kei ke i ã ést e saíd i s'ê ñak ispaentâc! E dopo, dei sueñ a i ã pórtâd iviâ 'l kadaer e i ã sótrâd. Ü tre urete piö tarde, g'ê riâd là la so móër de l'Anen, e la ga sia ñamô mia negóta de kel ke g'éra söcedíd. Ól Piéro l'ga dómanda: – Dim impö, té: ï capâd kuat po, de 'l terë ke ï endíd fo... óter du, e? –. E lé la ga dis isë “m'ã capâd tat e tat”: e poa lé diga mia kel ke i ã teñíd in banda per lur. E 'l Piéro a lé: – A té scopa, Saféra! Pota... alura, l'ê prope ira: ïv decidíd insêm töc du, de sfidâ ó' spéret del Siñûr, ne, té? Áda: i ria ké adès kei k'i ã apéna sótrâd ól to om [è i vé per pór-



*tâd via poa té kómpân dè lü!]* –. E... la bórla só 'n tera stekida poa lé! I sueñ i ria, i a tróa là mórta... e dókâ i a pórla via, per sótrala là 'n banda a 'l so poer om, e mêtei tōc du 'ndimâ a 'l Siñûr, sa ke a i omeñ i g'a mia üd tēp de dómandaga perdû. La so brōta storia, l'ã fac impressiû asē sura tōc i fedéi, po sura tōc kei k'í ã sentida.

I apōstói i faa amô a tace mirákói piö bei e aléger, ne, in mes a la sét; i éra mia 'mpeñac adóma a capâ 'n fal i fürbi... ke n'n'é semper, de kei.

I fedéi i sa tróaa là de spes tōc insēm a 'l Dom, a 'l pórtég del Salumû. Nisû d'óter i sa askâa a metes là kón lur... ma però la sét i ga ardâa mia mal anse i g'éra akâ simpatek, kómê kómbrikóla. Ke dé per dé la kresia: e omeñ e fómne i deentâa semper de piö. In sitâ, i skómensâa a met de fo i malâc per i via, a sö i so lecî, de fa 'n manéra ke kuand a l'pasâa fo 'l Piéro, almēn la so ómbra la tókēs ü ó l'óter; e anse: diólte l'éra asē de di sö ól so nom “ól Simû la préda, ól so amîs del Gesû”. I eñia 'nsà poa de aturen a la kapitâl kói so malâc e 'ndiaólâc, e n'na guaria a semper.

Finakê... ól kapo d'i préc e tōc kei dela so banda, e prim i sadüsē, a i é deentâc gélûs asē invērs a i apōstói, e i ã decidid de fa ergóta, êkóla, e dókâ i ã fac arestâ e serâ sö 'n presû ön'ótra ólta.

Ma de noc... ü angel del Siñûr a l'ã dervid fo i pórtē dela presû, l'ã fac indâ de fo i apōstói e l'g'ã dic isē: – Indî là 'ndel Dom, óter, e köntîga sö a la sét töt kuat de la buna nöa, e figa 'mparâ la strada! –.

I apōstói i ã fac prope isē: a la matina dopo i éra samô là a 'l Dom, e i predikâa. A la so ura, 'l kapo d'i préc e kei dela so banda i ã reünid i eci d'i güdē a Kónsēi söperiûr, po i ã mandâd là a tö i apōstói a la presû: ma i ã mia tróac là. G'ê stac tróad là serada fo bé benóne la presû e i guardie a 'l so post denâc a i pórtē, ma nisû de dét. E i kapi i sia piö ña pensân

κόςê, e i sa dómandâa l'püdia êsğa söcedîd kósê, a i apóstói. Po g'ê riäd là ergü` a köntaga sö k'i so presunër a i éra là a 'l Dom, a predikâ. Alura 'l kapo d'i guardie l'ê 'ndac là a töi kói so omeñ: ma i ä fac in bune manére, per pura de ês capâc lur a plokade de la sét.

E là 'ndêl Kónsêi, ól kapo prêt a l's'ê po metîd dré lü a aküsai:

– Nóter a m'v'ia bé próebîd, kói bune e kói katie, de predikâ fo a so nom de kel om là! E óter, kós'í fac óter, e? Óter... í spandîd fo i oste prédike e storie per töta la kapitâl... po üli fam kólpa a nóter dela so mórt de lü là... e kasâm dré a nóter i oste maledissiù! –

I apóstói i g'ã respóndîd isê: – Nóter, a m'maledës prope ü bel nisü, nóter. Però mè bé óbedîga prima a 'l Dio Siñûr, e dopo, kasómai, a i kapi d'i omeñ! Mia ira...? Ól Dio Grand d'i nosc pader antenâc... a l'g'ã dac indrê la so éta a kel Gesû ke óter ïev fac mör incódâd sö 'n krus. Ól Siñûr i ä pórtâd sö 'n banda a Lü... e i ä fisâd de kapo e salvadûr, per ófrîga a la so sét de l'Isdraël de püdî kambiâ strada e fas perdunâ. E nóter a m'pöl mia fa a méno de testimoñâ kei fati ké... nóter kól so sant ispéret ke 'l Siñûr Sant a l'ga da a kei k'i ga óbedës a Lü! –

Kei là del Kónsêi a sto pónt i ê deentâc viöla e i vülia fai mör töc. Ma... g'éra dét intrâ de lur ü farisê, ü de nom Gamalël, gran dutûr de legî, ke töc de la sét là i a teñia 'n grand unûr. A l'ê leâd sö, e l'ã fac mandâ de fo ü mómênt i apóstói, po l'g'ã parlâd isê a 'l so brao Kónsêi:

– Sét d'Isdraël: stîm bé atênc, óter, kel ke si dré a faga a kei omeñ ké. Mia tat tép fa, sa regórdî... g'ê saltâd fo ü Têöda, ke l'pretendia de ês ü grand om impórtânt: e ü kuatersênt persune i s'ê metide kón lü, ke l'ga garantia de pasâ dét indêl Sórdâ kói pé söc kómâ 'ndel mar Rós. Ma l'ê stac kópâd lü, e i so i s'ê a desperdîc fo töc, po s'parla ña piö d'i so idèe. Dopo, a 'l so tép dela könta d'i kó, g'ê enîd fo ü Gûda galilé... ke l'ã trac

idrë ü muntû de sét a lü. Ma l'ê stac kópâd poa lü... e kei ke l'g'ia dré i s'ê desperdic töc a lur. E adês, dókâ, mé va dige isë, êkóla: ñga piö negöt a ke fa, kón kei omeñ ké, e lasii 'nda. Tat, se i so prógêc e i so fatüre i ê roba de omeñ... i fenës fo a la svelta persokönt`; e de 'l desurden i n'na famia, me ma par, intât. Ma, se l'ê roba so del Siñûr... aa: ña óter ga rieri mia a desfala sö. Ó üli magare réscâ de kómbât ól Siñûr, vóter? –.

Kei là del Kónsêi i ê stac de kórde kón lü ke ga kónveñia de fa segönd ól so avís de lü. Ma perô prima i ä camâd de dét amô i apóstói, i g'ã urdenâd turna de predikâ piö fo a nom del Gesû, i g'ã fac petâ öna kuak fröstâde, po i ä lasâc indâ. I apóstói i ê eñic iviâ de 'l Kónsêi töc kóntêc ke 'l Siñûr a i ä riteñic deñ de ês malmenâc per ól so nom del Gesû. E töc i dé amô, tat a 'l Dom ke 'ndei ka, i ga daa tötüra a predikâ e pórtâ fo la buna nõa del Gesû, ól so brao inviâd del Siñûr.

--- \* ---

## 6. DUDES PIÖ SET PER TÖC

--- \* ---

Intât k'i kresia de nõmer, i fedéi eñic de luntâ e k'i parlâa mia trop bé ebrë, e k'i staa de ka ü kuak insâ ü kuak ifâ e mia 'n piëna sitâ... i sa lömentâa kói óter, perkê segönd lur i so êdóe de lur i eñia 'mpó traskürâde, kuando ke 'nvêce là 'n sitâ 'ntra de lur a l'veñia dac fo 'l maiâ manmâ dé per dé a kei k'i n'n'ia 'mbisôñ. I dudes, alura, i ä trac insêm töc, e i g'ã dic isë: – A m'kapës bénóne a nóter, së, e m'vörês kór depertöt' nóter a la stesa manéra... ke m's'ê gösto töc fradei indêl Siñûr. Perô, l'sarês mia prope bel ke nót'apóstói a m'lasês indrë de predikâ e fa prégâ... sul ke per da fo mei de maiâ e kóntrolâ de kóntentâ töc. Alura dókâ, amís: ser-nî fo 'ntramês a óter set omeñ de buna repötassiü, om sanc de spéret e sae: e töc insem a m'ga darâ a lur kel öfése lë, êkóla! Isë nóter testimone m'pöderâ po 'nda 'nac a 'mpiegâ piö tat ól nost tép a prégâ e predikâ.

A i ê stac töc dekörde: e i ã sirkâd fo ó' Sté(f)en, ól Félép, ól Prokór, ól Nékanór, ól Témú, ól Parména e 'l Nékla de Antéôca, kónvertic a la so religû d'i güdë. Po g'i ã presentâc a i apóstói, ke i ã prégâd, po i g'ã stendíd sura i ma sö 'l kó. Mia sés ó ot ó d'óter... ma set, kómpañ ke g'ê paríd bé a i apóstói, dré a i dé ke 'l Siñûr a l'se tö küra d'i omeñ, dré a i bisõñ piö gros κ'i ã teñíd per i prim (fo pregâ e predikâ) e dré a i siti 'ndok'i staa kei fedéi là aturen; e mia adóma perkê n'n'éra mia dei óter bu e κ'i ga teñia, ne. Isë, la so parola del Siñûr la sa spandia fo semper de piö, i fedéi i deentâa semper piö tance, e g'éra a tace d'i préc d'i güdë κ'i pasâa a krêdega a 'l Gesû.

Ó' Sté(f)en, deentâd diakón (ü suen de fo, ke l'séra fermâd là in sitâ; kómpañ d'i piö tace d'i set, a les sö bé i nom: e dókâ “i fórestër” i éra semô la piö part de la “kómunitâ-césa”)... ó' Stéen, pie de (v)igûr per grassia del Dio Grand, a l'faa ed poa lü dei gran bei laûr e dei mirâkói 'n mes a la sét. Ma isë, natürâl, a l'g'éra antipateκ a tance, per invidia e tat d'óter amô, e prim a öna part de kei dela ka d'dótrina d'i “desliberâc fo”, 'ndók'i sa 'nkóntrâa i pelegri d'i bande de Sirë, de Lesandria, po dei óter amô de kei d'i bande 'nsö vers a l'Âséa (a la kapitâl g'n'éra là a sentinër, de salédutrina: öna per öne nasiû e parlada d'i aspirânc isdraelite e pelegri: de 'ntra de lur g'ê eñíd fo a i nosc diakón: teñic dókâ per tradidûr).

A n'n'é eñic fo dókâ a deskössiu kón lü, ma i ga riâa mia a têñega kó, de tata sapiensa ke 'l sant ispéret a l'ga ispirâa. Alura, i g'ã dac la manca a ergû, de faga köntâ sö 'n gîr κ'i l'l'ia sentíd a mankaça de respêt a 'l Mósê, e po, ñaméno, a 'l Dio Sant! Isë, eci e duturú i ã skóldâd sö la sét, po i ga s'ê bötâc adôs a l'Isté(f)en, a i ã ligâd sö, e i ã pórtâd là denâc a 'l Kónsêi süperiûr, insêm a i so fals testimone pagâc κ'i ã denüncâd isë:

– A m'l'ã sentîd prope nóter a dağa a parlâ mal de 'l Dom e de 'l Mósê ...po kóntra la leđe, ακ. E m'l'ã sentîd a di a κε 'l Gesû de Nâsaret a 'l'bö-terâ só ól Dom... e κε i kambierâ a töte i rêgöle κε m'ã riseîd nóter de 'l Mósê –. Töc là 'ndel gran Kónsêi i g'ïa i ög póntâc dréc sö 'l müs a 'l'isté-en, e isê i ã ést κε l'ğa sömeâa 'n'fina a ü ángel.

--- \* ---

## 7. DISKORS DE(L I)STE(F)EN – PRIM MARTER KRISTIA`

--- \* ---

Alura 'l gran prêt a l'g'ã dómandâd: – Él vira kel κ'i dis in ġir de té... e?  
 E ó' Sté(f)en a l'g'ã respóndîd isê: – Amîs, e óter pader venerâbei: ðim a tra a mé, adês, se kónte sö de eresie, ó i laûr kóma κε i ê delbû. Ól Dio dela gloria del cél a l'g'ê kómparîd a 'l vost antenâd l'Abrâm, kuand κε l'i-stâa là 'nde Mesopotamia, prim de 'nda a sta là 'ndel Aram, e l'g'ã dic isê de lasâ 'ndrê 'l so paîs... e de 'nda là kóla so famêa 'ndel paîs κε l'g'avrés fac ved lü... Ól Abrâm l'ã bandunâd ól paîs d'i Kaldê, po l'ê 'ndac a sta là 'ndel Aram. Po, dopo la mórt del so pader, ól Siñûr a i ã fac pasâ de l'A-ram in kel paîs ké 'ndókê sti óter adês. Ma... senza dağa kómê so de lü ña öna spana de teré: a l'g'ã adóma 'mprómetîd κε l'g'avrés piö aante re-ğalâd töta la reğû, e κε i so néuc i sarês istâc padrû ké, dopo de lü. Ma... 'l bel a l'ê κε, a kel tép là, l'Abrâm a l'g'ïa ña ü scet, ü κε l'ê ü, lü! E 'nvéce 'l Dio Grand a l'g'ã dic isê, εκól: “I to desendênc i starâ de ka 'ndü paîs fórestêr per kuatersentâñ, indók'i sarâ maltratâc asê e i deenterâ po töc servidûr in kadéne. Ma mé, dopo... ġa kalкерó só la mé ma kóntra la sét κε i avrâ teñîc isê 'n kadéne! E lur i 'ndarâ po via de là e i turnerâ a ado-râm mé amô ké”. Ól Dio Sant a l'ã fac ól so pato sant kól Abrâm, κε 'l séñ a i a pórtâ amô 'nkö i masc κε nas ké 'ntra de óter, ot dé dopo κ'i ê

nasíc, kómpañ ke l'ia fac ól Abrâm kól so scetî l'Isâk, e l'Isâk kól so scetî l' Gakôb, e kómpañ ke l' Gakôb l'ã fac kói vost dudes patriârk. I patriârk, po, de sueñ i ê stac gélûs del Gósêp e i ã endîd, e l'ê 'ndac a finî 'n kadêne 'ndel Gito. Però l' Dio Grand a l'éra kón lü e i ã deslberâd fo d'i so dulûr, a l'g'ã regalâd la sapiensa, e g'l'ã fac deentâ simpatek a l' re Faraû: ke i ã fac deentâ góernadûr de töt ól Gito, e 'nfin'a sö la so ka del re! Intât ...g'ê eñîd fo 'na karestéa vaka in töt ól Gito, e poa sö la regû d'i Kananë, là 'ndókê g'éra là l' Gakôb. A l'éra prope düra, alura, e i nosc patriârk i tróaa ña piö negôt de maiâ. Kuand ke ól Gakôb l'ã sentîd a di ke là indel Gito g'éra là tat bel fórmët... l'ã mandâd itâ i nosc patriârk; e a l' se-gönd vias ól Gósêp a l'sê fac koñôs de lur... d'i so fradei; e isê l' re Faraû l'ã saîd de ke famêa ke l'veñia. Iura, l' Gósêp a l'ã mandâd a tö ól so pader e la so famêa, setantasîk persune 'n töt. Isê l' Gakôb a l'sê trasferîd indêl Gito, indókê l'ê mórt là... e kómpañ de lü i ê mórc là a i nosc patriârk. I so korp i eñia trespórtâc itâ a Sikem, per vês sótrâc là 'ndela tómba ke l'Abrâm l'ia krómpâd là, de l' so scêt de l'Amór. E dopo... intât ke l'sa kömpia ól tép de kel ke l' Siñûr sö l' so unûr a l'g'ia 'mprómetîd a l'Abrâm... la sét de l'Isdraël i kresia, po i deentâa tance, là 'ndel Gito; finakê, g'ê riâd fo ün óter re ke l'ia mia koñosîd ól Gósêp e kón förberéa e katiéria l'ga faa de l' mal a i vosc pader, i a skisâa sóta, e i a öbligâa a da via ó fa sparî i so scetî apéna nasíc, de manéra po k'í sa móltiplikês ña piö. In kela sitiüasiü là g'ê nasîd ól Mósê... e l' Siñûr a l'g'ã ülid bé. Per tri mis l'ê stac leâd fo 'nde so famêa, po, kuand ke spüdia piö skóndel, ól Siñûr a g'l'ã fac tróâ dét indel sere a la so sceta del re del Gito... ke i ã töld sö po i ã leâd fo lé, kómpañ se l'éra ól so scet de lé. Isê, ol Mósê l'ê kresîd a la manéra d'i prênçepi del Gito, iströid, po fórt a parole e a fati: pekât adóma ke l'betegâa ü falî. Ma

riåd a kuarant'añ... a l'g'ã üd voia de koñôs impö piö bé i so fradei, ke l'ã po skópríd de ês a lü ü de kei de l'Isdraël; e g'ê a kapitåd de difenden ü, maltratåd suemesüra... fin'a kópâ kel gisîã ke l'g'a faa del mal. Isë, po... l'sa pensâa ke i so fradei i avrés kapíd ke per so meso de lü ól Siñûr a l'vülia salvai: ma lur i ã mia kapíd. E ün óter dé l'sirkâa de faga fa la pas intrâ de lur, a du κ'í tekâa béga, e l'g'a disia κ'í éra du fradei, e 'nkemanéra dókâ sa fâei 'ntórt ü kó' l'óter: ma 'nvéce ü de kei là l'g'ã dic isë se l'éra magare a lü ü kapo, ü d'i padrû... e se l'vülia magare kópâ só akâ lü, kómpâñ ke l'ïa samô kópâd fo kel tal gwardiã là, prima. Fatólê, ól Mósê... g'ê restâd adóma de sparí: e isë l'ê po 'ndac là a Madian e l's'é spusâd là e l'g'ã üd a dei scec. Ü kuarant'añ dopo amô, dókâ, g'ê kómparíd ü mistêr fo 'ndel desêrt del Sînai, in mes a dei spi κ'í brüsâa senza kónsömâs: a l'ê restâd ñak isbalurdíd! E 'ntat ke l'g'a 'ndaa là (v)isî per vêdega mei l'ã sentíd la so us del Siñûr: “Só ké mé: mé só l' so Dio Grand d'i to eci, ól so Dio Sant del Abrâm, de l'sâk e del Gakôb!”. Ól Mósê l'tremâa töt e l'vardâa só 'n tera per la pura de ed vergü` ó ergöt de mör. E l' Siñûr a l'g'ã dic isë: “Kâes fo i sândai, té, perkê ta pestulet söndöna tera santa! Ö bel e ést, mé, töt kel ke ga tóka sopórtâ la mé sét là 'ndel Gito, ö sentíd i so lamênc: e adês... só eñîd só mé per desliberai fo. Vé' sa, té, dókâ, ke oi mandâd là amô 'ndel Gito, tél!”. Sigür` : prope kel Mósê là ke kei là i ïa mia ülfid ke l'sa 'nteresês de lur, prope kel ól Siñûr, kól so señ d'i spi κ'í brüsâa senza 'nda 'n sender, a i a mandâa là amô de lur per difêndei e güidai. E lü, a fórsa de mirâkói, i ã po fac partí fo de l' Gito e fo 'ndel Mar Rós e fo 'ndel desêrt per ü kuarant'añ amô. L'ê stac prope l' Mósê a diça isë a i scec de l'Isdraël: “ól Siñûr a l'va farâ nas intrâ de óter amô ün óter prófêt kómpâñ de mé” ... A l'ê stac ól Mósê, ke a parlamêt indêl desêrt l'ã fac de médiadûr intrâ i mesaçi de l'

mut Sînai e i disküsiû d'i nosc pader. Lü l'ă riseîd i nost brae kóman-  
damênc dela éta... per pórtamei só ké a nóter! Ma a lü, lur là i g'ă mia ülid  
dağa a tra, anse i sa refüdâa, e i pensâa ак de turnâ 'ndrë 'ndel Gito, a i so  
sîgôle, a i so manére de fa de lur là: e i ga disia a l'Arôn “fàm sö té ergü”,  
ke l'figure bé kel ke l'kamina fórt e (v)itoriûs deante a nóter, e ke isë l'ispa-  
ente i nosc aersare: ke, kel bröt Mósê là kóí kóreñ a l'm'ă 'nsabiâd dét ké  
'ndel desêrt e m'sa piö ña g'ê söcedîd kósê, a lü!”. Isë, i s'ê fac sö ü édêl: e i  
ga faa dei sakrefése a ü idól fac sö kóí so ma de lur... ke brae! Sikê, 'l Dio  
Sant a i ă po bandunâc, e lur i s'ê mefîc dré a préğâ e adorâ 'mpó de töt...  
kómpâñ ke m'les sö benóne dét indêl liber d'i Prófêc: i s'ê guadeñâc la so  
bela depórtasiû a Babeloña. Sa regórdî o no ke i nosc veci là per ól desêrt  
i g'ă dré la tenda del'Arká, faca sö kómpâñ ke 'l Mósê l'ia ést e l'era stac  
iströid de 'l cé! Kón dré kela tenda lë 'l Gósüê l'vensia i so güere, e l'ê re-  
stada talkuâl fina a 'l so tép del re David... ke l'g'ă dómandâd a 'l Siñûr de  
püdî fağa sö lü öna ka piö bela. Ma, l'g'ê tókâd a 'l Salumû, de fağa sö 'l  
Dom. Epör, ól Piö Ólt Siñûr... a l'istâ mia ña 'n tenda ña 'ntre kuater mür,  
i födês ña töc dór! “Ól cé!, a l'ê 'l so skrañ de re, e la tera ó' sgabelî sóta i so  
pé”: “Ma firî sö óter, magare, öna ka a mé, ó sedenô öna stansa per pó-  
sâ? Öi mia pötóst fac sö mé töt, e poa i oste ma?”, l'dis ól Prófêt, mia ira?  
Insóma: a fala kórta, ó krapû e surc a óter, e óter ke scec de l'Abrâm, abé-  
kê sa fi 'l vost bel taefî de sà, e de là küsî sö ög e órege: óter, kór de préda,  
semper dré a fağa resistensa a 'l cé! gösto kómpâñ d'i osc brae pader! Kua-  
ël ól prófêt ke i osc pader a i ă mia perseğuitâd, e? A i ă kópâc fo töc, finâ  
a 'l Góân: töc kei ke predisia ke l'riâa 'l mesia göst! E de kel, a la fi... v'ê tó-  
kâd a óter ké de Gerüsalem de deentâ ier i tradidûr e po i asasi! Kón töt  
kel k'î skóltâd de 'l cé!... e Lege, e kómandamênc e Prófêc... sul ke kesto



ké si stac bu de fa: kópâ ü Gesû Krist, e mandâ fo ü Baraba! –.

A sent töc kei laür ké... i sa maiâa 'l fideg de rabia e i skrikâa i déc là de-nâc a lü. Ma lü, pie de spéret del cél ardando sö a 'l vólt l'ã po ést la so gloria del Piö Ólt, e del Gesû là 'mpé a la so dréca, e l'g'ã dic amô isë a töc:

– A ede prope adês, êkóla... ól cél ispalankâd fo, kómpañ de 'l tendû del Dom istrepâd sö kel dé là... e 'l Gesû Krist là 'mpé unurâd imbanda a 'l Piö Ólt! –. Kesto perô l'éra trop delbû: e dókâ i sa stopâa fo i órege, i daa fo de gran vus, po töc insêm i ga s'é bôtâc adôs, a i ã pórtâd de fo de la pórtâ d'i müre, po i ã sótrâd viv a plok e préde. I ã muntunâd sö i so mantei, k'i ga daa 'mpas a 'l defâ, là deante a ü suen de Tars (mia in etâ de lapidâ) ke l'laórâa lë 'n sitâ a fa sö tendaçi, e ke l'istödiâa a sköla d'i farisë, intât ke l'istâa 'n ka d'öna so sórela spusada lë: tal Saul; e i ã po lapidâd ó' Stéen, ke 'ntat a l'prégâa, prima 'mpé, dopo in senöc, finakê l'g'ia us:

– Gesû Krist, càpem sö kón té! Siñûr Pader indêl cél, perdûnega a kesta! Po, l'è a mórt, per so könt de lü in pas kón Dio e kón töc.

Ma kei là i ga disia dré töc (e 'l Saul kón lur) “la ga sta isë mai bé!”.

E dókâ, pöl das, isto Saul l'ia magare a lü semô inkôntrâd prima, kuak volte in sitâ, de suenêt, poa 'l Gesû e i so, ó n'n'ia almên sentíd a di: perô i ia prope mia troâc simpateк, e l'g'era prope mia dispiasíd a sentí ke lü i l'ia po sa töld fo de 'l mónđ.

--- \* ---

## 8. OL VANGEL` A L'PART DE GERÛSALEM`

--- \* ---

L'è stac ól señâl: de kel dé lë, a g'é scopâd fo öna gran lota kón töc i mesi kóntra töc i so amîs del Gesû ke g'era là 'ndela kapitâl. Isë, lur, per iskampâ, i s'è spandíc fo per i kampañe dela Gödéa e dela Samaréa, fo ke i apóstói e ü kuak d'óter, k'i ê stac piö kóraçûs e nisü` i sa askâa a tókai, dopo 'l so parër del Gamatël; e samô 'ntat ke kuak bune persune d'i

nosc e poa d'i ótr'ebri e i piansia e i sótrâa 'l poer Istéen, kel Saul là l'éra aturen per i ka a capâ e pórtâ 'n presû kei isolâc k'i eñia séñac kómê eretek, so amîs del mórt, ó k'i bórlâa fo a parlâ 'mpó esaltâc de 'l Gesû.

Kei k'i éra skapâc, perô, indók'i 'ndaa i pórtâa sa fo la so buna nóa.

Ke 'n prâtika, l'é po stac kel a spüncai fo, mia k'i Apóstói i äbe söbet fac i alîs lur ó mandâd fo aposta ergü` a fa 'l misiunare... de deentâ “katolek” po fa deentâ “kréstiâ” töt ól mónð: k'i éra prope gran pók a pensâga, a kel... fin'a iura.

Ól Félëp 'l'apostól, presemppe, a l'parlâa de 'l Gesû là 'ndöna sitâ dela Samaréa, e tace i ga staa dré atênc e 'nteresâc, akâ per i so bei mirâkói ke l'ga faa sö: ke tace invasâc a i daa fo de mat per 'löltema ólta e i tur-nâa a señ, e paralitek e sop i guaria. Gran festa 'n sitâ, dókâ.

G'éra là a tal Simû, ke de tat tép a l'faa 'l mago, e l'faa restâ la sét kói so trök e magerée... po l'pasâa per grand om, ü tipo specâl, ke in tance i ga teñia a koñosel, e i pagâa per ótêñ vergöt, salüte e förtüna: e s'disia “kesto ké së, l'g'ã de la so banda la pótena del Siñûr!”.

Ma, kuank'i edia e i sentia 'l Félëp... adês l'éra ön'ótra, la sunada: i pasâa a la buna nóa e i sa faa a batesâ, omeñ po done. Anse: fin'akâ 'l Simû mago l'g'ã kredíd po l's'é fac batesâ, e l'restâa 'nkantâd d'i laûr ke söcedia aturen a 'l Félëp, e l'ga staa tekâd.

A la kapitâl i apóstói i ä saîd ke la Samaréa la ga daa skólt a 'l Félëp: e iura i g'ã mandâd itâ de rinförs ól Piéro e 'l Góân. Riâc itâ lur... i tri apóstói i ä préçâd per i kónvertic, de ótêñega ó' spéret del Gesû, ke i éra adóma batesâc, ma ñamô mia frank asé ñe ispirâc de predikâ poa lur e testimoñâ: e isé i ga metia sö lur i so ma sö 'l kó, a préçâ, e kei là i kambiaa. Ól Simû mago, a ed ke sóta i ma d'i apóstói la sét la sa tresfurmâa

...a l'g'ă ófríd dei sólc, per püdü 'mpará poa lü a faga isë a i persune kói so, de ma. E 'l Piéro l'g'ă respóndíd isë:

– In malura i to sólc kón té... ke t'ët kredíd ke s'pödês krómpâ e end isë ü regâl del Siñûr! A ta ga entret prope pernegöt, té, kóndü` laür isë: per-kê ta sét dópe deante a 'l Siñûr, e l'ê ké de ed. Kónvertéset dókâ, pentéset de la to förberéa e d'i to tráfeg kól diaól! –.

Ól Simû mago alura l'g'ă dic: – A, bé... fa negöt, vâ: ülie mia 'mbroiäv sö, mé. Prégî óter, ma senza maledím, impiasër, a: e mé 'ndóro per la mé strada, e óter per la osta, ne! –.

I apóstói, predikâd fo là 'n sitâ e fac del gran bé a streersâ fo tace país d'i samarità e a pórtaga la buna nöa, a i ê partíc amô per la kapitâl.

A 'l Félép, perô, g'ê kómparíd ön angel ke l'g'ă dic isë de capâ ön'ótra diresiü fo 'là per ól desêrt, de sóta de Gerüsalem, per indâ a Gasa: isë lü l'ê 'ndac itâ de là. A l'salta fo ü moro del'Áfrika, ü dela kórt dela regina 'nsó de là. L'éra eñîd insâ a la kapitâl d'i ebrë per i so afare, e poa per adorâ a 'l Dom, ke l'koñosia la Bibia e l'ga teñia (ma l'püdia mia deentâ ü de lur, kóm'a l'éra kónsâd, de om); difati, in karosa l'éra dré a les sö ól prófèt Isai. Ól Félép a l'ê stac ispirâd a mêtesga in banda a la karosa: e sentíd ke kel là l'lesia sö 'l Prófèt, a l'g'ă dómandâd se l'ga kapia po dét vergöt, de kel ke l'lesia sö. E kel là: – Èe... perô, ga ölerês gösto ké ergü` a dam öna ma, ke per mé i ê a töte nöitâ –. Isë, l'ă fac saltâ sö e sentâ só 'n banda 'l Félép. L'éra dré a les sö ke “l'ê stac pórtâd a 'l macêl kómpañ d'ü besôt, e kómpañ d'ü añelî möt kón kel k'i a tóns a l'derv ña bóka... G'ê stac ña rekoñosíd dirito de göst gödése, per kólmo de ergóña. Ki ke kónterâ piö sö ergóta de lü, dopo? Mórt lü... mórc töc, piö ña scec, ña neüc!”. Ól funsiunare dókâ, l'ga dómanda a 'l Félép impiasër de diga l'ê

dré a parlâ de κi, ól Prófèt, lě: parlael per lü, ó de ergü` d'óter, e? Alura, ól Félěp, de kel pas lě dela Bibia l'ga kōnta sō tōt, sura la buna nōa del Gesû. Po, sikóme ke i ã tróad de l'akua 'n banda a la via... ól funsiunare l'ga dómanda se l'pōl adiritüra ês batesâd, ó no. Fermâd ól birôc, dókâ, e saltâc só tōc du dét indel'akua, ól Félěp i a batesa, sóta i ôg del so servidûr sō la karosa, ke l'ga kapēs dét ña negōt.

I vé fo adês de l'akua... e 'l Félěp l'ê piō ña lě, kei là i a ed piō!

E 'l moro l'ê 'ndac per la so strada tōt kōntēt: ke prope lü, per grassia, l'ã pórtâd la buna nōa só là per l'Âfrika. Ól Félěp invéce, a l's'ê tróad de tōt'ótra banda... vers la diresiû de Ceseréa, 'ndókê l'ê po riâd là a predi-kâ fo amô, païs per païs, la buna nōa del Gesû.

--- \* ---

## 9. OL SAUL A L'KAMBIA LEANDA

--- \* ---

Ól Saul, intât, amô tōt esaltâd a difënd la Lege e 'l so Dom kōntra i eretek, a l'g'ã sirkâd a 'l kapo d'i préc ü dókümênt de ês autórisâd a pórtâ là 'n kadéne a la kapitâl tōc kei de kela brōta rasa de tradidûr lě ke l'avrês tróad là d'i so bande, po l'ê partíd... L'éra skuase isî a riâ là a Damâsk, indókê g'éra là ü bel ros de isdraelite ke i dipendia amô de 'l Kónsei-Sinédrío, kuando... i ã centrâd in pie kómpañ d'ü fōlmen a cél serë! Bórlâd só del so kaâl, dókâ, só 'n tera l'ã sentíd a òna us ke la ga disia isë “A té, Saul! Inkemanéra po isë tata rabbia kōntra de mé, té, e?”. Alura lü l'ga dómanda: – Ö... là! Ki sét κi, po... té ke ta ma parlet, e? –. E l'sa sent a respōnd: “Mé só prope kel Gesû, ke té ta ma fét isë tat de 'l mal! Lèa sō, adês, e và dét in sitâ: là, ta eñerâ dic kózê ta g'ět de fa kózê, dopo... se ta ga stét”. I so amîs del Saul i éra là sensa fiat, ke i sentia kómê òna us poa lur, ma ña i kapia ña i vedia nisü` aturen, fo ke lur e i kaâi! Leâd

sö, dókâ, e sirkâd de dervî fo bé i so ög... a l'ga edia ña piö, tat ke g'ê tókâd menâl là lur, a Damâsk, indóke l'ê stac là tri dé senza êdega, e l'vülia ña maiâ ña biv.

In sitâ g'éra là ü amîs del Siñûr, ól Anen: e ól Siñûr, alura, l'g'ã dic isê, 'n visiû, de 'nda là indela ka del Gûda sö la “via Lóngã” e de sirkâ ün om de Tars, tal Saul, ke l'sarês istac là a prérgã, e ke l'avrês dic isê de ĩ ést in visiû prope lü, l'Anen, indà de dét po, kói so ma metide sö i so ög, fãgei turnâ bei verc, de êdega amô. Però l'Anen: – A, kar a té, 'l mé Siñûr! Ô sentîd tance a parlâ mal asê de kel omen læ... e kuat ke l'ã fac patî i to amîs là a la kapitâl! Ke l'ê po a ké mandâd insâ d'i préc adóma per met in kadéne töc kei κ'i ta rekoñôs té! –. Ól Siñûr, però, l'ga dis isê de 'nda là alistês, ke, anse: prope kel om læ, i a capa 'ndi ma lü adês, per faga pórtâ fo 'l so Nom Sant ak a i pagã, e mia piö adóma ke a i so sccec de l'Abrâm e a i re del Isdraël: e po l'ga fa ed a l'Anen in preisiû kuat ke 'l Saul dopo l'avrês patîd, prope lü 'n véta, per ól so nom del Gesû.

Alura l'Anen l'ê po 'ndac là, l'ê 'ndac de dét, po l'g'ã dic isê, 'ntat ke l'ga metia sö i so ma sö i so ög a 'l Saul:

– Ó Saul, fradêl! L'ê 'l Siñûr ke l'ma manda ké de té, e kel Gesû ke l't'ê kómparîd fo per la via 'ntat ke ta riaet. A l'm'ã mandâd ké a turnâd la lüs d'i to ög, e a fat impienî sö 'l kör de la so lüs e de 'l so spéret! Prope... l'ê 'l Siñûr ke l't'ã mandâd ké de nóter, té: ma mia per pórtâm via 'n kadéne nóter, a... ma per deslberân fo d'i so kadéne piö tace amô 'n töt ól mónđ ...akâ kuankê 'n kadéne ta tókerâ finî poa té per ól so nom! –

I g'ê bórlade fo d'i ög kómpãñ de skaie de ergöt... e l'g'ã ést amô! Po, leâd sö, l'ê stac batesâd, l'ã maiâd vergöt, e l'ê turnâd in fórsa, kel sue-nôt ke po l'éra. L'ê stac là 'mpó a la largã, in kuak famea de fedéi skapa-

da via de Gerüsalêm insö` de là apröf` a 'l desêrt, ma kói so brae raîs indi Apôstói; po l'ê turnâd là a Damâsk kói so amîs del Gesû: e là l'predikâ samô 'ndei sale dótrina “ól Gesû l'ê ó' scet del Dio Siñûr!”. Kei k'i a sentia i restâa ñak isbalurdîc!, e i sa disia isê: – Ma, él mia prope lü ké kel ke 'nde kapitâl... a 'l faa 'l diaól a kuater kóntra kei k'i rekoñôs kel nom lě, e anse l'ê eñîd ké propiamenta per pórtágei là töc in kadéne a i kapi d'i préc? –. Lü... l'ga capâa göst dé per dé, e l'traa 'n turta i ebrê k'i staa là a Damâsk, a testimoñâga ke 'l Gesû l'éra ól mesia. Dopo kuak dé, i güdê i ña bel e decidíd de fal fo. A l'ê eñîd a saîl akâ lü, e, abekê kei là i teñês de ög töte i pórté dela sitâ, dé e noc, per capâl e kópâl... kóla skorta d'i so amîs a l'ê stac kalâd só d'i müre dét indöna sesta, e isê g'l'ã faca.

Indâc là a la kapitâl, l'istâa skóndîd a i so amîs de prima e l'sirkâa de ês dela kómbrîkóla dela nöitâ; perô i g'ña amô töc öna gran pura de 'st'e-saltâd a ön'ótra manéra, e i ga kredia prope mia ke l'éra ü amîs delbü...

Finakê l's'ê askâd ól Bârneba, a daga fidüca, l'sa l'ê trac dré kón lü, e g'l'ã fac koñôs a i apôstói: ke isê, po, ól Saul a l'g'ã köntâd sö töta la so storia de l'aparisiû sö la via, e de l'Anen, e ke l'ña sa predikâd fo 'n gir per Damâsk, tat ke g'ña tókâd iskapâ via de là. E isê, i ã po capâd in famea, ke lü l's'ê rinkörâd, e l'éra aturen per i piase a parlâ a so nom del Gesû. E l'tratâa pötöst kón kei de fo, k'i eñia de luntâ a 'l Dom per i feste ó per i so afare. Ma g'éra samô a là de kei k'i brigâa per töl fo dela circólasiû. E alura i so amîs i ã kómpañâd finâ a Ceseréa, po de là i ã 'mbarkâd per Tars. Ke isê, po, là 'nde kapitâl i g'ã üd grassia de 'mpó de pas amô; e poa là in Gödéa e Galeléa e Samaréa i laür i 'ndaa n'nac bé, e i kresia de nömer, indêl rispêt d'i so legi del Siñûr, töc kóntêc de 'l Gesû e kóla kónsólasiû del so sant isperet.

--- \* ---

## 10. PIERO FO IN MISIU` : MIRAKOI E PRIM PAGA DE BATESA

--- \* ---

Ól Piéro òna ólta l'è 'ndac là a tróâ kei de Lida, e l'ã tróâd là ü tal Enéa, paralisâd illêc (*in lèc*) samò de ot añ. E 'l Piéro l'ga dis isè:

– Skóltem mé, té, Enéa. Ól Gesù Krist a l'ta guarès: làa sò, e fà sò 'l to lec! –. E kel là... l'salta sò! A i ã ést bé tōc kei de Lida po de la pienüra de Sarón aturen, e tace i s'è a kónvertîc.

A Gafa, g'éra là òna Tabéta (nom ke l'völ di “bela e svelta”), ke la faa de 'l gran bé e tate lemôsine. Göst in kei dé lè la s'è malada po l'è a mórta. Alura i a laa só per sótrala, e 'ntat i a lasa sò de sura 'ndel so lec. Dato ke Lida l'è mia deluntâ e i ã sentîd ke g'è là 'l Piéro... i so amîs i manda là du a diga isè de eñ insâ per ól fōnerâl. Lü, l'lea sò po l'ga a dré. Riâd là, a i a pórtâ sò de sura, e g'éra là tate pôere êdóe k'i löcâa e i faa ed i estîc ke la g'ïa fac sò la Tabéta de ia. Ól Piéro alura l'manda de fo tōc, po l'sa 'ngünika só, e l'préga. Po l'ga dis isè a la mórta “Lèa sò, a té, Tabéta!” (ke l'ga sòmêa isè tat a kel ke l'g'ïa sentîd a diga sò 'l Gesù a la so scetela del Gaîr): e kela là la lea sò, la derv fo i ög, po la sa met a setú. A l'ga da òna ma a tras impè, po g'la presenta là amò ia a i so amîs!

A i ã po saîd tōta la sitâ, e isè tace amò i s'è kónvertîc.

Ól Piéro l's'è fermâd là a Gafa per impö de dé 'n ka d'ü Simû ke l'laó-râa 'l pelâm, e lü per ütâs e fas mia manteñ a öfo intât ke l'predikâa, l'gö-stâa sò òna куак réc kói peskadûr del post. In kei dé lè, a Ceseréa g'éra là ün om, tal Kórnéto, kómandânt del regimént “Itâliko”, om ónêst e timurâd del Dio, e poa tōc kei dela so ka. A l'faa asè de lemôsine, e l'pré-gâa semper. Ü dopólmesdè, indê so stansa l'ã ést in visiû ön angel, ke i ã camâd per nom, e lü l's'è a ü falí stremîd. L'angel a l'g'ã dic isè: – I to óra-siû e i to lemôsine i ê tōte ké, deante a 'l Dio Sant señade só e gradide. Té adês, perô, mànda 'là куак omeñ a Gafa, e fa eñ ké ü tal Simû, k'i ga

dis ól Piéero. L'ê là 'n ka d'un óter Simû ke l'kónsa pelâm in ria a 'l mar –.

Kuando ke l'angel l'ê partíd, lü l'cama du servidûr de ka e ü braôm de soldât d'i piö fidâc, a l'ga kônta sö töt e i a manda 'là.

A 'l dé dopo, kei là i ê 'n vias. Intât ól Piéero sö 'l mesdê l'va só per maiâ ergöt: e 'ntat k'i g'a paregá só ergöt... a l'va in êstese: a l'ved ól cél deêrt, e ü laûr istrâmb ke l'vé só, kómpañ de òna gran tóaia ke la é kalada só per i kuater kantû, e g'éra dét de töt i animai: a kuater samfe, e de kei ke strösia e rampa, e ósêi. E òna us la g'a dis isê “Tò, dókâ, Piéero: fà 'nda... po màia!”. Ma lü: – A no, kar a té. Ke mé õ ña mai maiâd negóta de prófâ e spörio! –. E amò la us “Kóm'a sa permetet kómê po, té, de camâ prófâ e skifûs... kel ke l'vé só de 'l cél e ke l'ta l'manda só 'l Töt Sant?”. E isê per bé tre ólte! Po, tóta kela roba là l'ê turnada sö 'n cél.

[Lasëm in banda ké ke “de prensépe” propiamenta g'a sarês ña stac imbisõñ de maiâs intrâ animai. Ma l'ê po 'ndaca isê; e ké l'völia di a d'óter.]

Intât ke 'l Piéero l'istâ là 'nterdêt sönkêl ke l'ã apéna ést, i ria sà i omeñ mandâc ilâ del Kórnelo, k'i s'éra 'nfirmâc indókê l'éra la ka del Simû kónsadûr de pei. I cama, e i dómanda se g'ê l'ê ól Simû Piéero. Ke, 'ntat, a l'sa sent a di 'n kôr “àda ke tri omeñ i ta sirka té: læa sö, àg'a 'nkóntra, e àg'a po dré a lur tri senza pura, ke 'ti õ mandâc insâ mé”.

Alura 'l Piéero l'ga a só 'nkóntra, l'ga dis isê ke l'ê lü kel k'i sirka, e l'ga dómanda kósê `ölei, po. E kei là i g'a kônta sö k'i ã mandâc insâ 'l so kómandânt Kórnelo, persuna ónesta e timurada de 'l Dio, ke töt i güdê i a pórtâ 'n palma de ma... e ke l'g'ã üd òna visiû, kól urden per fa eñ ilâ 'l Piéero a ka soa, e de skóltâl. Ól Piéero dókâ i a fa eñ de dét, e i a té (teñ) l'ê fin'a maiâ e dörmî; po, a la matina dopo l'lea sö e l'part insêm kón lur, e g'a a dré a kuak amis de Gafa. Ól dé dopo i ê riâc là a Ceseréa, ke 'l Kór-



néto i a spetâa, e l'ia trac insêm tîc i so de famea, po куак amîs fidâc. Kuando ke l'sa l'ved denâc, a l'ga sa 'ngünika só, deante a l'Piéro. Ma l'Piéro i a fa söbet leâ sö: – Sö dréc impě, tél! A só ün om poa mé kómpañ de té, mé! –. E tekâd butû 'n kónfidensa, l'ê 'ndac de dét e l'ã tróad dét ü muntû de sét. E l'g'ã dic sö isě:

– Óter a l'si, ke per ü güdê l'ê ña lecet de tekâ butû kón vergü` d'on'ótra religû, ña de ês amîs, ña de maiâ 'nsema. Perô mé, l'm'ê stac imparâd de l'Siñûr a camâ nisü “sensa Dio” e ña “spórkisü”. E difati kuankê m'ĩ camâd õ capâd in ka i osc mesağer po só a eñîd ké sensa próblêm. Üli dim vóter dókâ, adês, inkemanéra m'ĩ camâd ké, êkól? –.

Alura l'ã parlâd ól Kórnéto: – Tri dé fa prégae, sö l' mesdê ké 'n ka méa ...e l'ma kómparês ü tal töt vestîd sö de biank isplendênt, e l'ma dis isě ke l'Siñûr, L'Önek Ól Piö Ólt, a l'm'ã skóltâd e po esaüdîd, akâ per i lemôsine ke fó 'n so nom. E l'm'ã dic isě 'ndókê ta s'éret e de mandât a camâ, kómpañ ke õ po fac. Só bé kóntět asě, ke ta sét veñîd insâ. E adês, êkóla, a m's'ê po ké tîc denâc a l'Dio Siñûr, per iskóltâ töt kel ke lü l't'ã urdenâd isě de fam saí –. Alura ól Piéro:

– Inkö, ké, ma sa rende könt ke l'Siñûr a l'fa mia distinsiü de persune, ma l'té óntera oñü` ke l'g'ã l' so sant timûr e l'fa l' bé... in oñe banda del mónđ! Sě, ira: a l'g'ã mandâd só la so braa rielasiü a i so scec de l'Isdra-ël: ma g'l'ã daca a lur per tîc, ke lü l'ê l'Siñûr ól Dio de tîc. Buna. E óter ...ga l'si samô kel ke g'ê söcedîd là 'ntre Gödéa e Galeléa, dopo ól Góân ke l'batesâa dét indel Górdâ? Ól Dio Siñûr l'ã mandâd insâ ól Gesû de Nâsaret, e lü, fórt del so ólt isperet, l'ê pasâd ispertöt` a fa adóma ke de l'bé, a guarî i malâc e deslberâ fo i 'nvasâc, kóla so ma del Siñûr sura l' so kó. E nóter a m's'ê testimone, de öğ, de órege e poa de ma, de töt kel ke l'ã fac e l'm'ã fac fa ak a nóter in töt ól paîs e 'nde kapitâl. E m'ga sa a tîc,

nóter po óter, kós'i g'ă po fac, a la fi: a i ă kópâd fo, tekâd via sô 'ndu tok de leñ! Ma samô a 'l ters dé, ól Siñûr a i ă fac turnâ iv, e l'ă ülîd ke staólta a l'sa fes ved... mia piö de töc, ma adóma de kei ke l's'ia sirkâd fo lü: nóter ke m'ă maiâd e biîd amô 'nsem kón lü, prope... dopo ke l'éra mórt du dé prima! E a nóter a l'm'ă urdenâd isê de predikâ fo a la sét, e de testi-moñâ... ke prope lü l'ê fisâd de 'l Siñûr a ês kel ke `gödika 'ntre iv e mórc! Prope a lü la sa riferês la so parola d'i Prófêc, kuand κ'i dis isê ke töc kei κ'i ga krederâ a lü, indêl so nom i sarâ a perdunâc, po desliberâc fo per semper –. A l'éra dré amô a parlâ lü, ke töc kei κ'i a skóltâa i s'ê trôac investic de sant ispéret... e i ga daa a lodâ 'l Siñûr in tate parlade, κ'i éra ña 'mpó i so de lur, kómpañ d'i so amís del Gesû ól dé 'lla Pentekosta!

Kei κ'i éra eñic insâ de Gafa kól Piéro e i éra töc in rëgóla kóla so fatü-ra d'i masc ebré... a i ê prope restâc!, ke poa kei pagâ ké senza fatüra... i g'es söbet isê 'l regâl de l'ispéret imprómetîd de 'l Gesû a i so amís. Ma i fati i parlâ a car; e alura 'l Piéro l'ă dic isê:

– Ke impedimênc ga sarai, uramai, a batesâ kól'akua lur ké, dato ke kómpañ de nóter a i ă batesâc de spéret ól Siñûr de 'l cél, e? –.

Isê, i ă fac batesâ a kól'akua, indêl so nom del Gesû... ke isê l'ia rekó-mandâd per töc i so. E lur a i ă prérgâc de sta là kón lur amô 'mpó de dé.

--- \* ---

## 11. OL PIERO L'DA KÖNT – OL `BARNEBA E 'L PAOL

--- \* ---

I apóstói e i óter fedéi κ'i staa 'n Gódeá i ê po eñic a saî ke poa i pagâ i riseia buna nóa e sant ispéret e batês. Ma kuand ke 'l Piéro l'ê turnâd là a la kapitâl, a i ă sentide sô de tace, ak, κ'i tóntónâa perkê lü l'éra indac de dét in ka de pagâ e l'ia maiâd e biîd kón lur, prope lü, ól prim apóstól del Gesû, ól so “préda”! Alura 'l Piéro l'g'ă po köntâd sô per fil e per señ töt a póntî, la so visiû de lü a Gafa, e la isiû del Kórméto a Ceseréa, e i fa-

ti de kei là κ'í lodâa 'l Dio kói parole κ'í koñosia ñak... e ke, in fi d'i kõnc, prope 'l Gesû l'ïa bé dic d'ü batês de spéret, ke lü, 'l Piéro, l'ïa püdid adóma ke capân ato, kel dé là, in mes a i pagâ... kói stes efêc kómpañ ke l'ïa fac a sura de lur prima, là a Gerüsälêm: e dókâ ól batês de akua l'éra kómè du piö du fa kuater, senza ña d'ótre fatüre de mes! Ó ülei magare mètega sö lur i pónti sö i “i” a 'l Gesû, a, e a 'l Padreterno, e? Sikê, l'è po finida 'n glória e töc a lodâ 'l Siñûr ke isê l'ga da ase akâ a i pagâ de kónvertîs a 'l Dio del Gesû, e senza prima fai deentâ kónvertíc a i ebrè!

Tace, de kei skapâc iviâ dela kapitâl a la mórt de' Stéen, a i éra riâc iâ finâ 'n Fenéca, a Sipr e Antéôca: ma finadês i ïa predikâd fo la buna nõa adóma a sét samô dela so reliçû. Però kuakdû` de lur κ'í éra nasíc a Sipr e a Sirê, là a Antéôca i ga predikâa 'l Gesû e la so buna nõa ak a i Grék. Ól Siñûr, a s'ved, a l'éra kón lur: ke isê, tace i sa kónvertia a prope.

E la nõitâ l'è riada ak'a i óreçe de kei dela kapitâl, κ'í ã po mandâd iâ a ed la sitüasiû ól Bârneba (kel ke l'ïa pórtâd a ka ól Saul). E lü, riâd là, l'ã ést bé l'efêt dela grassia del Dio Sant sura kei là, e l'è stac bé kóntèt, po i a 'nvidâa töc a restaga fedéi a 'l Siñûr, oñû` kóla so bela kóstansa. L'éra a lü, difati, ü gran bunôm, pie de fidüca e sant ispéret e de kõr vert.

Isê, amô tace d'óter i ê pasâc de la so banda, de la banda del Gesû.

Lü, delê 'mpó, l'è partid per indâ là a Tars a sirkâ 'l Saul; ke adês l'avrês püdid fa la so part kói pagâ 'n tóta sigürêsa; e isê i ã pórtâd là göst a Antéôca, indókê per ün an intrêg i ã fac ü gran bel laórâ 'nsema, a tra sö õna bela famea nõmerusa e varia: e 'ndókê per la prima ólta i so fedéi del Gesû i ê stac camâc “i kréstiâ”, mia piö adóma “kei güdê là dela seta del Nasaré”: e de iura po, “ól Krist” a l'è stac depertöt` adóma “ól Gesû Krist, ól mesia de Nâsaret, mórt in krus, e 'ndac sö 'n cél amô iv”.

In kel tép là, i ê riâc là a Antéoca ergü` k'i prófetâa: e i predisia ispirâc (kómpanñ, presempe, d'ü Ağab) öna gran karestéa, itâ là per la regû del Gesû (ke l'ê po riada a röda, sóta ól Klaudio imperadûr rómâ). Alura töc i fedéi de Antéoca e paraçi, óñü` segönd i so mesi, i ã decidid de tra fo ergöt de skarsela e de mandagel itâ, per vütâ i fedéi de là; ke, 'ntra ergü` end fo töt, e 'ntra kei óter püdi mia tat laórâ ñe trafégâ liberamént in sitâ... i éra uramai sa dré a strens sö la sentüra a kól maiâ; e isê i ã po fac, e i ã spedid itâ kel k'i ã püdid, per so ma del Bârneba e del Saul, omeñ fidâc e pratek de vias.

--- \* ---

## 12. PRIMA PERSEKÜSIU`

--- \* ---

Inturen a kel tép là amô, pasâd apéna ü dés añ de la so mórt del Gesû, ól re Erôd de iura l'ã skómensâd a maltratâ i omeñ dela so famea del Gesû, là, 'ndela kapitâl. E l'ã fac mör de sbada 'l Gakóm, ól so fradêl del Góân, iscêl del Sebed.

L'ê po stac alura, ke s's'ê pensâd sö de mandâ via 'l Góân, ke l's'ê pór-tâd dré la so mader del Gesû, ansiana, ma amô 'n gamba.

A ed po ke la sunada la ga piasia a i güdê, ól Erôd a l'ã mandâd a capâ poa 'l Piéro. I éra i dé d'i pa sóta i feste p'Paskua. E brankâd, a i ã metid dét in presû kón kuater bei pikêc de kuater guardie a la ólta, per fal kómpari 'n tribünâl dopo i feste. Ókórerâl de dil, ke... 'ntat ke 'l Piéro l'éra 'n presû töc i so [no] i faa óter ke prérgâ 'l Siñûr per lü? Isê, la noc prima de iġa de kómpari 'n gödése denâc a la sét, ól Piéro l'dörmia, mia trop komod, ligâd sö kói kadéne 'n mes a du sóldâc, e i sentinele fo de 'l kancêl. Ma...g'ê riâd dét ön angel del céel, a l'g'ê 'ndac apröf, e de dét l'ê stac töt iscarid a dé. L'angel l'ã sgürlid sö 'l Piéro a la spala, i ã desdâd fo, e l'g'ã dic isê de leâ sö a la svelta: e g'ê bórldâd só d'i póls i so kadéne, senza ña desdâ fo kei óter là! A l'g'ã dic isê de tras insêm per partî, l'g'ã

fac met sö bé 'l so mantêl, po i ã trac dré. Ól Piéro l'ga 'ndaa dré, ma sen-  
 sa rendes könt delbû ke l'éra ira kel ke söcedia kól anjel: a l'sa 'nkredia  
 pötöst de ĭga öna visiû, ó de 'nsoñâs. Pasâc fo d'i du posc de guardia, i  
 s'ê trôac là a 'l kancêl: ke l's'ê po spalankâd fo persokönt'. E 'ndac de fo, i  
 ã fac ü tok de strada 'nsema, po l'anjel l'ê a skómparîd.

Ól Piéro, alura, l's'ê rendîd könt ke l'éra delbû töt vira, e ke 'l Siñûr l'ïa  
 prope mandâd só 'l so anjel a desliberâl fo de l'Erôd, e fa 'nda a mut i so  
 bröte oie d'i güdê. L'ê stac là ü mómentî a pensaga sö, po l's'ê 'nviâd ïhâ  
 a la so ka dela Maria, la so mader del Góanmârκ, indókê n'n'éra là tace  
 d'óter a prégâ per lü, amô a kel'ura de noc. L'ã pikâd sö 'l purtû... e g'ê  
 eñîd só öna serventa, la Roda, a sentî ki ke g'éra: l'ã koñosîd söbet la so  
 us del Piéro; ma, 'nvêce de derv fo... l'ê turnada sö de sura tötâ kóntéta a  
 digel a i óter: ke perô i g'ã dic isê se l'éra mata. E lé a daga, e lur “a l'sarâ  
 magare ün anjel eñîd insâ a dim vergöt per lü”. E 'l Piéro 'ntat là a pikâ,  
 kó 'mpó a de pura dela róna; finakê, a la finfî i s'ê po decidîc a próa a  
 derv fo... e isê i ã ést ke l'éra prope lü... e i ê ñak restâc isbalurdîc! G'ê po  
 tókâd a lü faga de gran señ kói ma per faga fa sito e desdâ fo nisû; ke  
 dopo de dét l'ã a püdid köntaga sö la so storia de anjel, kadéne e kan-  
 cêl. A l'g'ã dic isê de fagel saî bunura a 'l Gakómî e tóe i óter; ma per prö-  
 densa l's'ê mia fermâd là, ke 'l post l'éra koñosîd... e 'mpó de rumûr a i ĭa  
 po a sa fac: po, a riedîs per l'aniersare del Gesû resösität, a Paskua.

[Oñémanéra ke üli pensala óter, a mé isê i m'l'ã köntada sö: a 'l piö...  
 sóró dekórde ke spöl a pensâ a ü mesağêr misteriûs... de kuak gran ka-  
 po misteriûs... ke l'ã ülid desliberâ fo 'n segrêr l'apostól, a meso de kuak  
 urden misteriûs a i sóldâc: ma... edî bé a óter: a g'ê pör semper dét tat de  
 mirakulûs!]

A dé fac, i sóldâc i sa daa mia resû kósè l'püdia êsga söcedîd kósè a 'l  
 so presunêr: ke l'g'éra piö, ma lur i ĭa fac per bénî la so bela guardia [ó,

'n kaso, i éra stac dré a urdeñ söperiûr: mal per lur, ак a i magare capâd la so bela manca, a staga]! Ól Erôd, a i ã fac sirkâ a la svelta despertôt, ma senza tróâl: e l'ã fac met a kópela i guardie de tömo. Po, de la figûra, l'ê skapâd via a Ceseréa, a l's'ê skóndíd là per impö, e l'ê turnâd a la so braa pólitika. A l'éra 'mpeñâd in bega kón kei de Tir e Sidû, ke, àda po té, i g'ïa 'mbisôñ de krómpâ de maiâ prope de lü. Ma ü de la so kórt de lü a i ã fac ragunâ, kei là (de sigür` a l'g'ï sö 'l so pro!), e l'g'ã ófríd i so bu öfése per faga fa la pas.

Riâd ól dé dela ceremõña de pas, ól re l'g'ã parlâd a la sét, töt vestîd sö de sfars, e sentâd só 'n pómpa sö 'l so skrañ de re. E la sét, daga a usâ sö “Us de 'l cél, mia 'dóma us de om!” . Ma, mal ga n'ê po eñîd: ke lü l'ã fac aparî negöt, e l'g'ê a piásíd ól kömplimént: ma l'g'ê mia piásíd ól fals a 'l Siñûr; e isë, delë mia tat l'ê mórt d'ü kólp, dudes añ dopo 'l Gesû turnâd sö 'n cél; e i ã tróâd là töt maiâd dét d'i so erem. A l'éra stac ól so sio kel Erôd là deentâd amis del Pilât, e 'l so nóno kel óter, ke l'ïa ést a nas ól Gesû (Erôd könsömâd a lü d'i so brae erem kómpañ de 'l macelër d'i set fradei Makabé kóla so mader): bela rasa de re, negöt de di...

--- \* ---

### 13. I DU MISIUNARE A SIPR E A ANTEOCA

--- \* ---

Intât, la predikassiû la fiuria e la sa spandia fo semper de piö.

Ól Bârneba e 'l Saul, fac a pónti 'l so brao dóer kói ófêrte, kuand ke i é turnâc là a Antéoca i ã pórtâd dré poa 'l Ganmârk. Indela famea d'i fedéi de Antéoca, l'mankâa mia ña dei predikadûr, ña dei sapienc: g'éra là 'l Bârneba, 'l Simû [k'i ga disia] 'l Niger, ól Luco de Sirë, ól Manaem ke l'éra eñîd sö de scet insêm kól Erôd, ól Saul...: e dókâ, töt i servia 'l Siñûr kói prêdike, i fünsiû e i desû. Però, 'l Siñûr l'ã ispirâd töt a lasaga liber ól Bârneba e 'l Paól per ön'ótra misiû: ke isë, desünâd e prérgâd töt insêm,

i g'ã po metîd sô tîc i ma sô 'l kó a lur du, de kónsakrai e digã isê “óter si tîc nóter, e 'l Gesû 'l'va manda e 'l'va kómpaña”: po i ã i salüdâc.

E lur, partîc amoturna misiunare del Gesû kól so sant isperet, i ê 'ndac só a 'l pórt de Selêoca, e de là i s'ê 'mbarkâc per Sîpr. Pasâc fo per Salamina, kól Ganmârk a dağa öna ma, i predikâa 'ndei sale dótrina d'i gü-dê. E streersâd fo tötã 'l'isla 'n'fina a Paf, i ã tróâd là ü mago ke 'l'sa faa pasâ per prófêt ebré: tal Barġesü, ke 'l'éra 'nde mânega del góernadûr Serġo Paól, persuna 'nteligenta, ól rómâ. 'Stó góernadûr ké, dókâ, a 'l'manda a camâ 'l Bârneba e 'l Saul, ke 'l'vülia skóltai 'mpó a lü a parlâ del Siñûr. Ma 'stó mago, êkóla (in grék a 'l'sa camâa akâ Elimas), a 'l'sa met in mes e 'l'fa de töt per imbroiaga sô la facenda a 'l góernadûr. Alura 'l Saul (ke in ambiênt rómâ e grék i a camâa akâ 'l Paól, kóm'ô forsâk samô fac a mé), töt ispirâd, a 'l'fisa indei öġ istó mago là e 'l'ga dis isê: – A té scet del diaól, mia del Siñûr e po mén amô del Gesû: ta sét pie de 'mbroi e förberée, fo ke de eritâ: kuand'él ke 'l'la mókerèt fo de 'nturcaga sô i sentër a 'l Siñûr, té... e? Áda ké adês, té: per la ma del Siñûr, ke la ta seña... tète: ta stérèt a orb per impö de tép, ta ederét ñe la lüs del sul –. E kel là... 'l'isprefónnda dét indêl fósġ, e ġa tóka sirkâ ergü` k'i a mene 'n ġir per ma.

Isê po ke ól góernadûr, a ed kei laûr ké, 'l'ê stac piö sigür` de prima d'î tróâd la eritâ del Siñûr, e mia piö adóma i so söġ del mago orbâd.

Ól Paól kói so kómpân de vias i s'ê 'mbarkâc amô a Paf, e i ê 'ndac là a Perġe de Panféla; ma sensa 'l Ganmârk, ke 'l'ê turnâd indré a Gerusalêm [e 'l'sê po metîd dré a met so niġer sô bianġ i storie del Piero e d'i dudes kól Gesû; kómpân ke ké óter lesî sô piö tat kel ke s'sa sa de 'l Paól...].

Lur, partîc poa de Perġe, a i ã streersâd fo, e i ê riâc là a kel'ótra Antéoca. Là, a 'l sabat, i ê 'ndac dét indê sala de dótrina, e i s'ê sentâc só. E

dopo lesîd sô la so Bibia, i kapi de là i g'ă dómândâd a ergÿ de lur i nöi-tâ dela kapitâl, e de faga po sô ü falî de prêdika a kei ke g'éra là.

A l'varsa sô la ma l' Paól, e l'lea sô lü a diga sô isê:

– Óter sêt de l'Isdraël... e óter de ké timurâc de Dio: a m'va saltüda de kör... nóter ke m'ria de luntâ. Adês, iskultim bé. Ól Dio Grand de l'Isdraël a l'ă sirkâd fo de preferensa i nosc patriârk, ke isê l's'ê trac impê öna sêt unurada là 'ndel Gito, po a so tép kón tace mirâkói i ă pórtâc iviâ de kel paîs là, per istaga dré ü kuarantâñ, fo 'ndel desêrt, e dopo daga a lur tötâ la regû de set trebÿ d'i Kananê, ke g'i ă fac vens in gÿera. Per ü kuatersensin(t)kuantâñ a i ê deentâc e restâc padrû de tötâ la regû. A i ê stac góernâc d'i so sapiênc, finâ a l' prófêt Samüël. Dopo, i ă ülid ü re, e l'g'ă dac ól Saul scet de Sis, dela trebÿ del Beñamî, per ü kuarantâñ. E dopo de lü ke l'faa mia piö gödése l'g'ă metîd sô un óter re piö fedël, ól re David, scet del Giês, po l'g'ă dac ato ke l'ê stac ü gran brao re. De kei k'i ê nasîc de l' re David... ól Siñûr, kómè l'ia po 'mprómetîd de tat, l'ă trac fo ü... per salvâ amô la sêt de l'Isdraël: l'ă trac fo l' Gesû de Nâsaret, nasîd a Betlêm isê kóm'a g'ê skrîid só dét indê Bibia. E söbet prima de lü, prope amô isê kómpañ ke la dis la Bibia, g'ê stac ü, a preparaga la so strada: ól Góân, ke l'predikâa fo ü batês de penitensa a tötâ la sêt de l'Isdraël. E l'disia isê, lü, 'ntat ke l'predikâa e l'batesâa: “A só mia mé, ne, kel ke spetí, kel ke l'g'ă de eñ: ma perô l'ê bel e ké a lü, e poa mé ga base sô i so pé”. Buna. Óter fradei, scec de l'Abrâm kómpañ de mé, e óter ké timurâc de Dio, êkóla: l'ê a töt nóter ke ma é dac kela buna nöa ké, per vês salvâc! Difati, kei k'i sta là a Gerüsalem kón töt i so kapi i s'ê refüdâc de kapi e de krêdega a i órâkói d'i Prófês, k'i a les sô sabat dopo sabat: e isê i ă po fac deentâ eritâ de 'nkö, kól rekoñosel mia e firmaga la so kón-



dana a mórt! A i ã tróad ü góernadûr rómâ, 'l Pélât, ke... per fai kóntęc a l'g'ã mandâd a mör ü, sensa tróaga negöť ña per iga de fröstâl! Isě, kôm-pîd töt kel ke g'éra skrîid só k'i g'ãvrês fac, a i ã trac só de la so krus, po i ã metîd dét indöna büsa. Ma lü l'g'ê mia stac dét tat: ól Siñûr a i ã resösîtâd e lü l'g'ê kómparîd amô per tace dé a i so amîs k'i éra eñic sö de la Galeléa a la kapitâl dré a lü, ke i ã a maiâd amô kón lü dopo mórt, e adês i ê testimone per lü in mes a la sét. E nóter ké 'nkö, еко, a m'va pórtâ ké a kó ólt istâ buna nöa ак a óter, dókâ: ke ól nost Dio Grand a l'mantêñ kón nóter kel ke l'g'ia 'mprómetîd a i nosc pader, kól fa turnâ iv ól Gesû, kómpañ ke l'dis ól salm du ke m'ã apéna lesîd sö: “Té ta sé per mé kómpañ d'ü scet, e mé 'nkö ta fó nas kómê 'l mé prim iscêť de mé!”. Per la resöresiû 'n partikólâr, po, g'ê skric só amô “Va dórö a óter, kel ke g'ö imprómetîd a 'l re David”, po ак “ta permeterêt mia, Siñûr, ke l'de-ente pólver kel ke t'ět sirkâd fo töt per tél!”. Alura, dókâ: ól re David, faca la so part de ólontâ de Dio 'ndel so tép, a l's'é po 'ndórméntâd a lü, l'ê stac sótrâd, l'ê deentâd pólver kói so pader e i pader d'i so pader, e la so tómba l'ê amô ké, unurada. Ma tróerî mia 'n nigalög` la pólver, invéce... de kel ke 'l Dio Sant a l'ã ülíđ resösîtâ de mórt! A i ê 'ndac là a la so tómba, e i ã tróad là i fase po 'l lensöl': ma lü, i ã mia tróad! E 'nvéce i ã ést lü 'mpé 'ntrég e i a maiâd kón lü; e prim de turnâ sö 'n cêl a i ã spedîc fo per töt ól mónd e l'g'ã 'mprómetîd e söbet dopo mandâd só ól so sant ispéret: isě kómê m's'ê ké a nóter, per so grassia, a pórtâv ké a so nom perdû e liberasiû. Töt kel ke finadês, adóma kói so legi del Mósê, g'ï mia riâd a ótêñ... óter krediga a 'l Gesû, e g'l'i 'ndei ma, ké adês, kón nóter! E stî atênc ke l'deente mia ira per vóter kel k'i ã dic i Prófęc: adî bé, de ês mia óter i spergür, ó se no ke l'óvra del Siñûr in mes a óter la pase via isě,

sensa ke sa rinkórsêgev, e s'i v'la kônta sô ga kredi ñak: e isê va tókerâ restâ de sas e teâc fo, dopo, kuand ke l'sarâ trop tarde e l'gödése fisâd! –

E kei là i g'ã dómandâd de eñ là amô a parlâ de kei laúr là poa sabat ke é. E, dopo la reüñû, tace d'i güdê e de kei del post k'i adorâa 'l Siñûr poa lur, i ã kómpañâd fo 'l Paól e 'l Bârneba, ki g'ã parlâd insêm amô 'mpó e i ã sprunâc a ês fedéi e a perd mia l'ókasiû de kónvertís a 'l Gesû.

A 'l sabat dopo, mesa sitâ l'éra là per iskóltâ i du gran predikadûr fórestêr: e s'kóntâa sô a ke poa 'l Paól l'ïa ést ól Gesû, tace añ dopo resösität. I güdê, lur, a ed ü laúr del g'ener, a i ê stac g'elús, po i s'ê metîc dré a daga de 'l fals a 'l Paól: e, senza rinkórses, i bestemiâa ak... óter ke brae ésdraelite! Alura 'l Paól e 'l Bârneba, pórtâd impö pasiensa, i s'ê po askâc a parlagâ car del töt, senza piö tate cerémoñe: – L'éra g'öst e obligatore de pórtâv la buna nöa del Siñûr prim de töc a óter, ké. Ma se óter la spü-dî fo, e ga spüdi sura 'n'fina a la éta senza fi ke va é ófrida... alura, êkóla, nóter m'indará là d'i pagâ, a ófrígela! Ól Siñûr a 'l'ma urdéna isê, difati: lü 'n persuna l'ã metîd sô 'l Gesû sô 'l lösernare, per faga car a töc e permêtega a töc de salvâs... de sà e de là del mar, d'i muc po del desêrt! –

I pagâ ónêsc ke i a skóltâa i püdia adóma ke ês kóntêc e benedî la so parola del Siñûr; e kei ke 'l Siñûr l'ã ülid i s'ê adiritúra kónvertîc söbet là sô 'l post. Skónseguensa, la buna nöa la sa spandia fo 'n tóta la regû.

Ma kei piö 'nvidiûs intrâ i güdê... a i ã móntâd kóntra i du fórestêr agjitatadûr i ssiure kóstomade insêm a i kapi del post: ke isê i ã minacâd de bröt ól Paól e 'l Bârneba, ke, dókâ, g'ã tókâd iskapâ via de là: e lur du i ã fac óter ke sbat so la pólvêr d'i so sândai a so malprô de lur là, i “dür e pür”... po i s'ê pórtâc itâ a Êkôñ: i lasâa semô 'ndré, perô, tata buna sét kóntéta de i koñosîd ól Gesû e de ïga kredið.

## 14. A EKÕÑ` E LESTRA, PO AMO` A ANTEOCA

--- \* ---

Poa là a Êkõñ, a i ã ülid indâ de dét amô òna ólta 'ndöna saladótrina d'i güdë: e i g'ã parlâd isë bé ke in tance, 'ntra güdë e grék, i s'ê a kónvertic a l'ato. Ma poa là, i 'nvidiûs e kei trop ligâc a la tradissiû i ã món-tâd sô i pagâ e i ã metíc kóntra kei d'i nôiât skômóde, kóntra “kei bröc eretek là”, 'nsóma. Kón töt, ól Paól e l Bârneba i s'ê fermâc là alistês ü bel tok, e i parlâa sensa pura, e l Siñûr a l'rebatia i so diskörs de lur kón tace mirâkói per so ma de lur; e isë, la sitâ la s'ê spartida sô in do fasiû: de sâ kei ke staa kói güdë a la ega, de là kei ke ga teñia a i apóstói. Ma, eñic a saî ke kei óter i s'éra uramai müic kói kapi per capai e faga de l mal e sótrai a plokade, i nosc du i s'ê metíc a l sigür` indeki (in kele) ótre sitâ dela Lékaõña, a Léstra, a Derb, e là 'n gír.

E, natürâl, poa là i predikâa fo l vanğěl (ke l'völ po di: la buna nõa del Siñûr ke l'ã mandâd ké l Gesû).

A Léstra, g'éra ün om ke l'istâa mia 'mpé, tat ke l'éra nasîd istört: l'istâa semper là sentâd só, l'ia mai fac ña ü pas in véta! Ól Paól a l'ga arda bé 'ndei ög, a l'tróa ke l'g'ã oia e fidüca d'ês guaríd, e l'ga dis isë a ólta us là 'ndelmês a töc: – Lèa sô 'mpé sô i to pé, té! –.

E kel là, sensa magare kapiga dét prope bé töte i so parole del fórestër, ma benóne i so intensiû e i señ d'i ma... l'ê leâd sô 'mpé sô i so du pé, po l's'ê 'nviâd là a kaminâ!

La sét aturen, a ed kel ke l'ia fac ól Paól, i s'ê metíc dré a usâ sô in dia-lêt “Óë: g'ê eñid só ké 'ntra de nóter du del cél... impersonâc!” e i ga disia “ól Gov” a l Bârneba, a edel kóla so barba e stadüra, e “ól Merkür” a l Paól, per la so lapa, a sentel. (A própóset, a: Paól, in rómâ a l'völ di “pukí”: e l nost a l'éra “pukí” delbû, a kónfrónt kóla so stasa del Bârneba; po, g'éra a ergü` kí ülia ke l'restês prope a “ü pikulí” a frónt del “Si-

mû-la-preda”; perô pôl das ke l'g'ãbe sôgâd det akâ la sômeansa “Pâulus-Sâulus”). E, dôkâ, ôl so prêt de lur là, dela césa del Gov ke g'éra là a la pórtâ dela sitâ, a l'ã pórtâd là dei torei tîc bei ingirlandâc sô, de faga ü sakrefése kón tôta la sét.

Kuand ke i ã kapîd a l'söcedia kôsê, ôl Paól e l' Bârneba i s'ê strasâc sô i estîc per ó' skandól, po... là indelmês a la sét i usâa sô isê: – Kôsê ma fi 'nsem kôsê, po, a óter, e? Edî mia ke m's'ê a nóter du omeñ kómpañ de óter, kóla bóka e kól kül kómpañ de óter? A m's'ê ké a predikâ... mia de fam festa a nóter, ó de faga la festa a i tor: ma de kónvertîs po de 'sté pastoie ké de altarî e sakrefése a vâsvera... de kónvertîs a l' Dio Grand e Iv, ke l'ã fac sô cél e tera e mar e muc e töt kel ke g'ê sura e sóta, e dedêt e defô! Finankô... l'ã sópórtâd ke oñe sét la 'ndes per i so strade de sà e de là, dré a îdói e altarî d'oñe sórt: ma l'éra semper lü a próa a fas koñôs, a fa de l' bé kói stagû e tîc i so fröc, e l'akua de biv e l' maiâ e la festa del kôr ónêst –. Ma, kel dé læ magare (ólóntâ del cél), ôl so parlâ grék l'éra mia tat precîs, a s'ved: perkê, kómpiö` ke lur du i parlâa... méno i gâ riâa a skiâ de ófrîngel a lur du, 'stó sakrefése!

Áda té: g'él mia riâd là 'n tép ü куак güdê de Antéoca e de Ékôñ... ke i ã ultâd l'ümûr dela sét, a i ã pórtâd fo d'i müre l' Paól, e só a sótrâl de plok: po, i sa 'nkredia ke l'éra mórt! Indâc iviâ i skalmanâc, kuand ke l' Bârneba e i amîs i gâ s'ê fac aturen, lü l'ê leâd sô (l'éra 'mpó prest perô, per “resüsità”) po kón lur a l'ê tumâd dét in sitâ, töt pestâd sô e biñokêt; e a l' dé dopo, kól Bârneba l'ê partîd per Derb. Dopo, i ã vangélisâd sô a kela sitâ là e trac insêm ü bel nômer de fedéi, po i ê turnâc indrê a Léstra a Ékôñ e a Antéoca, indókê i g'ã fac kóraço a i fedéi per vês kóstânc indela fidüca, perkê l'ê 'n mes a tate trebülasîü ke m'g'ã de pasâ per indâ

dét indêl so reñ del Siñûr kól Gesû Krist. Per lur, in oñe sito de famêe de fedéi i ã sirkâd fo e benedîd kuak ansiâ e, dopo prérgâd e desünâd insêm, i a rekómandâa töc a kel Siñûr ke i ãa trac insêm a krêdega a lü e a spetâl.

Istreersâd fo la Pésédia e la Panféta e predikâd fo amó a là a Perg, i ê 'ndac só a Taléa, po de là i ã capâd ól mar per l'Antéoca de 'ndókè i éra partíc, rekómandâc a la grassia del Siñûr per la so misiû ke l'g'ãa afidâd.

Riâc là, dókâ, i g'ã köntâd sö a töc töc i bei laûr ke 'l Siñûr l'ãa fac per so meso de lur, e kómekê isê i g'ãa dervîd fo a tace pagâ i ög e i póрте del reñ. E i ê po stac là ü bel tok kón kei fedéi là.

--- \* ---

## 15. TAETI` O MIA – REÜÑU` E CIRKOLAR` DI APÔSTOI

--- \* ---

A g'n'éra là ergü`, eñíc insâ dela Gödéa, k'i ga disia isê a i fedéi masc mia ebrê “se sa fi mia fa la fatüra de kei del Isdraël kóm'a l'ã dic ól Mó-sê, óter püdí mia salvâs!”. Ól Paól e 'l Bârneba i ê mia stac de kórde: isê ...a n'n'ê po eñîd fo öna menada piö finida, e ruñusa asê, kón kei là.

Alura i ã fisâd, töc de kórde, ke 'l Paól e 'l Bârneba e ü kuak de kei óter i 'ndes ilâ a la kapitâl, per tra a kó sta bröta facenda. E dókâ, mandâc ilâ a nom de töc, i ã streersâd fo Fenéca e Samaréa, e a kei k'i 'nkóntrâa i ga köntâa sö d'i pagâ kónvertíc, e töc i n'n'éra po ñak kóntéc asê!

Riâc là a Gerüsalem i ê stac i bé(nve)ñíc per i apôstói e i ansiâ de là, e i g'ã köntâd sö po a lur kel ke ól Siñûr l'ãa fac in gir per ól mónđ, per so meso de lur e kóla so grassia de Lü. Sura kela facenda là però g'ê saltâd sö dei farisê kónvertíc a di “merâ ke poa i pagâ i pase per i so legi del Mó-sê; e dókâ per i masc... fatüra”. E isê, la bala l'ê staca pasada a i apôstói e a i ansiâ, per indâ a fónđ e decidí po ergöt öna ólta per töte.

Desküssiû n'n'ê stace asê, finakê 'l Piéro l'ê leâd sö lü 'mpé a di isê:

– Amîs: l'ê bé uramai dei añ... ke töc vóter a l'si ke l'm'ê tókâd ak a mé òna ólta de skóltâ dei pagâ ónêsc, e pórtaga la buna nõa a nom del Gesû... k'í s'ê poa söbet kónvertic óntéra. E l'si samô a ke söbet ól Dio Sant, ke l'ved dét indêl kôr, a i ã capâc óntéra, e i g'ã üd (íd) a söbet la fórsa del so spéret, prope kómpañ de nóter a la Pentekosta del Gesû resösität. A l'völ di, mé dige, ke g'ê po mia stac fac diferensa per ü taetî, 'ntra nóter sê e lur no: ma, de 'l cêl a l'g'ã 'ntaiâd dét lü 'l kôr, a so mesüra! E adês ké ergü de nóter a l'völerês impuniga sö 'l gob a lur ü fardêl de legi, ke... ña nóter po ña i nosc pader a m's'ê mai stac bu de pórtâ a bu fi, se l'éra mia per ól Gesû, ke l'm'ã fac ved e kapî ke l'ê ó' spéret a salvâ e a liberâ... e mia ól liber d'i preskrisiû “a per a”...? Él mia amô ó' stes Gesû, a salvai, kómê l'm'ã salvâd nóter senza fam prima deentâ töc farisê óservânc, e? E dókâ, de adês ké a 'nda 'nnac, e per ól tép ke ma resta, kí ke l'ê mia nasíd güdê l'ê mai piö óbligâd a fas ü tai... ñe de barba, ñe de kiei e cêtera, per vês koñosíd d'i so pégre del Siñur, dré a' spéret del Gesû nost kapo ke i a sirka fo lü ké 'n mez a oñe sét del mónđ –.

Po l'g'ã dac amô la parola a 'l Paól e a 'l Bârneba, intât ke töc i refletia per bénî: e mè rékoñôs ke i fati i pendia per lur du e i kuadrâa kóla storia del Piéro. Dopo 'l Paól e 'l Bârneba, l'ã parlâd ól Gakóm küsî del Gesû, ke l'éra po lü dopo 'l Piéro, de kei restâc là a la kapitâl, e l'g'ã dic isê:

– Skóltim ak a mé, amîs. Cêrtósa, l'sarês bel ke 'l Gesû l'm'es dic lü òna parola cara sönkêl laûr ké: e 'nvêce negóta: ñe l'g'ã mai sirkâd a nisü 'l so taetî, per mirakólâl! Ól Simû l'ã kóntâd sö po l'm'ã fac ved ke de presépe ól Siñur a l's'ê sirkâd fo de mes a 'l mónđ òna sét, de señala kól so nom, e iĝen a kôr ól destî: kel k'í ã dic i Prófêc “e dopo turnerö só, e tirerö 'mpé amô la so tenda del David ke l'éra bórlada só; tirerö 'n pé amô

i so rüine, piö bel de prima: ke isè i vede poa töc i óter, e i sirke 'l Siñûr... töc kei κ'í ã sentíd a nōminâ ól mé nom!". Parola del Siñûr, a, ke fa kei laûr ké dic sō sent e sent'añ indrë. E alura, dókâ, poa mé krede, εκόλ, ke ga sée mia prope 'mbisōñ de traga 'mpé dei fastöde 'n piö... a i brae pagâ ke sa kónvertès! Sè cêrtōsa: negōt a ke fa kói îdói, kói porkade, e se mai kóla karne d'i animai sófegâc po ña kól sang de animâl: κ'í pöl iskan dalisâ e sluntanâm i nosc ke g'ê fo 'n gir per töt ól mónđ, e l'ê mia 'l kazo de fa kambia la Biblia κ'í les sō amô! –.

A la fi de töt, g'ê parîđ gōst a i apōstói e a i ansiâ, kól parër de töc i fedéi dela kapitâl, de sirká fo ergü` de lur per mandâgei 'là a Antéoca kól Paól e kól Bârneba: e g'ê tókâd a 'l Gûda Barsaba e a 'l Séla, omeñ de prima repütasiû là 'n mes a töc. I g'ã dac dré òna letra de pórtâ 'là, ke la disia isè: "I apōstói e i ansiâ de Gerüsalmê i salüda karamêt i fedéi de Antéoca, in partikólâr kei ke prima i éra pagâ. Sikóme ke m's'ê eñic a saî ke ergü` de nóter fedéi ebrë a i ê eñic lë a skónfóndev sō kón diskōrs impō stramb per vóter, senza nisü` urden ña permês de nóter ké, êkóla; alura ké m'ã decidíd töc de kórde de mandâv insâ ergü` fidât d'i nosc, insêm a i osc presiûs Bârneba e Paól: lur, ke i ã metíd in sög tōta la so éta per ól nom del Gesû Krist ól nost kapo. A m'v'ã mandâd ilâ, dókâ, ól Gûda e 'l Séla, e lur a us i va digêrâ amô prope kei laûr ké, e ke kól so spéret del Gesû nóter m'ã decidíd de kargâv mia adôs dei pis in piö `inötei, fo ke ü pér de laûr necesare: ke l'sarês po ke adóma de maia mia roba sakrifika da a îdói, karne de animai sófegâc, e sang; e de trateñis de fa dei ac fo de l'amûr urdenâd dela famea. A firî bé dókâ, êkóla, a lasâ sta de fa kei laûr ké. Po stîm bé töc, in grassia e salüte!". Kei là, salüdâd, i ê 'ndac ilâ a Antéoca, e trac insêm i fedéi i g'ã lesîd sō la letra, ke kei là i n'n'ê stac po kóntéc asè! E dopo ól Gûda e 'l Séla, κ'í éra gran predikadûr poa

lur, kón dei gran diskòrs i g'ă fac kóraĝo, po i g'ă dac amô tate bune resû per restâ fedéi. I s'ê fermâc là 'mpó, e dopo i ă lasâc turnâ a κα, e i g'ă dic isě de salüdaga töc, e 'ngüraĝa la pas a kei κ'î ĩa mandâc insâ.

I partia perô akâ 'l Paól e 'l Bârneba, per indâ là a tróâ amô ôna ólta i fedéi ke g'éra là 'ndei sitâ 'ndók'î ĩa samô predikâd fo prima, e i 'ndaa là a ed kómê κ'î staa. Ól Bârneba l'vülia tö dré amô 'l Ganmârκ; ma ól Paól l'éra mia dekórde, perکہ lü là i ĩa pientâc là samô ôna ólta a mes ól vias, e l'ĩa po mia predikâd tat (a l'vülia skriv, pötöst, lü): e isě a i ă a tekâd bé-ĝa! De manéra, po, ke 'l Bârneba kól Mark lü l's'ê 'mbarkâd per Sivr, e 'l Paól invéce l'ă sirkâd fo 'l Séla, po l'é partid per la Séria e la Séléca.

I fedéi de Antéoca i ă salüdâc po rekómandâc tat a 'l Siñúr.

E lur, misiunare amô, i 'ndaa 'n ĝir a tróâ e faĝa fórsa a töc i fedéi d'î si-tâ κ'î streersâa fo.

--- \* ---

## 16. OL PAOL PERSOKÖNT` INDELA MACEDOÑA — IN PRESU` LA PRIMA OLTA

--- \* ---

Ól Paól a l'é turnâd là a Derb e po a Léstra. E là l'ă tróâd là ü feděl, ól Témôt, scet de mader ebréa feděl a 'l Gesû, ma de pader grék, ke töc i ĝa ülia ü gran bé tat là a Léstra kuat ilâ là a Ékôñ. Ól Paól l'ă ülid töl dré poa lü 'ndel so vias; ma perô l'g'ă fac akâ fa la so fatüra d'î masc ebrë. [K'î äbe po ülída 'l Témôt in persuna ó la so mader e i óter fedéi ebrë de là, a l'resta amô 'mpó ü mistër a 'nkö ke 'l Paól a i äbbie permetíd (ó adiritüra ülid lü?), dopo la reüñû de Gerüsâlêm e 'ntat ke l'pórtâa 'n ĝir béapónto i so decisiû d'î apóstói e d'î ansiâ de là, per fale óservâ. Però dopo presempe l'ă mia fac fatürâ 'l Tito, ke l'éra mia scet de ebrë, ñe l'parlâa mai in salédutrina, lü.]

Sitâ per sitâ, i ê pasâc fo a kónfermâ i famèe de fedéi, a tran insêm de



nöe poa 'ndela Fréga e 'nde Galasia; ma i ê stac ispirâc a tókâ ñamô mia l'Asia. Töcimanére, poa là i spontâa semô famée fedéi, per kûra d'ótr'apóstói, però ligade pötöst a pretênd de sta amô tekade a 'l Dom e a 'l so destí gluriûs de la so set de l'Isdraël; ma poa ergöne a mescâs sö 'mpó, 'nvece, 'nfina a куак “mistër”, “magerée” e “filosófée” de l'óriënt.

Riâc itâ a i kónfi dela Mésia, i ülia próa a pasâ de là 'n Bétéña: ma per ü ó per l'óter in Bétéña i e mia pasâc. Alura i ê 'ndac itâ 'nde Trôada.

Kela noc là, ól Paól a l'g'ã üd öna visiû: ön om dela Macedoña i a pré-gâa de pasâ de là söbet de lur. Isë, i ê po partíc per la Macedoña, sigür ke 'l Siñûr i a camâa là, per predikâ fo ól vangël. Imbarkâc là a Troad, i s'ê pórtâc itâ invêrs a Samótrasa, e 'l dé dopo via per Neapól. Po, de là i s'ê spostâc a Félépe, koloña d'i rómâ e kapitâl dela Macedoña, e i ê stac là per impö de dé. A 'l sabat, i ê 'ndac fo d'i müre, dré a ü sere, 'ndókê i ia sentíd a di κ'í sa tróaa dela sét d'i ebrë a pré-gâ (ma i éra mia tace asë de permetes öna saladutrina in sitâ, là). I s'ê sentâc só là 'n mes a lur, κ'í éra po öna kómpania de skuase töte done, e i g'ã fac prédika.

Öna tal Lédia, ke la endia stofe per i ssior e l'éra de Tiatéra, dona buna e religusa, a i a skóltâa prope óntéra: e la g'ã üd grassia de kapî söbet bé kel ke l'disia 'l Paól, e la s'ê faca batesâ kón kei ke la g'ia dré d'i so de ka. Po l'ã a ülid invidâ là a ka soa i predikadür, ke i ã skuase a öbligâc... per mia ófendila. Per куак dé, a l'urare ke i 'ndaa fo a pré-gâ, i 'nkóntrâa öna serventa ke la g'ia 'mpó de la strôlega e isë la ga faa guadeñâ dei sólc a i so padrû, a da fo i so brae óràkói. Kuand ke la edia lur a pasâ fo, la ga 'ndaa dré e la ga disia isë a la sét “Kei omeñ ké i ê servidür del Piö Ólt indêl cél e i va fa ed lur kómê salvâs!”. Ól Paól, però, n'n'éra a pötöst pe-câd, e ü dé l'g'ã fac, lü: – A té, spéret ke ta parlet in kela fómna ké: mé ta

urdene, 'ndel so nom del Gesû Krist... de 'nda via de lé -. E isë l'ê po stac (e dókâ l'völ di ke l'éra mia ól Gesû 'n persuna... a parlâ in kela là).

Ma staólta, kóntec a i éra ña 'mpó i so padrù de lé, a ed a sekâ fo isë la so fóntana de kuatrî: e isë i ä capâd ól Paól e 'l Séla, po i ä sbatic là 'ndela piasa del markât denâc a i kapi e i ä denüncâc: – Kei du ké e i so amîs i ma reulta suersöt töta la sitâ. A i ê güdë, e i prêdika dei laûr... ke nóter grék e rómâ a m'pöl ña skóltâ ña fa... se m'völ mia tradi! –.

Alura la sét la g'ă dac kóntra, e i kapi i ä fac kaâ fo e i ä fac bastunâ sö, po i ä metîc dét in presû e i g'ă kómandâd a 'l guardiâ de faga fa bé la so guardia. Lü là dré a i urdeñ i ä kasâc só 'n fónđ infóna a la presû, e l'g'ă ligâd i pé a i kadéne a mür. Aturen a la mesanóc ól Paól e 'l Séla i éra dré amô a kantâ e préğâ, e i so kómpañ a i a sentia bé. Töt indü bot, a g'ê stac ü teremôt issë fórt... de fa balâ i fónđaméc de töta la presû: i s'ê dervide fo d'ü kólp töte i pórtē... e i s'ê destekade via töte i kadéne d'i nosc presunër! Ól kapo guardiâ, desdâd fo e ést kel ke l'söcedia, a l'ă fac per kópâs kóla so sbada, perkê l'sa 'nkredia ke uramai töc i födês iskapâc... e dókâ, poerêt a lü, kói so kapi, ke disunûr! Ma ól Paól l'ă usâd sö bel vólt: – Fàs mia de 'l mal té: a m's'ê ké amô töc, nóter! –.

Alura, kel là l's'ê fac pórtâ là òna lanterna, l'ê saltâd de dét e l's'ê inseñcâd só deante a 'l Paól e a 'l Séla e 'ntat a l'tremâa töt. L'ă pórtâd de fo töc po l'g'ă dómândâd “g'õi de fa kósê mé, per salvâs akâ mé kóm'a predikî oter du, e?” . E i g'ă respóndid: “Te krèdega a 'l Gesû Krist, e ta sa salverêt, té e po la to fameal”. E lü là, a kel'ura là de noc, i ä pórtâc de dét in ka, a l'g'ă kûrâd i so piage d'i bastunade, e l'ê stac batesâd, lü e töc i so de ka. Po l'g'ă fac pareğâ só a tâóla, e l'ă fac festa kón töta la so famea, per la grassia riseida de koñôs ól Siñûr.

Scaríd fo 'l dé, i ria là i mesi d'i kapi a digâ de lasâ 'nda kei omeñ là. A l'ê ñak restâd: töt kóntet a g'ă fac saî a lur, e la lasâa indâ 'n pas, po l'g'ă

disia isè de ĭga mia pura. Ma 'l Paól a l'g'ă dic isè, a i mesi:

– A no, e, po! I g'ă de eñ ké lur, a tirâm fo! –.

I mesi i ă riferîd a i kapi, e kei là i s'ê spaentâc asê, a sent a parlâ de sitadî rómâ. E i ê 'ndac là a faga sô i so skûse, po a kómpanai de fo: i ă salüdâc, e prégâc de sluntanês de la so sitâ. E lur du, eñc de fo, i ê 'ndac là a la so ka dela Lédia, i ă tróad là i fedéi, i ă resigürâc... po i ê partîc amô.

--- \* ---

## 17. SKAPA AMO` E RIA INDELA SO KAPITAL` D'I GREK

– IN PIASA GRANDA

--- \* ---

I ê pasâc fo per Amfipól e Poloña, e i ê riâc là a Salonîk, indókê i güdê i g'ïa là òna ka de dótrina. Kómpân ke l'faa semper, ól Paól l'ê 'ndac là, e per tri sabac l'ă deskütîd kón lur, skritûra dré a skritûra, de faga kapî ke 'l Gesû l'éra lü kel mesia ke la Bibia la disia ke l'g'ïa de patî e mör, po turnâ iv: e ke dókâ 'l so mesia de lur (ól so Krist) l'éra prope kel Gesû ke lü l'ga faa koñôs. Ga n'ê stac a de kei k'i ê restâc persûas po i ê pasâc de la banda de 'l Paól e de 'l Séla, 'ntra i güdê, po 'ntra i grék timurâc de Dio, e akâ dei fómne ke i kóntâa ergöt in sitâ. Ma i piö tance d'i güdê, invidiûs ke i ga pórtâa via la sét, i s'ê puğâc a kuak cefi de piasa, e i ă trac insêm ü kasôt per la sitâ. A i ê 'ndac là a la so ka del Gasû per capâ i du fórestêr, ma i ă mia tróac là: e alura i ă pórtâd iviâ 'l padrû de ka e kuak fedéi, g'i ă metîc là denâc a i pólitarke, i kapi dela sitâ, e i ga daa a usâ sô k'i éra lur k'i teñia 'n ka e skundia kei fórestêr là k'i metia suersóta l'urden in sitâ e 'ndel mónđ kóntra l'imperadûr rómâ... per ün óter re Gesû k'i disia lur. Figürâs la sét e i kapi, a kele us lê! I g'ă fac sô la ramansina a 'l Gasû e a i so, po i ă ülîd faga pagâ la so kaüsü, k'i skapês mia via de la sitâ. Alura i fedéi, kela noc lê, i ă fac iskapâ a la svelta 'l Paól, kól Séla e kól Témôt, in diresiû de Beréa.

Lur, riac là... a i ã fac óter κε 'nda là amô a la saladótrina del post. Però là i ã trôad là a tata braa sét piö buna e próna a skóltai: dé per dé, i faa pasâ insêm la Bibia, de ed impö se i laür a i éra delbû isě. E tace gü-dě e po grék i s'ê kónvertíc, poa done e omeñ koñosíc in sitâ.

Ó: kuand κε kei là de Saloník i ê eñíc a saí ke poa a Beréa kei là i predikâa fo amô töc i so laür... a i ê 'nfina 'ndac ilâ akâ là, a tra 'nsem impö de kasí. Isě, poa là i fedéi g'ã tókâd fai skapâ via ön'ótra ólta de skundú, e per sigürésa i ã fac partí söbet ól Paól; anse: lü i ã skortâd infina là a Atě(ne), e turnâc indrě i g'ã dic isě a i óter du 'ndók'i g'ĩa de 'nkóntrâs là amô.

Ól Paól, intât κε l'ispeta là i so du amís, a l'sa 'nfiama töt de nervús a ed tace îdói despertöt, aturen per la sitâ: e (tat per kambîâ) l'desküt kói gü-dě e kói óter timurâc del Dio, e 'n piö adiritúra 'ndel merkât, a töte i ure del dé, kón kei κε ga kâpita a tir. I ga kâpita là ü pér de skuadre de “filósófe”, κ'i ga arda mia tat bé a “kel cicarú lě de 'nsó de là: sêntel... κε manéra de parlâ: kósè ölerâl kósê po i a l'sa adóma lü!”. Ergüdüter, a sêntel a parlâ del Gesú e de resöresiû... i a capa per öna religû nöa, fórestéra. Fatóstâ, i ga sa met aturen, po i a tira là 'n piâsa granda, fo d'i bórdei del merkât, e i ga dómanda de saigen impö de piö de 'sté nöitâ κε l'predika, κ'i ga 'nteresa ακ. L'éra la moda de töc in sitâ, fórestër e mia, de pasâ fo 'l tép a sent e köntâ sö i `ölteme nöitâ. Ól Paól a l'sa sent invidâd a spuse. Là 'mpě, prope 'ndelmês a la piâsa, a l'part in trómba:

– Mè prope ametel, ne: óter atēñs... mé, va tróe gran religûs, e dókâ, brao a óter! Õ 'nfina tróad a ü altâr in mes a sento d'óter, κε g'ê skriíd sóta “a kel Dio, κε m'koñôs ñamô mia”. Buna, prope, êkóla: kel Dio lě, κε finankö `óter koñosiev ñamô mia, e l'si κε l'g'ê ma l'si mia kómâ l'ê... só ké mé adês, a favel koñôs! E dige de 'l Dio κε l'ã fac sö 'l mónđ e töt kel κε g'ê dét: ól padrû del cêl e dela tera, κε l'istâ mia de ka 'n ñeü` dom fa-

brikâd de om, a prisme e marmór ó a parole, e ña d'i omeñ a l'g'ã 'mbisõñ de negõt: a l'g'ã 'mbisõñ de nisù, ke l'ê lü ke l'ga da la éta a töc e a oñü, a l'ma da lü a nóter ól respîr, po töt kel ke ma ókõr per kampâ. L'ê lü ke de 'l prim om l'ã fac nas töc kei óter, töte i rase, e i a met a sta oñöna a 'l so post, e a töte l'ga fisa 'l so tép, po l'fa 'n manéra ke töte, isë impõ ak a spane, i sirke lü, ól Dio so Kreadûr: abekê lü l'sée po mia isë tat deluntâ de nóter, in fi d'i kõnc: ke nóter, difati, m'kampâ töc per so grasia, e 'ndei so ma m'sa möv e m'istâ, kómpañ ke i a dis a kuak póët, ke “lü l'ê la raïs e nóter i foe”! E iura, se nóter, dókâ, a m's'ê de la so raïs, a m'g'ã de pensâ ke l'ga entra prope negõt, po, kói ídói dór e darsênc e de préda ó de leñ: töta roba ke piõ ó mén artêsteka la é fo d'i nosc pensêr e d'i noste ma... e mia nóter a m'vé fo de lur! L'ê gösto riâd sà 'l tép, êkóla, dopo i sêkói del ñórantismo, ke 'l Dio l'ga fa saí a i omeñ de kónvertís töc e despertõt, perké l'ã samô fisâd lü 'l so brao dé de güdikâ a la granda 'l mónđ intrëg dre a la eritâ: e i a güdikerâ per meso d'ün om... “per meso d'ü nom” ke l'ã sirkâd fo lü e séñâd só per töc... kel dé là ke i ã fac turnâ iv dopo ke l'éra mórt: ke, l'éra scet so de lü, scet del Dio dela éta! –.

Kuando ke kei là i ã sentíd a tra 'n bal mórc ke turna iv, ergü i s'ê dier-tíc a töl per ól dedrë “èe, kala adóma de ĭga 'ndrë i kadéne del korp... apéna ke 'l tép de sae m'i kaa fo”; ergüdóter i g'ã dic “aa, bé: scec de dio e d'öna dona 'n karne e lac, ma n'koñôs amô; perô... sönkêl afare ké, de mórt turnâd indrë... m'sa senterâ 'mpó a dómâ, ne, té! E magare, pórtem ké a lü là, té, ke isë m'pöderâ parlâ alistês amô 'mpó de öna dea Resüresiû, se ta ölet, piõ fórtâ lé de la dea dela Mórt”. E i ã po fac kómpañ se lü l'g'éra ña piõ e cicí e cicô 'ntra de lur intât k'i turnâa per la so strada.

Poa 'l Paól l'ê 'ndac per la so: perô g'ê stac a de kei k'i g'ê 'ndac idrë, e i s'ê a kónvertíc, kómpañ presempa de 'l Dionége (kel ke dopo i ã po camâd “kel dela piâsa granda de Atë”), la Damaris... e amô dei óter insêm

a lur. Ól Paól, mè dil a bel car... g'ê prope mai piasîd, de bötâ via 'l tép kói söfésteg söperbe: l'faa mia “filosóféa”, lü: lü l'ragunâa piö bé a ön'ó-tra manéra... dré a la so braa sperienza, e a l'ispirasiû del so sant isperet riseîd.

--- \* ---

## 18. A KORINT` PO AMO` A ANTEOCA

--- \* ---

Delë 'mpó, ól Paól l'ê partîd de Atë e l'ê 'ndac là a Kórînt, indókê l'â trôad là ü güdë, ól Âkuéla, nasîd indêl Pónt ma apéna riâd insâ del'Itála kóla so móer la Présila, perké 'l Céser Klaudio dopo l'an 50 l'ïa urdenâd ke töc i güdë i 'ndes iviâ de Róma, stöf de rónë 'ntra de lur, po d'i “óservânc” kuntra i “eretek kristiâ”. Ól Paól l'ê 'ndac là de lur, e sikóme κ'i faa 'l so stes mestër a l'ê stac là de κα κόν lur, e l'laórâa: i éra de kei ke faa sö e endia fo i tendaġi e poa i éle d'i nav. Töc i sabac a l'parlâa 'n saladótrina, e l'sirkâa de persüadî güdë e grék. Kuand ke po i é riâc insâ de la Macedoña 'l Témôt e 'l Séla, a daga öna ma lur a guadeñâs ól pa, e a és de sà e de là, ól Paól a l's'é dac amô de piö ânima e korp a predikâ, a faga ed a i güdë ke 'l Gesû l'éra 'l Krist. Ma, sikóme ke là i ga faa resistensa e i bestemiâa ακ e i sa 'ngürâa poa lü mórt kómpañ de 'l so Gesû... lü l's'ê sködîd só d'i sândai fina a la so pólver de lur là, e l'ga disia isë:

– Kel sang ke camî... a l'va turnerâ 'ndrë adôs a óter! Mé n'n'ö (*ga n'ö*) mia kólpa. De adês a 'nda 'n'nac, mé 'ndórö là adóma d'i pagâ, êkóla –.

E l's'é po trasferîd là del Göst, ke l'éra mia ü kóla so fatüra d'i ebrë, ma l'indâa a la saladótrina, ke l'istâa là 'n banda. Però 'l Krisp, kapo dela dótrina là, lü l'g'ä kredîd a 'l Gesû κόν töta la so famea, e i s'é a fac batesâ. Bele kónsólasiû, per ól Paól.

Ól Siñûr, öna noc, a l'ga dis isë, a 'l Paól: – Íga mia pura, té, ma sigèta a parlâ e fà mai sito: ke ga só mé κόν té, e nisü i ta meterâ adôs i ma per

fat de l mal! Perکہ ma sa só sirkâd fo ü bel muntû de sêt a 'n kela sitâ ké.

Isê, ól Paól l'ê restâd là ün an e sés mis a faga imparâ bé i so laúr del Siñûr. Ma öna ólta, intât ke ól Galû l'éra prokónsól del'Ακαia, i güdê in gran dekórde i s'ê müic kóntra 'l Paól, a i ä pórtâd là 'n tribünâl, e i kón-tâa sö isê: – Kesto ké... a l'tira la sêt a unurâ 'l nost Siñûr Dio in manéra fo de la lege! –. Ól Paól l'éra prónt a parlâ, ma ól Galû, om sae e paci-fek... kómpañ de 'l so fradêl piö famûs, ól filosof... a l'g'â dic isê a i güdê:

– Adi: se l'éra per vergóta de gros kóntra göstéssia, ó d'öna gran katié-ria e perikól, va skóliterês a kóla pasiensa ke ga öl kón vóter, kar i mé gü-dê. Ma se i ê küestiû de dótrina, de nom, e de legi oste de óter... ardî prima 'ntra de óter! Oi miga ês mé, a güdikâ de laúr isê! –. E i ä mandâc via de 'l so trébünâl. Alura, i ä brankâd ól so kapódótrina növ, ól Sosten, e i ä 'mpienîd sö de bote là deante a 'l tribünâl, ke l's'éra mia 'mpunîd e fac valî. Ma 'l Galû l'sa n'ê ña 'nteresâd.

Ól Paól, delê mia tace dé, l'â salüdad i amîs po l's'ê 'mbarkâd per la Séria, a pórtâ dré la Présila e l'Âkuéla.

Là a Senkr, a l's'ê fac teâ só i kiei a raso per ü vóto ke l'ïa 'mprómetîd.

--- \* ---

## 19. A EFES : KRAPU` , MAGI, E BÜTIGER` DEL'ARTEMIDA

--- \* ---

Isê, i ê riâc là a Éfes, indókê l'â tróad là dei fedéi fresk, e l'g'â dóman-dâd se i ña riseîd ól so brao spéret sant, kuankê i éra deentâc kristiâ. Ma kei là i g'â respóndîd k'i ña ñe mai sentîd a parlâ, de santispéret de riseî (e dókâ, l'éra prima ke de keke bande là l'pasês fo poa 'l Góân apostól... e la venerasiû per la so mader del Gesû la fês deentâ söspetûs ki ke ado-râa la déa d'i kasadûr). Alura, ól Paól a l'g'â dómandâd kón ke batês a i éra stac batesâc: e i g'â dic isê “ma kól so batês del Góân, ól so küsî del

Gesû, ó no!” . E 'l Paól a l'g'ã dic isě ke 'l Góân lü l'batesâa adóma kón-dü` batês de penitensa, per digã isě a la sét de preparâs a krêdega a kel ke l'sarês veñîd fo dopo de lü, e l'disia sa de 'l Gesû... Isě, i ê stac batesâc a lur a nom del Gesû, ke po 'l Paól a l'g'ã stendîd sura i ma sö 'l kó: e isě i ê stac pie poa lur de 'l so brao santispéret, e i ã tekâd a parlâ 'n tate parlade mia d'i so, e po a prófetâ: a i éra poa lur in töt [kómpân d'i] dûdes.

Ól Paól dopo l'ê 'ndac de dét (e daga!) indê saladótrina: per tri mis l'ã parlâd senza pura, e deskütîd, po sirkâd de persüâdei 'nturen a i laúr del reñ del Dio. Ma sikóme ke g'n'éra det tace de kei k'i sa 'ntestardia sö, e lâ denâc a tóe i ga daa kóntra a la eritâ del Gesû... a l'sê destekâd fo de lur, l'ã pórtâd iviâ i so fedéi, e l'ã po tirâd dréc kói so kónferense tóe i dé a ure 'ndela so skóla del Tiras. Isě per du añ: de manéra ke töt aturen per la regû de l'Asia Picena, in tace, güdê po grék... a i ã sentîd bé la so storia del Siñûr, e i so iströssîu. E ól Siñûr a l'faa dei gran mirâkói per so ma del Paól, tat ke s'metia sö 'nfin'a dei fasói ó dei skósaí ke l'ïa tókâd lü, e i maladie i sparia, e i spérec maledêc i skapâa via.

A i ã próad akâ dei guaridúr güdê ğiramönd a kasâ via diâói “'ndêl so nom del Gesû kel predikâd fo de 'l Paól”! Intrâ kei g'éra dét a set iscêc d'ü tal Sé(a), kapo d'i préc ebrê. Ma 'l diaól a l'g'ã dic isě “ól Gesû l'koño-se bé, e poa 'l Paól: ma óter, ki siv ki po, óter, a?”: e kel om là k'i ülia desliberâ l'ga s'ê bötâd adôs a lur... e i ã tat malmenâc, ke g'ê tókâd iskapâ via bióc e feríc. Ke i ã po saîd tóe, güdê e grék de Éfes: e i s'ê ñak istremíc!, e 'l so nom del Gesû l'éra pórtâd in vólt asê.

Tace i kóntâa sö e i skónfesâa tóte i so bröte `abitüidine de prima, e mia pók de kei ke prima i faa i magi adês i muntunâa sö i so liber e arnês fo 'n piasa, po i a brüsâa: laúr de fa 'nda in fóm ü valúr de sinkuantaméla



mónede darsente: e l'sarês a di sinkuantaméla ġurnade de paga!

Isè, la parola del Siñûr la kresia, e la metia só raîs bele fónde e franke.

Öna ólta, ól Paól l'ã lasâd là a Éfes i du “rómâ”, po lü l'ã fac ü vias a Ceseréa, a Antéoca, po de là a 'nde Galasia e Fréga. E 'ntat a g'ê pasâd de là a Éfes ü kónvertîd prima de pagâ a ġüdë e dopo a kristiâ: ól Apól, nasîd a Lesandria, ke l'éra ü brao parladûr, e ferâd indê Bibia. A l'éra stac iströid sö bé 'ndei so laûr dela Bibia, e töt fervurûs a l'predikâa e l'inseñâa bé poa κιακ laûr de 'l Gesû; ma poa lü l'éra fermo amô a 'l batês del poer Góân e a kel ke l'ispetâa là a 'l Górdâ, e dókâ in saladó-trina a i ġüdë de là isè l'predikâa frank.

L'Âkuéla e la Présila, dopo il iskóltâd, a i ã pórtâd là a ka soa de lur, e i g'ã köntâd sö bé piö 'ntréga e ġösta la dótrina d'i apóstói. Po, sikóme ke lü ġa sarês piásîd tat pasâ 'ndel'Akaia, i fedéi i g'ã fac kóraġo, e i g'ã skrîid a kei de là de capâl là óntéra. Isè, l'è stac ü ġran bel laûr, per kei kónvertîc là, ke l'födës venîd ilâ e l'sa fermês là kón lur: ke, difati, l'rebekâa kón vigûr e rigûr i ġüdë 'n piasa e l'faa po ed bé, Bibia a la ma, ke 'l Gesû l'éra prope lü ól Krist, ól so brao “mesia”.

Ól Paól, dopo i 'nkóntrâd ól Témôt e l'Erâst, e ġga dac la so misiû per la Macedoña, l'è turnâd là a Éfes kóla 'ntensiû de 'nda só a Gerusalêm, e dopo, l'disia, “dopo oi 'nda... g'ö de 'nda 'nsö ακ a Róma!”.

L'è stac ġösto 'n kel tép là ke g'e söcedîd öna mesa riólüsü a própóset dela nöitâ del Gesû. G'éra là a Éfes ü ke l'laórâa l'arsênt: tal Demétre, ke l'faa sö per i fórestër a dei césine darsente dela Diana de pórtâ via de re-ġórdâs po fa de regâl... ke i ġa faa ġuadeñâ mia mal a i бүтигër del post. L'ã trac insêm, dókâ, i so бүтигër, kón tōc kei ke a κιακ manére i maiâa e i ġuadeñâa amô kóndei laûr del ġener, e l'g'ã disia isè:

– Öë, amis! Tōc vóter a l'si bé, ke la nosta förtüna la dipënd de kei tra-

feg ké. Ma edí bé e po sentí... ke 'stó Paól ké, e mia adóma a Éfes, ma 'n tóta la regû, kói so raġunamênc a l'ma pórta via ü karêt de kliênc, a di ke i laûr ke m'fa sö nóter kói ma i ġa entra negõt kól so dio e kól cé! Anse: isê, adiritúra 'l nost dom del'Artêmida... l'va dré a perd ól nom: e kela ke l'ê 'ssé tat amirada 'n tóta l'Asia e po 'ndel mónd... la fenéseirà per alí piö ña ü kuarí per nisü –.

A kel parlá lë i ê deentâc töc óter ke ñek: po i daa fo “granda l'ê l'Artêmida d'i éfesî... óter ke granda!”. E töc insem a s'ê pórtâc ilâ 'nvèrs a 'l so teater (l'éra ü d'i piö ġranc del mónd) e i tra a dré 'l Gaio e l'Aristârke de Macedoña, i du soci de vias del Paól.

Ól Paól a l'vúlia bôtâs dé t akâ lü 'ndela deskössü, ma i fedéi i ġ'l'ã mia permetîd, e poa ergü` d'i kapi del post ke i éra so amîs i ġ'ã mandâd a di de stan fo. Kei là, intât... ki ke usâa sö ü laûr, ki ün óter: e ġ'éra po tata sköñfüsü, ke i piö tance i sia ña inkemána i éra là a usâ, po! Kuakdü`, in mes a la sét, i ã persüadîd a 'nterveñi ól Lésander, k'i ġüde i ia spün-câd inâc, e l'faa 'nseñ kóla ma e l'vúlia próa a difênd i ġüde in piasa. Ma, 'ndel ved ke l'éra ü ġüde... i s'ê metîc dré töc a usâ sö d'ona us sula, per iskuase do ure, “granda l'ê l'Artêmida d'i éfesî!”. Kuando ke l'ġa ria a kalmâ la sét, ól sekretare d'i asiarke, i kapi dela sitâ, l'ġa dis isê:

– Sitadî de Éfes! Ġa sarâl mai ergü` a 'l mónd ke l'savrâ mia... ke la nosta sitâ l'ê unurada de ġa ké a prótegila la granda Artêmida, e la so statüa eñda só de 'l cé, e: ġa sarâl vergü` de sañ mia? Kesto ké l'ê ü laûr fo de desküssü, êkóla: e dókâ stî sae, e fî negõt de skónsiderâd! Adês... óter i pórtâd ké kei omeñ ké, ke... ña i ġ'ã fac del mal e ña i ã parlâd mal de la nosta gran dea, mé ma par. Se però 'l Demétre, kói óter bütigêr... i ġ'ã dei aküse a kareġ de ergü`, ġ'ê aposta i so ödiense 'n tribünâl e ġ'ê aposta i prokönsói: e dókâ là i pórtê oñü` i so aküse! Ke se, po, ġ'i dei óter laûr de dómandâ, va sarâ dac sódisfasiü indöna reuñü ġenerâl piö

rególâr. Ke difati, ké, m's'ê a tîc in perîkól de ês akûsâc de riólûsiû... g'ê prope mia ôna buna resû, per gîstifikâ tîta kela baraónda ké! –.

Issê, grassie a Dio, l'g'ă po riâd a mandai via.

--- \* ---

## 20. Ü BEL GIR, PO L'SALÜDA PER TURNA` A GERÜSALEM`

--- \* ---

Finîd fo 'l manikomio, ól Paól l'ă fac camâ là i so fedéi. Kei là i g'ă dó-mandâd de fermâs là amô 'mpó, ma l'g'ă dic de no; però 'ndel salü dai l'ă dic “a turneró ké amô a de óter, se Dio ôl”. I ă trac sô de mórâl, i ă salü-dâc, po l'ê partîd per indâ là 'nde Macedoña. Per tîta la regû l'ê pasâd fo a fa diskörs sura diskörs, de teñ vólt ól mórâl d'i fedéi; po, 'nviâd itâ delbû per la Palestina, l'ê riâd là amô 'ndela Gréca.

Delê tri mis, intât ke l'éra dré a 'mbarkâs per la Séria, g'ê stac ôna kón-gûra de gûdé: ke isê, l'ă decidîd de turnâ 'là amô 'ndê Macedoña. A i ă kómpanâd là via tera fin'a l'Asia ól Sopatr, iscêt del Piro de Beréa, amô l'Aristârk de Macedoña, ól Segönd de Salonîk, ól Gaio de Derb, ól Tè-môt, ól Tékek e 'l Trofem, tîc óriundi de l'Asia. Kuakdû` d'óter, invêce, i ê partîc in nav de Félépe dopo i feste d'i pa, e i s'ê trôac là kón lur a Trô-ada, po i ê stac là set de.

A 'l prim dé dela so setimana d'i ebrê, i éra là tîc insêm, per la so braa ceremôña de 'l pa scepâd sô, kómê l'îa fac ól Gesû 'ndel Senakól, e po kón kei du là a Êmaus. Ól Paól, ke l'g'îa de part ól dé dopo, l'parlâa kón lur, e l'ă tirâd tarde fin'a mesanôc. A i éra sô de sura, kón tate lanterne.

Ü scet, ól Ütîk, ke l'istâa sentâd só sô la finestra erta, 'ntat ke 'l Paól a l'parlâa l's'ê 'ndórmentâd bel fón: l'ê 'ndaca a finî ke l'ê po bórîlâd só de fo, e i ă a töld sô... mórt. Alura 'l Paól l'ê kurîd só de bas po i ă 'mbrasâd fo, de fal respirâ a fôrsa, e l'ă dic isê: – Fis mia pura óter, ke l'so fiat a i ă

mia bandunâd! –. L'ê turnâd sô de sura, l'ă fac per bé la so bela ceremônia del pa scepâd sô, i n'n'ă maiâd, l'ă parlâd amô fin'a eñ car, po l'ê partîd. Intât kei là i ă samô pórtâd sô de sura 'stó scet... amô bel viv!, töc ñak kóntéc a la granda.

Ól Paól l'ă ülid indâ amô a pé, e kei óter invéce i ê 'ndac ilâ a As kóla nav: a i éra dekorde de tróas là amô töc insêm. Difati, de là töc insêm i ê 'ndac ilâ amô 'n nav finâ a Métélě, po de là finâ a Ki ól dé dopo, e 'l dé dopo amô i g'ê pasâc in banda a Sam, e ü dé dopo i éra là a Méléť... senza pasaga isî a Éfes, per ăga mia de trateñis là... dato κ'î ülia fa a la svelta, per tróas là a Gerüsalem a 'l dé 'lla Pentekosta d'i ebrě, s'i ăga riâa.

De Méléť ól Paól l'ă fac camâ là i eci d'i fedéi de Éfes, e kuand κ'î ê riâc là l'g'ă dic isě:

– Óter a l'si bé ma só pórtâd kómê mé kón vóter de 'l prim dé ke só riâd ké indel'Asia: ô servîd ól Siñûr in tate ômitasiû d'oñe kualità... ô pian-sîd asě e ô patîd in tate próe κ'î resistense d'i gödë i m'ă kômbinâd. Ô lasâd indrě negöt de predikâv e de fav imparâ, de kel ke ókôr, tat indi oste ka, kuat in piasa. Ô skóngürâd güdë e grék de kónvertîs a 'l Siñûr e krédega a 'l Gesû Krist. Adês, mé, ma sa sente prope ke só kómandâd de 'nda là a Gerüsalem. Però, l'só mia bé kel ke l'pöl kapitâm. Só adóma isâd de 'l céł ke, 'nsà ó 'là... i ma speta poa kadéne e trebölasiû! Ma 'l valûr dela mé éta l'istâ prope 'ndel finî fo la mé gara e l'öfése ke ô riseîd de 'l Gesû: de testimoñâ fin'a la fi ól so vangël dela grassia del Siñûr. De la mé mórt... ma sa spete a la mé buna sórt, mé. G'ivri mia de löcâ tat, ne: a mescâ sô latî e grék... “mors méa, vita néa”! Mé krede, dókâ, ke óter ma ederî ña piô dopo, töc vóter ké, ke só pasâd in mes a óter a predikâ fo 'l reñ. Alura 'nkö va dige söbet a precîs, ke se dopo magare ergü l'sa sluntanerâ d'la nosta bela strada, la kólpa la sarâ certo mia méa

de mé, ke mé ma só mai trac indrë de 'l fav koñôs töt kel ke Dio öl! Stì bei desc, dókâ, per vóter, e per töt kei ke l'v'ã afidâd a óter ól sant ispéret, per vês i so pastûr, per têtnega 'nsem la so bela famea ke l's'ê fac sô Lü, kól so sang del Gesû. Mé l'só samô ke, dopo ke sóró partíd mé... i sġatólerâ déf in mes a óter a tace lüv famâc: e poarete a lure, tate pôere pégre! Fin'a 'ntra de óter a n'na salterâ fo... κ'í farâ tace diskörs de förberéa, per tras dré i fedéi! E dókâ stím po bei desc, e regórdis de mé, ke per tri añ dé e noc va só stac dré a oñû de óter, ü per ü, kón tat de súdür e piãside! Adês, mé va mete töt 'ndei ma a 'l Siñûr e a la grassia 'lla so parola, ke la pöl trav impë e spartî sô kón vóter l'eredetâ ia preparada a i sanc. Mé õ mai ña bramâd ór ña arsênt ña estíc... de nisû d'óter. A l'si bé a óter, ke a i mé bisõñ de mé po a kei de ki ke g'éra 'nsem a mé... õ fac frónt kón kele ma ké! V'õ semper fac ved ke l'ê a laórâ ke mê e s'pöl kûrâs d'i poerêc, dré a kel ke l'ã dic ól Gesû: “g'ê piö tat göst e meret a da, kón'a capâ” –.

Finîd de diga kei laûr ké, l's'ê 'ngünikâd só kón töt lur, e i prégâa. I s'ê metíc dré töt a piãns, e i ga s'ê bötâc a 'l kol e i a basâa sô töt, kól dulûr piö de töt per kel ke l'ïa dic lü, κ'í avrês ña piö ést dopo, fin'a 'l so dé del Siñûr de eñ a tõi sô töt a lur. Po, l'ã kómpanâd ilâ finâ a la so nav.

[Isë de paságo, kar ól mé Teofel: a l'éra a kela öna d'i ókasiû ke 'n vias insêm a 'l Paól ga s'ére poa mé, prope, ke só dré a skriv só kel liber ké: ma sa regórde dókâ ergöt a de persuna, e mia adóma kel ke õ sentíd a di. Pöderês a skriv só dókâ “nóter de ké, nóter de là”, êkóla: perõ õ preferíd de kómparî mia tat indei pâgine, per i mé bune resû, e per mia tra-la piö lóngâ amô; e poa perké ge n'ê amô tace, κ'í pöl di a lur ergöt de precís sura de mé, e kóma sa tróae kómê kól Paól.

Dèm inâc, alura, kómpanñ de prima.]

## 21. AMO· KÛESTIU· A GERÛSALEM· – INDEI MA A I ROMA·

--- \* ---

Partîc de Éfes, via mar per la piö kôrta i ê riâc là a Kos; ól de dopo a Rod, e de là a Pâtera: i ã tróad là de part söbet per la Fenéca, e i ê a partîc. I ã lasâd là Sivr a ésta de mansina, e i 'ndaa vers la Séria. Isë, i ê po riâc là a Tir, indókê la nav la deskargâa. Tróad là i fedéi de là, i ê stac là set de a kón lur, κ'î gâ disia isë a 'l Paól, ispirâc, de 'nda mia 'là, là a Gerúsalem; ma g'ê stac ña meso de persüadil: l'ã ülid partî, kómpanâd de lur là, omeñ done sccec, finâ fo de la sitâ. Po, ól Paól e i so i ê partîc, e i óter i ê turnâc indrê a i so κα.

A i ã viasâd per mar de Tir a Tólemâeda, indóke i ê stac là ü dé kói fedéi de là, per part amô 'l dé dopo e riâ là a Ceseréa, a la so κα del Félep vangelisadûr, ü d'i prim set diakón kól Isté(f)en, ke l'g'ia kuatr'iscete mia ñamô spusade e töte kuater i éra brae a predikâ, a prérgâ e a fa de 'l be, lure suertöt' kón done e sccec. Kuak de dopo, g'ê riâd insâ de la Gödéa ün óter, ke l'prófetâa poa lü (*kómê l'Agab dèla karèstéa*): là in κα del Félepo, l'ã capâd sald la so sentüra del Paól, a l's'ê ligâd sö i pé e i ma, e l'ã dic isë: – A l'ma dis isë 'l sant isperet, e skultim bé töc: ól padrû de kela sentüra ké... a Gerúsalem a l'sarâ ligâd sö isë d'i güdê po metîd indei ma a i pagâ! –. A sentel a di sö kei laûr ké, töc là i strempiâa, e i skóngürâa 'l Paól de 'ndağa mia, staólta, a la kapitâl santa e asesina; ma lü l'ã fac:

– (Kó)Sè piansî a fa po a kela manéra ké... ke ma fi scopâ fo 'l kôr, a!/? A l'si benóne ke mé só prónt mia adóma a ês ligâd sö... ma po ak a mör, là a Gerúsalem, per ól so nom del Gesû! –. E sikóme ke g'éra ña ers de fermâl, a m's'ê metîc töc kuéc a dis “pota: iura, la sée po kómê ke l'völ ól Siñûr”.

Difati, preparâc i so laûr, i ê po 'ndac là a la kapitâl, kón dré a ü kuak

fedéi de Ceseréa, ke i ä pórtâc ilâ a sta 'n ka del Nasû de Sipr, ü d'i prim fedéi de là. Là a la kapitâl, töc i fedéi i ê ñak istâc kóntêc de ed amô ól Paól e i so! A 'l segönd dé i ê 'ndac là del Gakóm (ól so küsî del Gesû), e kón lur g'éra là poa töc i ótr'ansiâ (ma mia 'l Piéro, staólta, ke l'éra via).

Dopo iï salüdâc, ól Paól a l'g'ã köntâd sö per fil e per señ töt kel ke 'l Siñûr a l'ia fac per so meso de lü in mes a tace pagâ. Kei là, a sentel, i ga daa gloria a 'l Siñûr, e dopo i g'ã dic isê lur: – E té àda a ké, fradêl, kua-ce miêr de brae güdê ke i ä sirkâd fo 'l Gesû po i ê amô fedéi ak a i kó-mandaméc del Mósê e a la so Lege! Però, êkóla: ké m'ã sentîd tate ólte a köntâ sö sö 'l to könt, ke té ta ga fé 'mparâ a i güdê 'n gir per ól mónnd a destekâs fo de 'l Mósê... po ta ga diget isê de faga piö ña lur la so fatüri-na a i masc, e fa piö negöt kómpañ k'i ä semper fac i nos(t) veci. Kósê m'farai kósê po, alura? Kei ke sa lömenta, i veñerâ sensóter a saî ke té ta sét ké! Nóter a m'ta sögerês de fa isê, àda. Ge n'ê ké kuater, k'i g'ã de mantêñ vergöt de 'mprómetîd a 'l Siñûr: càpei 'n kûra té, fâ 'nsem kón lur kel ke g'ê de fa a 'l Dom per kei laûr ké, e pagêga té la spésa de 'l bar-bêr k'i a pele só a séro. In kela manéra ké... töc i eñerâ a saî akâ ke i ä mia séntîd la eritâ sö 'l to könt de té, ma ke poa té ta óservet amô la no-sta santa Lege. De nosta banda, m'ã 'nviâd ilâ 'spertöt' dei letre per diga isê a i pagâ kónvertîc k'i g'ã mia de maiâ karne ófrida a îdói, sang, ani-mai sófegâc, e k'i g'ã mia de fa de ac fo de 'l matrimone rególâd a la fa-me: ma kesto ké ta l'sét a té, ke ta s'éret ké a té a decidîl insêm a nóter –

E 'l Paól l'ã fac kómê i g'ã dic lur: a l'ã fac la so braa pürifikassiû 'nsem a kei óter kuater là, po l'ê 'ndac là a 'l Dom a fisâ 'l dé per ól sakrefése ke oñü' de lur i g'ia de fa fa. I finia skuase i set dé ritöai, kuand ke i güdê de l'Asia i ä ést là ól Paól a 'l Dom, e dókâ i g'ã metîd kóntra la sét, a i ä brankâd e i ä usâd sö 'ndelmês a töc “adîl ké... kel ke prædika 'n gir a töc

despertöt` kóntra de nóter, kóntra la Lege e kóntra 'l Dom, e l'ma fa ardâ mal d'i pagâ per tôte i sitâ 'ndel mónđ! Adês a l'ã fac pasâ dét indêl Dom infina a dei grék! E isê l'ã prófanâđ ól so post piö sant del Siñûr!”. Ke, ġa paria magare delbû ke l'es pórtâđ de dét ól Trofem de Éfes ke i ġa ést in ġir in sitâ kón lü. A n'n'ê saltâđ fo tal ü teremôt, e la sét la sa muntunâa sö föribónđa. A i ã capâđ sald ól Paól, i ã pórtâđ de fo de 'l Dom, po ġ'ê stac serâđ fo i póрте, e i sirkâa de kópâl sö 'l post. Per so förtüna de lü e ġrassia... ól rumûr l'ê riâđ là finâ a i rómâ: e 'l so kapo d'i rómâ l'ê kurîđ là de kórša kónđü` plutü armâđ. Kei là, a ed i rómâ e 'l so kapo, i sa tratê de faga de 'l mal a 'l Paól: e 'l kapo rómâ, ménómâl, a i ã arestâđ lü, i ã fac met in kadéne po l'ã dómandâđ ki ke l'éra e kós'a l'ġa fac. Però, 'ndel bórdêl, la sét ü l'disia “a”, kel óter a l'disia “ó” e ün óter amô ergöt d'óter, de kapġa dét ü belnegöt, kón kel kasôt là töt aturen: e dókâ i ã fac pórtâ via 'n kaserma. Po ġ'ã tókâđ fal pórtâ sö de pis d'i sóldâc sö la skalinada, sedenô i ġa l'kópâa fo amô là sö 'l post intât k'i usâa sö töc rabiûs “Köpmel fo... kópel!”. Indêl indâ de dét in kaserma 'l Paól a l'ġ'ã dic isê a 'l kapo d'i rómâ se l'püdia digâ ergóta: kel là, a edel bé e a sentel a parlâ grék, l'ã kapîđ ke l'éra mia amô kel bröt kanke de ġisiâ d'ü kuak dé prima ke l'ġa trac insêm öna mesa riólüsiû a pórtâ dré 'ndel desêrt ü kuarteméla selôc kól pöñâl, dopo ġġa 'mprometîđ ke i avrês vést töc a bórlâ só i müre dela Kapitâl a so urden, kómpañ de kele de Gereк.

Ól Paól a l'ġ'ã dic isê: – Mé só ġüďě, e só de Tars in Séléca, ke t'l'évrêt sentida a nöminâ: e ta sirke in piasêr de fam parlâ a la sét adês ké, se ta a bé –. E l'ġ'ã đac ól permês. Alura 'l Paól sö in pé sö i skalî l'ġ'ã fac insêñ kói ma a la sét: apéna k'i ã fac impö sito, l'ġ'ã dic, indê so parlada de lur:

--- \* ---



## 22. A L'SA DIFEND` : SO Û SITADI` ROMA`, ME

--- \* ---

– Fradei... e pader venerâbei... Skultim, impiasër, kósè g'õ de div kó-sê adês mé, per difendem d'i aküse k'i ma é pórtade! –.

A sentel a parlâ kómâ lur, i ã fac piö tat sito amô, só 'n piasa.

– Só a mé ü güdë, nasîd a Tars indê Séléca ma perô kresîd ké a la no-sta santa kapitâl, a i pé del Ġamatël, óservânt in töt dela Leġe d'i nosc pader e timurûs e premürûs de 'l Siñûr kómpañ de töc vóter ké 'nkö! Buna. Mé, prima, õ perseġütâd a mórt kela nöitâ ké del Gesû... kól meten in kadéne e bötâ 'n presû tace omeñ e fómne, ke i ma 'ltestimoñerâ poa 'l kapo d'i préc e töt ól gran Kónsèi! Ġ'ie anse dré i so letre de lur, per vi-ġa karta franka fin'a Damâsk... e s'ére dré a 'nda 'là per tra ké a la kapitâl in kadéne töc i eretek ke avrês trôâd là, per daġa po la so braa paġa. Ma 'ntat ke mé 'ndae 'là a kaâl e s'ére skuase riâd, sö 'l mesdë, de bot, ü fölmen de 'l cél a l'm'ã investîd, a l'm'ã bötâd só 'n tera, po õ sentîd a öna us ke la ma disia isë “Saul, a té: 'nkemanéra ma fét isë tat de 'l mal, e, té?”. A g'õ dómandâd “Ki sét ki po té, a?” e l'm'ã respóndîd isë “mé só kel Gesû, prope, ke té ta ma persëġüitet! E, a dam adôs a mé... ta ġa fé kóntra a Mé Só! in persuna, a 'l Dio to padrû!”. E mé “Ma... se mé 'só ke té ta sét mórt a ü tok prima del to amîs Istéen, po?!”. Kei ke ġ'éra là kón mé i ã ést ó' scarû, a i ã mia sentîd la us, ma adóma ü rumûr. E mé amô “Kósè g'õi po de fa adês mé, kapo, e?” e 'l Gesû a mé: “Lèa sö de læ, và là a Damâsk: là 'lta sarâ spiegâd kel ke ġ'é fisâd ke té ta ġ'ët de fa, se ta ġa stét!”. Ma mé ġa edie ña piö per kela fröstada de lüs e la skrapunada 'n tera... e ġ'ã tókâd pórtâm ilâ i mé amîs. Là, ól Anen, ü santôm in pièna rëġgola kóla Leġe e ke töc i güdë de là i ġa ùlia bé asë, l'è eñîd a tró-

âm, po l'm'ă dervîd fo amô i mé öğ, kómpân se s'ére so fradêl, e l'ê stac ól prim ke ò ést amô. Po l'm'ă dic isě: “Saul, fradêl kar: ól nost Dio Sant d'i nosc pader a l't'ă preparâd de semper a koñôs la so ólontâ, a ed ól göst e a skóltâ la eritâ, de manéra ke té ta ға testimoñet in so pro denâc a töc i omeñ e ta ға rendet könt a töc de kel ke t'êt vést e sentîd. E alura, spetet kósê, po? Sö dréc impê! Fà penitensa d'i to pekâc, fàs batesâ, e prége!” . E mé, turnâd indrê ké a Gerüsalem, intât ke prégae là de dét indêl Dom, a só stac pórtâd kómê via de tera e ò ést ól Gesû ke l'ma disia isě “skàpa via a la svelta de ké, perkê... i völerâ prope mia kredet ña 'mpó, se ta ға könterét sö de mé” . Ma mé, 'nvéce, ға disie isě “ma no, ke, àda, té: ké töc i a l'sa ke mé metie 'n presû kei k'i ta kredia a té, de sà e de là, e s'ére là a mé dekorde kón kei ke kópâa ó' Stéen, a tēñega de öğ i so mantei a kei k'i ға traa i so bei ploк. E dókâ, s'i vö! kapî...” . Ma lü l'ă teâd fo “t'ö dic isě de part, ke oi mandât deluntâ, a i pagâ, mé, té!” –. Adês, perô... só 'n piasa i s'éra sa a stöfâc de skóltâl e de sentes tratâc de surc orbi e asasî e i ã kóminsâd amô a usâ sö “Skancèlemel fo del mónđ ...ü isě: a l'mêrita de kampâ ña ü menüt' de piö!” . E i sa strepâa só i estíc de dos, po i faa ü pólverû... Ól kapo d'i sóldâc, alura, a i ã 'nfilâd de dét in kaserma, e per saî a la svelta kós'i püdia po ıga töc kóntra de lü, sikóme ke l'ıa kapîd dét òn'aka, de 'l so diskörs a i güdê... l'ă urdenâd de fal parlâ grék a fröstade. Ma, kuand ke i ã ligâd a 'l pal, ól Paól a l'g'ă dic isě a 'l kapóskuadra se l'ga paria prope de püdi fröstâ ü sitadî rómâ, e prim amô de ıl gödikâd. Kel là... l's'ê stremîd, e l'ê 'ndac là a digel a 'l so kapo... ke dókâ l'ê eñîd insâ a dómandaga a 'l Paól se l'éra de Róma. E 'l Paól sê, e kel óter “a só sitadî de Róma a mé, e l'm'ê kóstâd a ergöt mia de skers, in mónéda! E té kómê...” e 'l Paól “mé 'nvéce só nasîd sitadî

rómâ de dirito: se té ta ga sét vergöt dela tal güera, ke nóter de Séléca m'ă ütäd i rómâ a ens!" E isě, a la fi g'ê po piö stac bisõn de fal parlâ 'n nisõna manéra, ke anse i s'ê a stremíc asě d'ĩ ligâd sô ü sitadî rómâ sen- sa il capâd in fal de ergöt! Ke la us la pödia rià deluntâ, a 'l vólt!

--- \* ---

### 23. AMO` IN TRIBÛNAL` – KONGÛRA – A CESEREA

--- \* ---

A 'l de dopo, 'l kapo d'i rómâ l'ă fac tra 'nsem i gran préc e 'l gran Kón- sêi, de saî kós'i ga faa po de 'ntórt a 'stó Paól: e g'l'ă pórtâd là senza ka- déne. Kuand ke lur là i ă fac sito ü mómênt, ól Paól a l'g'ă dic isě a 'l gul:

– Fradei e amîs: mé, finankò, ma só semper pórtâd bé 'n kósiensa –.

E l'g'ă guadeñâd ke 'l Anen prêt a l'g'ă fac molâ ü sganasû d'ü d'i so in- servienc. E 'l Paól a l'Anen, ke l'éra mia kaâd sô de ritüâl ñe de öfése:

– E isě 'l Siñûr a l'farâ prest a kón té, bela statüîna bianka de fo, e bröt marsû de dét! Ta sét lě sentâd só per güdikâm mé dré a la Lege... e ta 'ndét fo de la Lege, a fam pikâ prima de fam parlâ, té... a!? –.

I 'nservienc i ga s'ê fac apröv` e i ă minacâd: – Ó bröt vilânk! Stà atênt, kel ke ta fét, té... a 'ngöriâ ól to e nost gran kapo del Isdraél! –. E 'l Paól:

– Aa... dómande sküsa: a l'sie mia ki ke l'éra, ña ülie ófênd ól so öfése, mé, e manká poa mé kóntra la Lege! –.

(Abékê mé ga s'ére mia, kela ólta là... a koñôs ü falî bé 'l Paól, mé di- gèrês ke perô l'ă pensâd “ól kapo de kí? D'i préc? A bé, dige mia de no: ma 'l mé de kapo e 'l kapo de töc nóter delbû... té ta 'l koñoset prope ñe- mô mia?” E l'Anen, po, l'ê stac delbû kópâd fo, delě kuak añ.)

Po, sikóme ke l'sia ke l'g'ïa là deante ü kuak sadüsě e piö tance farisě, ól Paól l'ă usâd sô isě, bel car: – Ó fradei: só a mé ü farisě! E va dige ke só ké 'n güdése prope sô la nosta bela speransa 'nde resöresiû d'i mórc –

Kómpañ ke g'éra de spetâs, l'ă 'nviâd fo ü bel kasôt intra de lur farisê e sadüsê a tekâ bêga: ke kesce ké i dis makê resöresiû, ña ângei, ña spērec!, e kei óter ga a bé töc tri i laûr. E dókâ, us sura us... a usâ sö töc mia de skers. Ü kuak d'i mia sadüsê, a 'sto pónt, i s'ê metíc dré a tēnega a 'l Paól, e i disia κ'í ga tróâa prope negöt de mal, e ke magare l'püdia adiritúra ıga parlâd delbû ü spēret... ó ün angel in visiû. Ma ól kasôt a 'kresia de bröt, e 'l kapo d'i rómâ, per la pura κ'í ga l'fes sö a tókêi, l'ă fac pórtâ via amô d'i sóldâc ól Paól dét in kaserma.

Kela noc là, 'l Paól, g'ê kómparíd ól Gesú ke l'g'ă dic “Brao té, e fórsa: inâc isê! A la stesa manéra ke ta m'ět testimoñâd ké a Gerusalêm, ta ma testimoñerêt akâ là a Róma!”.

A dé fac, i güdê i ă metíd insêm öna kóngüra, e i s'ê öbligâc a maiâ ña biv negöt, finakê i avrés kópâd fo 'l Paól: de piö de kuaranta omeñ i ga s'ê presentâc là a i gran préc e a i ansiâ, a digâ isê: – A m'ă güřâd isê e isê, êkóla. Óter, dókâ, purtis là kól gran Kónsêi denâc a 'l rómâ, de manéra ke lü l'va l'pórte là per faga amô kuak dómande 'mpórtante: e nóter, intât κ'í a pórtâ fo, ma l'tö fo delbû, staólta! –. Ma 'l so scet dela so sórela del Paól l'ê eñid a saí de 'l tranêl, e l'ê 'ndac là 'n kaserma, a fagel saí a 'l so sio. Ól Paól, camâd ü d'i kapitâ, l'g'ă dic isê de pórtaga là de 'l so kapo 'l so neûd, per digâ ergóta de gros; e kel là isê l'ă fac.

Ól kapo d'i rómâ l'ă trac in banda 'l suenêt, e l'g'ă dic isê de parlâ pör: e lü là l'g'ă köntâd sö κ'í güdê i s'éra metíc dekórde de faga pórtâ fo amô 'l Paól là 'ndel so tribünâl de lur, kól pretêst de 'nterógâl piö bé e de güdikâl mei: “ma té fides mia perô, ke öna kuarantina de lur i ga farâ ü tranêl e i ă güřâd de maiâ piö ña biv prima de ıl kópâd fo öna buna ólta! E i ê là prónc κ'í ta speta adóma té”.

Ól kapo d'i rómâ i ã mandâd a ka, a l'g'ã dic isě de diga negöt a nisü` d'óter: l'ã camâd là du kapitâ, a l'g'ã dic isě de preparâ inte sóldâc per kómpanâl fo de sitâ per mandâl iã a Ceseréa, set a kaâl e trédes lancér prónc a partî apéna kalâd só 'l sul, e ü kaâl poa per ól Paól, k'i g'ïa de pórtâl iã a 'l sigür` là de 'l góernadûr Felís.

E l'ã skrîid só poa öna bela letra, isě: “Salve a 'l siur góernadûr Felís, de part de mé 'l Klaudio Lésia. G'ö ké ün om, ke i güdé i ïa trac in kadéne, e i éra dré a kópâl, e ö fac apéna 'n tép a tragel fo mé d'i so sgrémfie, dopo ke ö saîd ke l'ê ü sitadî rómâ. Per ved po kós'i g'ïa kóntra de lü, g'l'ö pórtâd là 'ndel so tribünâl de lur, ke ö sentîd k'i tóntónâa de legi so de lur e de ergü` ke per lur l'ê mórt, ma per lü l'ê amô iv: ma g'éra ña negöt de metel a mórt e ña in kadéne. Po, só stac a isâd in kónfidensa ke i ê dré a faça dei tranei, per töl fo a oñe kóst. E, dókâ, t'l'ö mandâd söbet lě a té, e ga fóro di a i so aersare de eñ lě de té, per faça i so aküse. Po, stàm bé!”.

I sóldâc, dré a i so urdeñ, a i ã töld sö 'l Paól e i ã pórtâd là de noc finâ a Antépâtréda, po lur a la matina i ê turnâc indrě, lasândógel là a kei a kaâl ke, riâc là a Ceseréa, i g'ã dac la so braa letra a 'l góernadûr, e i g'ã pórtâd là 'l so presuněr. Kel là, l'les sö la letra e l'ga dómanda de ke próinsa ke l'ê; po, saîd ke l'éra dela Séléca, ke la ga tókâa a lü, l'g'ã dic isě k'i ävrés iskóltâd kuand ke l'g'ävrés vüd là poa i so aküsadûr.

E l'ã fac serâ sö dét indei presû del so kastél d'i Eröd.

--- \* ---

## 24. PROCES` – KAMBE DE GOERNADUR`

--- \* ---

Dopo sik dé, g'ê riâd iã 'l kapo d'i préc, ól Anen, kón kuak ansiâ e ün aókât, tal Tertül`, k'i s'ê pórtâc là 'n tötâ etiketa per aküsâ 'l Paól deante a 'l góernadûr. L'ê stac camâd de dét ól Paól, e 'stó Tertül`, dókâ, l's'ê 'nvi-

âd là a óns sô sensa ergóña kel ke töc i koñosia bé per kanker de goernadûr: – A m'ta s'ê töc rekonosênc, ó gran góernadûr Felis, dela förtüna ke m'g'ã grassie a té, de sta 'n buna pas e de gód de tace bei vantaçi, nóter sêt d'Isdraël, kól to ülîm isê bé a nóter. Ma, oi mia pórtât via tat tép, stâ sigür: té... skóltem apéna kó' 'mpó dela to buna pasensia. M'ã troâd aturen kel kanker de om ké, ke l'met impë kasî e rivulüsiû 'n mez a i gü-dê de töt ól mónð, ke l'sarês ü d'i kapi dela seta d'i nasarê... po l'ã 'nfina próad a prófanâ 'l nost Dom (té ta l'sét bé l'völ di kósê per nóter e per l'urden in sitâ!); e dókâ, m'l'ã po arestâd per güdikâl nóter, ma 'l vost Lé-sia m'l'ã töld fo d'i ma a tradimêt... e isê l'm'ã öbligâd a eñ ké nóter de té. Adês, se ta ölet, ta pöderêt saîn de piö a té, sô la eritâ de kel ke l'ã köm-binâd, se ta l'intêróget poa prope té... –. E kei óter de Gerüsâlêm, cêrtó-sa, a daga manfórta a 'l Tertül', ke l'éra prope isê e isê. Alura 'l góerna-dûr l'ã preferíd fa parlâ diretamênt ól Paól, per difendes lü.

E 'l Paól, poa lü a uncâ per bé i röde:

– A l'só ke té ta sêt grand e göst góernadûr de kela sêt ké órmai de tace añ e dókâ pöde iga kör de ês sincêr. Ta pöt a sigürâs bé: l'ê mia küindes dé ke só 'ndac ilâ a la nosta kapitâl, per adorâ. I m'a ñe troâd dét indêl Dom a desküt` ó a móntâ sô la sêt... e ñe 'ndei salédótrina, ña 'n gîr per la sitâ, po! I g'ã mia öna strasa de próa, lur ké, per kel k'i ma fa 'ntört ké adês! E mé anse ta kónfese ke só ü servidûr fedêl del mé Siñûr ól Dio d'i mé eci, mia dré a i so rëgóle de kela ke lur, po, i cama öna seta, ma 'nvê-ce prope segönd i laûr kómekê i ê skric só 'nde nosta Leçe po 'ndei Pró-fêc. Mé spére, kómpañ de lur, ke, grassie a Dio, ga sarâ la resöresiû per i mórc, per sae e katív: e dókâ poa mé sa sfórse de teñ öna kondota dré-ca denâc a i omeñ e a 'l Dio Sant... in oñe sitiásiû. Dopo tace añ ke só stac iviâ, só turnâd insâ 'n Gödéa semô öna ólta... per pórtaga ké i so

ofërte d'i luntâ a la mé sèt; e staólta ké, adóma per kónfróntâ ké a la fónť d'i fati kel ke m'prédika ké e fo per ól mónđ... e po per ófriga i mé sakre-fése là 'ndel Dom: indókê i m'ă po tróad là, ke ō fac i ritüai preskriic, e negöt de kasî ó prédike. A i ê stac ü куак güde del'Asia, de pasaĝo poa lur a la kapitâl, ke i m'ă fac capâ: e ĝa tókerês a lur de ês ké adês, a kôn-tâ sö car kós'i ĝ'ă kósê po kóntra de mé, dige bé?! Ma, dato k'i ĝ'ê mia ké lur... sö dókâ: i kónte po sö kesce ké kós'i m'ă tróad, de skandalús kuan-do ke ō parlâđ indêl gran Kónsêi... se mia sul ke amô kel ke ō usâđ sö a là: ke s'ére in tribünâl adóma perkê ĝa kredie a la resöresiü per i mórc! E digébě ĝa krede amô, e só ké 'n tribünâl amô adóma e prope per kel! Mé ō finíd, góernadúr. A té 'l ĝödése – .

Alura 'l Felís, ke de kréstiâ ĝa n'sia samô bé ergöt, l'ă salüdâđ kei là kól diga ke l'ispetâa poa 'l Lésia, per sentel a lü, e dopo l'avrês vést ól defâ. E l'ĝ'ă urdenâđ a 'l so kapitâ de teñ presunêr ól Paól, ma negóta kadéne, e de lasâĝa ké i so amîs a i a servês.

Kuak de dopo, ól Felís kóla so móer Drüséla ke l'éra sermana del Erôđ ...l'ă fac camâ là 'l Paól e i ă skóltâđ a kóntâ sö dela so fidüca 'ndel Gesû Krist. Ma, apéna ke 'l Paól a l's'ê metíd dré a parlâ de ĝöstéssia, de kón-tinensa, e de ĝödése finâl... ól Felís, om de tre scete de tri re, a l's'ê a stremíd, e l'ă lasâđ indâ ól Paól, kól diga ke i avrês po camâđ amô ön'ó-tra ólta. Però, in fónđ in fónđ l'isperâa amô a de capâ dei sólc, de 'l Paól, per lasâl indâ deltöt': isê, per du añ a l'ĝ'ă fac fa 'nnac e 'ndré, per parlâ kón lü. Finakê ĝ'ê tókâđ de lasaĝa 'l post de góernadúr a 'l Porco Fest. E l'ă a ülid faĝa ü bel regâl a i ĝüde, de tênei bu: abekê la so skadensa de presunéa l'éra skadida sensa d'ótre aküse, a l'ĝ'ă lasâđ là 'l Paól in presû.

--- \* ---

## 25. ME CAME A GÜDIKAM` OL IMPERADUR`

--- \* ---

Ól Fest, dókâ, riâd itâ 'ndela so próinsa de góernâ, tri dé dopo l'ê 'ndac itâ de Ceseréa a Gerusalêm e l'ã riseîd i kapi ebrë, k'i g'ã trac fo amô i so storie kóntra 'l Paól, po i prérgâa 'l góernadûr de fal pórtâ 'nsà amô a la kapitâl (indüina: per faga 'l so bel tranêl, po kópâl per la via. Mia certo amô kei kuaranta là... se i éra stac fedéi a 'l so brao güramênt!). E 'l Fest a l'g'ã respóndid ke 'l Paól 'léra samô 'n presû a Ceseréa e dókâ i 'ndes itâ lur kón lü, ke gösto l'partia: – I eñe 'là kón mé ergü` de óter ke g'ã aütóritâ, po i ga fage i so aküse a kel om là, se kólpe ga n'ã! –.

Ke isë l'ê po 'ndaca. Ü dés de dopo i ê töc là 'n tribünâl, ól Fest ól Paól e kei eñíc insâ 'lla kapitâl k'i ga da a aküsâl... ma senza riaga a dimóstrâ ña negöt, in prátika. Ól Paól a l'sa difend :

– Mé õ mia mankáð ña kóntra la so lege d'i güdë, e ña kóntra 'l Dom, ó kóntra l'imperadûr, mé! –. Alura 'l Fest, per faga ü piasër a i güdë e tös via öna isë bröta gata de pelâ, a l'ga dómanda a 'l Paól:

– Pöntéra [*piö ólèntéra*], magare, 'nda là a Gerusalêm, té, a, per vës güdikâð là, de kei laúr ké? Ga sóro là poa mé, ne –.

Ma 'l Paól a l'maia la foia: – Só ké deante a 'l trébönâl rómâ, e ké kómê sitadî rómâ mé g'õ de ês gödikâð! A g'õ fac negóta de 'ntórt a i güdë, e té ta l'sét bé! Mé refüde mia d'ês metíd a mórt: se perõ õ fac dét vergöt de gros, ke mêrita la mórt. Ma se õ fac dét negöt de isë gros, e ña negöt de kel k'i ma rinfaca lur lë... alura nisü l'g'ã dirito de kónseñâm a lur! Mé ...pretende 'l gödése de l'imperadûr! –.

E 'l Fest, dopo parlâd kól so kónsêi rómâ, a l'g'ã po dic isë:

– T'ët camâd in kâösa 'l Céser: e de 'l Céser ta 'ndérèt là –. Ke la püdia a 'ndaða bé a töc, a la finfî. Fo ke a 'l Paól, magare, a... kuand ke dopo



l'proerâ amô, a saî mia ke rasa de céser ke l'éra ól Nerû, kela ólta.

Kuak dé dopo, g'ê eñid insâ a Ceseréa a saludâ 'l Fest ól so koñât, ól re 'l segönd Agrëp kóla so... sórela Berenîs, e i staa là 'mpó (ól Eród, la Berenîs, la so móer del Fest... a i éra tri scec del prim Agrëp).

Alura, ól Fest a l'g'ã köntâd sö la so facenda del Paól per fil e per señ... ke l'ia kapîd a lü tratâs adóma ke roba de reliçû... po d'ü tal Gesü mórt, ke 'nvéce per ól Paól a l'éra amô iv; e kómê k'i éra 'ndac po a finî de tra 'n bal ól tribünâl del imperadûr. Ól re l'g'ã dic isë ke l'avrés sentîd óntéra a lü 'sto Paól, e 'l goernadûr l'ã fisâd per indómâ. Kómâ l'ê po stac.

Ó: in pómpamaña de re regina goernadûr kómandânc e töte i kualità de kapi dela regû, ól Paól pórtâd là, indelmês a töc.

L'ã tekâd ól Fest, a di sö isë: – Té, re, e töc vóter ke si ké: adì ké dókâ, kel om ké ke töc i güdë i m'a dómandâd de güdikâ tat ké kuat là a Gerüsalem, e l'sarês piö ña om de sta a 'l món. Ma per mé l'ã fac insêm ña negöt de negöt, per meritâ de mör! E sikóme ke l'ã camâd a güdikâl ól imperadûr... mé ö decidîd de mandagel îâ a Róma. Ma g'ö prope negöt de precîs de skrîega só. Adìl ké, dókâ, deante a töc vóter, e prim de töc a té, ó re: de manéra ke dopo mé g'ãbe po ergóta de met só per ól nost imperadûr, niger sö biank; mia de fa la kapelada de mandagel îâ in kadéne senza ñe ü brao perkê! –.

--- \* ---

## 26. INTAT` , AMO` KOND`Ü D`I EROD`

--- \* ---

Ól re l'ga fa a 'l Paól: – Pàrla, dókâ: ta pödet difendes, êkóla –.

Alura 'l Paól, e l'sa üta kói ma:

– A só bé förtünâd, ó re, a püdîs difendî ké denâc a té de töt ól negöt k'i ma fa kólpa i güdé: té t'i koñoset bé difati, lur... e poa töte i so üsanse.

Alura, ta prége de skóltâm a kör vert e senza pregödése. I a l'sa bé töc, i güdë ké, ke rasa de éta ke ò fac finâ de suen, semper in mes a la so sét del Isdraël, e a Gerüsälêm. A l'ê ü bel tok κ'i ma konôs, e i pöl met sö la so ma sö 'l fög, s'i vöi, ke só stac ü brao farisë, e dela klas piö ligada a la Lege dela nosta religiû. E adès mé só ké sóta prócês per la mé fidüca 'n kel ke 'l nost Dio Sant a l'g'ã 'mprómetíd a i nosc pader antenâc: e l'sarês a di ke i noste dudes trebü`, κ'i unura e i servës dé e noc ól nost Dio... i spéra de lü poa öna resöresiû. Êkóla: l'ê prope e sul per kesto ké, ke mé só ké 'n tribünâl, ó re! E ta parel impósiból, a té, ke 'l Siñûr del mónđ a 'lresösite i nosc mórc? Mé, po, n'n'ö fac déť asë, prima, kóntra 'l so nom del Gesû de Nâsaret: a Gerüsälêm... a n'n'ö metíd in kadéne asë, d'i so amís de lü, kól so permês d'i gran préc, e se g'éra de mêtei a mórt, mé s'ére dekórde. Indei salédótrina spes a sirkae de fai bestemiâ a kói bröte manére, finâ skuase a sang; po, esaltâd kóm'a s'ére, i persegüitae a 'ndei ótre sitâ. Prope per kel, mé s'ére dré a 'nda 'lâ a Damâsk, kói karte firma-de d'i gran préc, e... êkóla, ó re: a meşđë, ò ést sö la mé via ü sömelêk, aturen a mé e a i mé soci, öna lüs de 'l cél piö fórtá del sul, ke m's'ê a bórlâc só töc de 'l kaâl: e a mé öna us la m'ã dic isë in ebrë, êkóla, “Saul, indö éd, po, e 'nkemanéra tata rabbia kóntra de mé, e? Kóm'éla, ke ta sömèet ü toröl' införiâd ke l'va a sang per ól anêl del nas κ'i a liga a 'l pal, e?” . E mé g'ö dic isë “ma ki sét po té, e?” ... e lü l'm'ã respóndíd “mé só kel Gesû ke té ta ma sirket, per fam fo amô öna ólta... e ta ma tróet ña mai! Adès, perô, sâlta sö in pé, ke mé só ké per kesto ké: per investít té a mé servidûr, a mé mesağër e testimone d'i mé laûr ke t'ê ést e ke ta fórd ed amô! Mé ta deslibererö fo tate ólte de la to sét e po ak d'i pagâ: e prope là d'i pagâ mé ta mande, per dêrvega fo i ög, κ'i sa kónvertése de 'l

fósκ a l' car, de l' diaól a l' Siñûr, e i g'ãbe fidüca de mé: e isë, perdunâc, i g'ãbe part a lur kól'ereditâ d'i sanc". Alura, ó re: g'ïe magare de resistiga, a öna tal visiû de l' cél? Anse... o no! E mé dóká prima a kei de Damâsk, e dopo a kei dela kapitâl, e poa per tóta la Gödéa, e 'nfi ακ a i pagâ... a g'ö predikâd fo κ'i g'ïa de pentîs e kónvertîs a l' Dio Sant, po fa d'óvre de penitensa. A l'ê per kel, êkóla, κ'i güdë i m'ã brankâd là 'ndel Dom, e i ã sirkád infina a de fam fo! Ma mé, grassie a Dio, 'nfinankö... ö sigetâd a pórtaga la mé buna testemoñansa a poerêc e ssiór, a servidûr e a padrû ...sensa mai köntâ sö negöt d'óter, se mia kel κ'i ã samô dic ól Mózê e i Prófëc ke l'g'ïa bé de söcédî: ke l' krist mesia l'g'ïa de patî, de ês ól prim mórt a resösitâ, e ke po l'avrês pórtâd la so bela lüs a ebrë e pagâ! –.

Ké, l'salta sö l' Fest a baiaga dré: – Té ta aneset de la festa, poer Paól! T'ët istödiâd trop... e l'tã dac a l' servêl! Po t'l'ë rikâd via bé delbû l' kó, a bórlâ só de l' to kaâl! –. Ma ól Paól a lü:

– No, ó góernadûr: mé ña anese ña resune de mat. Mé dige dei laûr κ'i sa töc de eritâ. E ól re së, lü de kei laûr ké l'ê bé 'nfurmâd: de manéra ke mé ké deante a lü parle kón kalma e fidüca, perkê negöt de kel ke ö dic sö l'ê öna nöitâ, per lü. Só mia dré a köntâ sö, mé, ergóta de kapitâd in kuak kantû fo de l' mónð. Él mia ira, ó re... ke ta ga kredet a i Prófëc, té, e? Mé l'só ke ta ga kredet! –

E l' re a l' Paól: – Kala póκ... ke ta ma capet per kréstiã poa mé! –.

E l' Paól: – Pók ó tat... i a l'völês magare delbû l' Siñûr, ke mia adóma té, ma a töc kei ke 'nkö ké ma skóltî... deenteresev kómpañ de mé: fo ke i kadéne ke kei là i me 'ngüra... cêrtósa! –.

Alura ól re, la Berenîs, ól góernadûr e töc kei κ'i éra là sentâc só kón lur a i ê leâc sö, e 'ntat κ'i 'ndaa de fo i sa disia “ün om kómpañ a l'pöl fa ñe negóta ke l'mêrite la mórt ó i kadéne!”.

Anse: ól re Agrëp a l'g'ă dic isë a 'l Fest "A l'pöderês ακ ês lasâd indâ: ma g'ê saltâd in ment kôsê, po, de tra de mes ól Césër?!"

--- \* ---

## 27. Ü VIAS PER MAR DE FA OTER KE PURA

--- \* ---

Kuand ke po 'nfi g'ê skómensâd ól vias per mar vers a l'Itała, i g'ă dac in kôstodia ól Paól e kuak presunër amô a 'l Gölo, ü del regimënt Aö-güst'. Saltâc sô, dókâ, söndöna nav ke de Adramët la partia per l'Asia, a i ê partîc, e g'éra sô kól 'l Paól akâ l'Aristârκ de Macedoña, amô kel ke 'là là a Éfes l'ia réscâd la pel là 'n piasa kói bütigër. A 'l de dopo, i s'ê fermâc là a Sidû, e ól Gölo, ke l'tratâa bé 'l Paól, a l'g'ă permetîd, kóndöna guardia, de 'nda só d'i so amîs de là a salüdaî e tö sô ergóta k'i g'ă dac dré. Partîc poa de là, per i enc kóntrare i ê 'ndac a finî sóta Sîpr: e, streersâd fo 'l mar de Séléca e Panféla, i ä tókâd ria là a Méra, in Léca. Là, 'l kapitâ l'ă tróâd öna nav de Lesandria ke la 'ndaa 'ndêl'Itała, e i ä fac saltâ sô sô 'n kela. Dé e dé... i ä stantâd asë a 'nda 'nnac, e i ê po riâc là a Kni, ma ól vent a l'g'ă mia lasâd tókâ la ria; isë, i ê 'ndac inâc amô, sóta Kréta, in frónt a Salmû, e semper a stent i ä teñîd la kosta finâ a riâ a i Bei Pórc, là isî a la sitâ de Laséa. La nav l'éra mia tat franka, a i éra töc istöf` d'i gurnade perdide 'n mes a 'l mar (...i ebrë i ia sa bel e fac ól so dé del desü` de penitensa e 'mplórasîû, e dókâ l'éra semô d'utüer: a kel tép là, uramai, a l'sa metia piö dré ña nisü` a streersâ fo 'l mar).

Ól Paól... a l'ga disia isë ke l'éra trop perikulûs a 'nda 'nnac, e ke l'sarês istâc ü gran dan per i merkansée e po per i persune: ma ól kapitâ l's'ê fidâd pötôst de kei dela nav; e sikóme ke 'l post a l'éra mia bu de pasâ là l'inveren, i ä decidîd a maguransa de part amô e tra dréc finâ a riâ là a Fénis, ü pórt de Kréta piö temperâd per la so pósisiû e per i enc, per pa-

sâ fo là la staġû frega. E dókâ, kóndü bel ventisêl de só, i ã riteñîd de fagla, e trac sö la lânkóra i s'ê metîc idrê a 'ndaġa dré a la kosta de Kréta.

Ma delê mia tat a g'ê scopâd fo sö l'isla ü ent de bóraska (i ġa disia “ól eöraküilü”): la nav l'ê staca sbatida via, senza püdî rezîstega a l'vent, po g'ã tókâd indâ là senza diresiû, e 'ndel pasâ 'n banda a ön isolôt de nom Kua, a stent i g'ã riâd amô a kontrolâ la barka de salvataġo: a i ã traca sö po i ã dôvrâd töt kel k'i ã püdîd per fasâ sö a kuak manére la nav, de rinfórsala. De la pura de 'nkapâ dét indela Sért (i bank de sabia ólta, 'lâ de là vers a la Lébîa), a i ã kalâd fo 'l ġalesânt de sigüresa, po i ê 'ndac là a la orba. Sbatîc a la ġranda de la bóraska, 'l dé dopo i ã bötâd a mar ól kareġ, e 'l dé dopo amô, disperâc... i ã bötâd via a tóta l'atresadüra. Per dé e dé i ã piö ést ña sul ña stele, de tat ke g'éra niger... e po i éra dré k'i perdia a tôte i so speranse de salvâs.

L'éra tat k'i maiã ña piö. Alura 'l Paól impê 'ndelmês a töt a l'ġa dis isê:

– Ne, amîs, g'éra adóma de dam a tra a mé e partî ñak per Kréta! M'avrês iskiâd kel bröt résc ké, e töt ól patatrâk. Adês, perô... va dige mé de sta sö de mórâl: ġa sarâ po ña ü mórt, ma m'perderâ nómâ (*adóma*) la nav. A ô ést istanôc ü angel del Siñûr, ól mé padrû... e l'm'ã dic isê “ġa mia pura, Paól! Ta g'ét de kómparî deante a l'imperadûr, té! E dókâ, 'l to Siñûr a l'ta fa la ġrassia de salvâ 'nsem kón té töt kei ke ta ġët dré 'nsema!”. Alura, fórsa dókâ, amîs: só sigür` ke la 'ndará a finî prope kómpañ ke l'm'ê stac dic a mé! A m'ġ'avrês ġösto de 'nkóntrâ ön'isla, ké aturen –.

L'éra sa kela d'i kuaatórdes noc k'i eñia sbatîc per ól mar: vers a la mesanôc i g'ã üd la 'mpressiû, dei marinêr, de riaga apröf` bé a la teraferma. Bötâd só ó' skandai, i ã tróâd fónđ de inte bras. Per la pura de 'nda a finî kóntra i kustû, i ã lasâd só i kuater lânkóre, e i ã spetâd ansiûs ke l'fes car. I marinêr perô, fürbi lur, i sirkâa de skapâ via per prim, kól pre-

têst de manóvrâ só a i lânkóre, e i ă kalâd fo ól salvatágo. Ól Paól alura l'ê entrâd sô, e l'g'ă dic isê a i sóldâc ke se kei là i teâa la kórda, lur sô la nav deperlûr i g'ia po ña piö meso de tókâ tera! Alura, la kórda i ă teada i sóldâc: ma kela dela барка: isê... ó töc ó nisü', i ävrâ pensâd, e scao.

Intat k'i spetâa ke l'fes car, ól Paól a l'ga daa a digâ a töc de maiâ ergöt de sóstansa, dopo kuatórdes dé senza tókâ skuase negöt kói déc, ke l'é-ra nesesare de ês impö 'n fôrse, per salvâs, dókâ, e ke i avrês piö perdîd ña ü kiêl de piö, per istaólta. Po l'ă capâd indei ma lü 'mpó de pa, i ă benedîd sô sóta 'l nas de töc, e a tókêi a n'n'ă maiâd lü e g'na daa fo a i óter (isê, kei ke ga kredia a 'l Gesû i ă fac amô la so bela kômüñû, dopo tat tép via de Gerüsâlêm?). E a la fi, töc i ă töld sô ergöt de maiâ.

Pota... ó: a i éra dôsenetanta persune, sô sô 'sta nav! E, dopo maiâd töc asê, a i ă bötâd fo a mar poa töt ól fórmët ansâd.

A l'iscaria fo uramai, ma i ga riâa mia a ed bé la tera: i 'ntreedia adóma ke ön'insénadüra kóndöna spiasa... e i ülia próa a spüncâ 'là la nav. I ă destekâd via töte i lânkóre e lasade 'nda a fónđ, e kói manóvre de ókasiû i ă tentâd de tras visî a la spiağa. Ma l'g'ê kapitâd ü fónđâl trop vólt in mes a do kórente... e la nav la s'ê 'nkaiada, denâc impientada só 'nde sabbia, de dré desfada sô de la sviemensa d'i óndade! I sóldâc a i éra dré a decides per kópâ só töc i so presunër, k'i ga skapês po mia, kei ke nó-dâa. Ma 'l kapitâ, ispirâd per salvâ 'l Paól, a l'g'ă permetîd de kópâ nisü', ke anse l'ă dac urden a kei d'i sóldâc k'i éra bu n'nódâ de bötâs a mar e riâ là a ria per prim a spetâ là i óter e têndei... k'i sarês po riâc là a lur, ki söndü tok de leñ, ki sura kuak tok de nav.

E... ó: éi po mia riâc a ria delbû töc intrêg?!

--- \* ---

## 28. DE MALTA A `NAPOLE PO A LA FINFÌ A ROMA

--- \* ---

Ól gran perikól a l'éra skampâd, dókâ, a la finfì. I s'è trôac ke i éra là a Malta, e i 'ndìgeni i ã capâc là senza pura, àda té, anse a skuase de amis.

Impiâd sô ü gran bel fög, a i ã metíc là töc bel aturen, ke l'piöia ak, po l'faa óter ke freğ asê. Ól Paól l'ia töld sô öna braka de leña, e l'éra dré a bötagla sô sô 'l fög: e öna lëpera, eñida fo per ól kóld... la ga s'è 'nturcada sô sura la ma! Kuando kei óter i g'ã ést la lëpera sô la ma, i sa disia “kesto ké l'è de sigür ü bröt asasí!... de skampaga a kel mar ké, po gua-deñâs isê la so batida del cél!” . Ól Paól, però, l'ã adóma sködíd só la besca sô 'l fög: de skato, isê de 'stint, ne, mia de katiéria. Töc adês i sa speta ke l'sa sgiunfês sô töt e l'deentês töt niger, e l'bórlês só là stekîd a l'ato. Ma, speta e speta... ga söcedia ña negöt de bröt: isê ke i ã a kambîad parêr a la svelta, e i tekâa a dis ke l'éra ü dio!

Là aturen, a l'g'ia i so terê ól kapo de l'isla, ü tal Pöbljo. A l'm'ã ülid là töc lü a ka soa, per tri dé laâc estíc e servíc. A g'éra in lec malâd ól so pader, kói ecês de févra e disenteréa. Ól Paól l'è 'ndac là a tróal e, dopo i préğâd, a l'g'ã stendíd sura i so ma, e i ã a fac guarí. Isê, a saíl in gir, i ga pórtâa po là töc i malâc: e tace i a pórtâa via guaríc, ó almén trac sô de mórâl, e kól so brao nom del Gesù in kör. E dókâ, de skónsegüensa, a i ã semper tratâd bé töc i skampâc; e kuand k'í è po partíc amô ke g'è pasâd fo dei ótre nav a töi sô, i g'ã lasâd manká ña negöt.

Ól Paól... l'è stac tri mis dopo, amô kóndöna nav de Lesandria, ke l'ia svernâd ifâ là a Malta, e la g'ia per prótetür in punta i stätüe d'i du sômèi i Dioskür. Tókâd ól pórt a Séraküsa, i è stac là tri dé; po de là i ã tókâd a Reğo. Ól dé dopo, g'è leâd ü bel vent: e isê, 'n do ğurnade i è riâc là a Posöl'. Là, i ã tróad là dei kristiâ (...samô a là!) e i ã püdid istâ là kón lur set dé 'n buna kómpañia. Po, dókâ... i è riâc a Róma!

I fedei de là (ke ga n'era là samô de 'mpô 'nfina a là, adóma 'l Siñûr i a 'l'sa kómê; ma órmai a n'n'ê a spertôt` sô i rie del so mar d'i rómâ d'i grék e d'i gisiâ, 'ndókê g'ê dei pórc gros, e poa 'ndei regû dré a i pórc)... k'i ãa samô sentîd a kóntâ sô d'i so male entüre finide fo töte bé, i g'ê 'ndac in-kóntra finâ a 'l Foro Apio e a i Tre Taerne.

Kuando ke 'l Paól a i ã esc... l'ã po ringrasiâd de kôr ól Siñûr, e l's'ê fac fórsa a lü, dopo tat tép a teñ sô i óter.

A Róma g'ê stac permetîd de 'nda a sta persôkónt`, adóma kóndü` sóldât de guardia. Dopo tri dé, l'ã fac veñ in ka töc i kapi d'i güdê a Róma, e l'g'ã dic isê a töc:

– Ó fradei: só stac metîd in kadéne a Gerúsalmê sensa ã mai fac ña negóta kóntra la mé sét ó kóntra i noste legi; e adês... só ké, 'ndei ma a i rómâ; k'i ùlia lasâm indâ, lur, dopo ãm interógâd e ãm tróâd prope negóta de meritâ la mórt. Ma, dato k'i güdê là i ùlia mia lasâm liber... ma só tróâd öbligâd a camâ dét l'imperadûr: mia perô perké g'ãbe ergöt mé kóntra la mé sét, ne! Alura dókâ, ekól: a v'ö fac camâ ké aposta per vedev e parlâv: edî bé töc, ke l'ê per la so speranza del Isdraël... ke pórtê 'sté kadéne ké – (e per istaolta l'ã lasâd in banda la so braa resöresiû).

Kei là i g'ã respóndîd: – A nóter ké m'ê riâd ké negöt de 'nsó là ke l'ma dige ergöt de té, e ña nisû` d'i nosc de là l'ê eñîd insâ a kóntâm sô de 'l bé ó de 'l mal, sô 'l to kónt de té. E dókâ ma par göst de sent de la to bóka ta penset kósê delbû. De la to kómbrikóla, töcimanére... m'ga l'sa bé asé poa ké, ke despertôt` i ga da kóntra –.

Ûn óter dé fisâd a i ê turnâc là 'n tance, e lü l'parlâa e l'testimoñâa 'l so reñ del Dio Sant, e l'sirkâa de persüadîi sô 'l Gesû resösität, a partî de la so Lege del Mósê e d'i Profêc, de matina a sira.



Ergü i s'ê lasâc capâ d'i so resû, ma ergü i restâa amô interdêc. Po, si-kôme κ'i ga riâa mia a metes dekôrde 'ntrâ töc söndöna pusisiû de sirkâ fo per töc insema, i s'ê salüdâc isê, intât ke 'l Paól a l'ga disia sö amô:

– Bé a resû, ó' spéret sant a l'g'ã parlâd isê a i osc pader, per so bóka del prófêt Isai: “Và là de 'sta sét e dîga isê, té: a senterî kói órege e kapéserî mia kól kör, a ederî kói ög ma rierî mia sö kól servêl! Kör de préda uramai, kel de kela sét ké! Kói órege i fa finta de ĩ mia sentîd e kói ög de ĩ ést ña negôt... per ved mia kól servêl e per sentî mia kól kör, e per kónvertís mia! Fóroi po kómê a gvarii e salvai, mé, e?” . Sentim bé mé, kósê va dige ké adês alura, mé: adês, kela gvarigû e salüte ké del Siñûr la ga ě 'nviada a i pagâ: e lur sê i vederâ po i skólterâ! Po... amen a per vóter! Ól nost pader Abrâm, ól Mósê, e i sanc Prófêc i va scarése lur vóter, i g'ãbe kûra lur de óter. Ól Gesû... l'ê mia stac invâ, e ñe per erûr ó kóntraðia, ke l'ê restâd ü güdê poa lû: e d'i so prim fradei, dókâ, l'savrâ po lû fas rekoñôs, a l' so mómênt göst, per ól so bé... prope kómpãñ de 'l nost pader Gósef ilâ là de 'l Faraû!

--- \* ---

### KUA MEA DE ME

Ól Paól l'ê 'nsö a Róma a féc uramai de skuase du añ, kóla oia de 'nda 'là fin'ak indel'Ibéria Gorga. In tace i va là a tróâl, e i a skólta ke l'prêdika semper ól vangêl del reñ e l'fa 'mparâ i so laûr del Gesû kón töta libertâ e frankesa, senza óstâkói ña pura, ó guadêñ, ke l'sée mia la sódisfasiû de la so misiû. A l'só ke l'ga teñ prope tat ke l'rie 'nsö amô Róma poa lû, 'l Piéro 'n persuna; e 'ntat a l'ga skriv amô a tate d'i bele famêe de fedéi ke l'ã trac sö lû, ó koñosîde dré a i so vias; e l'só ke i so letre i sirkula sa de 'mpó finâ de prima d'i so storie del Gesû, ke in divêrs a m's'ê dré a met

impõ alurden, ke mé sapie; e l'ê gran bé, intât ke m's'ê dré a riâ a 'l nost an ispecâl de göbel, l'an de grassia, dopo i “set setimane de añ” ke 'l Gesû l'ê 'ndac de dét a 'l Dom a a netâ fo 'mpó... e dopo ke la sömeâa òna bela storia, finida tötâ mal per lü 'là là a Gerüsâlêm... adês invêce, ke de là i nosc i ê dré a skapâ (isâc per tép kóm'a i ê stac) a m's'ê semô piö bu de köntâ tôte i nasiû... 'ndókê 'l so nom e 'l so vangël i ê riâc ilâ; ke s'dis ak (presempe de 'l Tômâs) finâ 'ndókê l'ispónta 'l sul e (de 'l Gakómî) forsâk finâ a i so kolone del Erkól, indókê l'va só. A l'ê dókâ prope mia ü liber finîd, ól nost... e méno amô fenida l'ê la nosta storia!

A 'l dé de 'nkö, i rómâ i könta a presapók ossendésâñ (òt sènt è dés añ) de la prima fónnasiû dela so gran kapitâl (a 'l so tép dei nosc re ól Gero-boâm II e l'Aséré, e de l'Amós prófêt): ke l'sarês po kómpañ se nótr'ebre m'kóntês almèn amô ü bel sensinkuantâñ de piö a partî de la fónnasiû del prim Dom del Salumû, ó desenô [pro “sèdènó”] ü tresento de méno a partî de la dedicassiû del nost segönd.

E... mè a di k'í laûr (a sta a kel ke s'sent aturen) i va mia tat bé ña per Róma, e mia 'dóma per Gerüsâlêm, kómâ 'nvêce a i so bei tép; senza üli di però ke 'l sée uramai ké 'l gödése, ne, la fi del mónđ katív ke l'ã dic ól Gesû e ke nóter m'ispeta kóla fidüca de ês i so salvâc... insêm a töc kei ke 'l Siñûr Dio Pader a l'völerâ Lü.

E senza fa finta de negõt d'òna kuak preoküpasiû a 'ntra de nóter, ne: i s'ê po mefíc idrè, êrgü 'nsà e 'là, a antâs “nóter, a m's'ê de 'l Piero, nóter” “e nóter invece m'istâ kól Paól” ó sedenô “ma per nóter a l'könta de piö l'Apö!”; e skuase i sa fa i kóreñ ü kó' l'óter... ña se l'sarês mia sa asè kel ke ma tóka patî töc de kuak imperadûr indiaólâd e altarí de idó!

Però, amen. Laûr ke paserâ a prest, isperëm.

E déógrassia, kar a té 'l mé Teofel, per töt kel ke ö püdid köntât sö finâ kel, in kel liber ké... e per kel ke amô 'nkö 'n töt ól mónđ ól Siñûr 'lê dré a fa de bel e grand per töc i omeñ ónêsc, a meso d'i so apôstói ke l'ă spanđid fo despertöt`, e poa per meso nost de nóter... ke m'farâ mia piö i surc ña i orb e ña i möc, e mén amô i paralitek a i ma e a i pé, kóla grassia del so sant ispéret, e la so ma sö 'l kó finakê 'lvölerâ lü: prima de fam trôâ töc insêm a 'l Gesû, là 'ndó 'lma pareğa 'l nost post, sö là 'n banda a lü, e lü 'mbanda a 'L Dio Siñûr, Pader in cél e 'n tera.

A ö skriid só kei laûr ké, dókâ, perکہé mé spére ke “'l prensépe dela fi” 'lsee po mia tat sóta: abékê nóter m'ispete de kör “ól prensépe de 'l mei” (mia adóma “ün óter mónđ dopo”, ne: ma a partî de 'sto mónđ ké ke 'ldeenta növ, kómpañ ke 'l'intênd e 'l'ă 'nviâd fo ól Gesû).

Se ta paset de là amô d'i mé bande, ta koñoserêt la mé segónđa neudina, la Sara. Per lé, po per ól so fradelí 'l Dâvide, kuando k'i leserâ sö a kei laûr ké dopo ñi sentíc prima a köntâ sö bé de i granc... só stac atênt a skriv sö 'n manéra sempia, senza sfrönsói, e (spére prope) senza ês ña trop nuiûs. E krede isê de ĩğa fac ü bel servése ak a la eritâ; abékê 'l'impórtânt per nóter a 'lsee mia adóma de saiga tace laûr, ne: ma sê de krêdega delbû a ü pér, e po skómêtega sura töt.

Ta salüde amô, té, e poa töc kei dela to bela famea lë!

Ta g'ët ól permês, cêrtósa, de fa pasâ i mé karte 'n bune ma e de köntâ sö töt poa té, a ki ke öl iskóltâ.

A riedis, po, indóe, kuando, e kómpañ ke Dio öl.

I n d è s d ' i k o

...	prèambol	pag.	3
Ko 1	i salüda 'l Gèsù	“	5
“ 2	fiame dè Sperèt	“	7
“ 3	indèl sò nòm dèl Gèsù	“	10
“ 4	pèr ol sò nòm dèl Gèsù	“	12
“ 5	sömèâ sènsa ès	“	16
“ 6	dudès piö sèt	“	19
“ 7	prim martèr kristiâ	“	21
“ 8	ol Vangël a 'l part	“	25
“ 9	ol Saul a l'kambia	“	28
“ 10	Piero in misiù	“	31
“ 11	Piero l'da könt	“	34
“ 12	prima pèrsèküsiù	“	36
“ 13	a Sipr è Antèdca	“	38
“ 14	a Ekògn è Lèstra	“	43
“ 15	taètî o mia	“	45
“ 16	Paol pèrsòkönt	“	48
“ 17	Paol a Atë	“	51
“ 18	a Korînt	“	54
“ 19	a Efès	“	55
“ 20	ü bèl gir	“	59
“ 21	in ma a i Româ	“	61
“ 22	a l'sa difènd	“	65
“ 23	kongüra	“	67
“ 24	procès	“	69
“ 25	me came l'impèradûr	“	72
“ 26	amô kondü Èrôd	“	73
“ 27	ü vias dè fa pura	“	76
“ 28	a Roma	“	79
...	kua mea	“	81